

**ASO TOFI, 29 IUNI 2023**

*Na toe amatalia Taualumaga a le Fono Aoao Faitulafono i le itula e 6:00 i le aftafi.*

*Na toe faaaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** Ou te faasilasila atu ua toe amatalia nei ia Taualumaga a le Fono Aoao Faitulafono. Faamalo le onosai lenei afiafi i le paia o le tatou Palemene.

E faataatiae tatou taualumaga mo le malologa o lo o saunoa le Afioga i le Minisita o Pisinisi Alamanuia ma Leipa e tali faamalamalama foi nisi o mataupu sa laga i saunoaga a le tatou Maota.

O le mea lea ou te tapa ma le faaaloalo lau Afioga i le Minisita mo le faaaauauina o le saunoaga. Lau Afioga i le Minisita.

**Tofa Hon LEATINUU WAYNE SOOIALO:** E momoli atu le faafetai tele lau Afioga i le Fofoga Fetalai aemaise foi o le Matagaluega, e talitonu o lea ua matu i fau le taligasua i le afiafi, aua le Afioga i le Palemia ma le mamalu o le tatou Palemene. Faafetai lava mo le tauamafataga.

O le a toe taumafai atu lau Afioga ona o lo o taumafai e faauma atu pea le folasaga i tatou galuega faavaitaimi. E faapena foi le faamautuina o aiaiga mo le faaaogaina o Faalapotopotoga ma tagata taitoatasi, o lo o tapenaina nisi faigaluega po o privates recruiters e tuuina atu i le MCIL mo iloiloga, a o le i tuuina atu mo le sailia o ni avanoa faigaluega i fafo. E faamalamalama atili le tatou mataupu lea lau Afioga i le Fofoga Fetalai, ona o le tele o agents nei po o i latou o lo o faatinoina lenei tulaga, o lo o faatino mai lava i luga o aiaiga a i latou ma employers mai fafo, e tasi lea faafitauli o lo o i ai taimi nei ona e tatau ona i ai le process e siaki lelei ai tagata faigaluega o lo o latou avea i fafo, ona aumai lea i le Matagaluega o le MCIL ma avatu ai se talosaga i le Kabeneta mo i latou e o i fafo. O le process la lea o le a toe tuu mai totonu o le Matagaluega ina ia iloilo lelei i le taimi e aumai ai tagata faigaluega mo le aveina i fafo. O i foi la o le a tele ina toe maua ai loa latou e le tatau ona agavaa mo lea fuafuaga. Ona o agents latou e faatino lava e latou le galuega mo i latou, aemaise foi employers mai fafo, ae le o manatu

lava i le tulaga lea ua i ai le faafitauli i le taimi lenei i a tatou pisinisi tumaoti o lo o totonu o Samoa.

E le gata i lea o le toe iloiloina o maliega faavaomalo mo polokalame o galuega faavaitaimi, pe a mautu la tatou faiga faavae. O aiaiga nei o loo faia lava i lalo o le MOU i le va o le tatou faigamalo ma faigamalo ma Niu Sila ma Ausetalia. E tatau ona tatou toe tilotilo lelei i le faamautuina o ia tulaga mo le agai i luma. Mo le silafia o lo o faaaauauina pea ona auina atu tatou tagatanuu i galuega faavaitaimi i totonu o Ausetalia ma Niu Sila a o faagasolo ai le faamautuina o le faiga faavae mo galuega faavaitaimi a Samoa i le 2013. O le 6 masina mai ia Tesema le tausaga na tea nei e oo mai i le 6 masina e tau mai ia Me, Iuni ua ova atu ma le 4,000 tatou tagata faigaluega o loo ua uma ona ave i fafo, o loo galulue i fafo.

O le masina lenei o Iuni, e 456 tagata faigaluega ua faamaonia e le Kabeneta e malaga atu mo galuega faavaitaimi, e 219 Niu Sila ma le 237 Ausetalia. Ia e pei o le se faamalamalamaga lea lau Afioga i le Fofoga Fatalai aemaise foi le mamalu o le tatou Maota i le faamalamalamaina o le tatou galuega faavaitaimi. E lelei le poloakalame ae tatau ona faamautu uma itu ia ina ia mafai ona tatou puipuia tatou tagata faigaluega e malaga i fafo aemaise foi tatou pisinisi tumaoti i totonu o Samoa.

Lau Afioga i le Fofoga Fatalai ona ou oo mai lea i le tau o oloa pei ona fesiligia foi e isi o tatou sui mamalu po o sui o le Palemene. Mo le silafia o poloaiga o le tau o oloa po o le price order, sa faavae mai lalo o le Tulafono o Fefaatauaiga Talafeagai 1998 (Fare Trading Act 1998). O lenei Tulafono sa faatino ai le faatuina o le Komiti Faatino o le tau o oloa poo le price control board. O le latou matafaioi o le faatulaga ma fetuunai tau o oloa mai lea taimi mai lea taimi, e fua i tau o loo auina mai ai i fafo faatasi ai ma isi tau faaopoopo e tuuina iai i totonu o le atunu, pe a faaopoopo ai local charges ma isi fees ma tulaga faapena. Sa pasia e le Palemene ua tuanai atu ia Tulafono o Faiga Faatauvaga Fefaatauaiga ma le Puipuiga o Tagata e faaaogaina oloa ma le auaunaga po o le Competition and Consumer Act i le tausaga e 2016 ma suia ai loa le Tulafono o Fefaatauaiga Talafeagai 1998. Ma e i ai ni suiga sa faatino ina ua faamalosia lenei Tulafono fou ma le naunautaiga ina ia sologa lelei ai le faatinoina o fefaatauaiga ma faiga faatauvaga i le atunu. O suiga e aafia ai le taofia o le toe faia o ni poloaiga o tau o oloa poo le tatou price orders ae taatia lava e fai oloa ma le maketi latou te faatulaga a latou tau, ina ia faalauiloa pe promote ai faiga faatauvaga lelei mo maketi, fefaatauaiga i le atunu aua se manuia o tagata faaaoga oloa.

Faapafala o le Komiti Faatino o tau o oloa sa iai, ae suia i le Komisi o Faiga Faatauvaga poo le puipuiga o tagata faaaoga oloa e latou te faamalosia lenei Tulafono. O le poloaiga mulimuli lava sa faatino ma faatulaga i lalo o le malosiaga a le Komiti Faatino o tau o oloa. Sa faamautaina i le masina o Iulai o le tausaga e 2017 ma amata ai loa i ina ona faaaoga le faiga fou mo faiga faatauvaga.

Lau Afioga i le Fofoga Fetalai ma le mamalu o le Palemene, e talitonu ua lausilafia uma le aafia ai o le lalolagi i le aofia ai ma Samoa i le faamai oti o le Koviti-19 faapea taua ma vevesi a isi atunuu o le lalolagi ae aafia atu ai ma Samoa. E i ai le manatu e tele lava ni faafitauli na aliae mai ai i le lalolagi aemaise lava i tulaga tau fefaatauaiga ma felauaiga o oloa. Ona o le tulaga i vavao faatasi ai ma le faaitiitia o femalagaina a vaa lau oloa ma faaeteetega i le soona pepesi ai o le faamai.

Le mamalu o le Palemene o le amataga o le tausaga 2020 ina ua faamalosia puipuiga ma faaeteetega mo le Koviti-19 ma poloaiga mo faalavelave tutupu faafuasei na toe faatulaga ai poloaiga faatonutonu o tau o oloa i lalo o aiaiaga o le faavae po o le constitution of Samoa i lona Vaega e 106 mo le tulaga i faalavelave tutupu faafuasei.

O lea faiga mo le puipuiga o le tagata faatau ma le soona siitia e pisinisi o tau o oloa i lea vaitau. E 4 poloaiga faatonutonu tau o oloa faatinoina i lea vaitau ma e nao o oloa taumafa o loo auina mai fafo, o loo faaaogaina e tagata i aso fai soo sa ave iai le faamuamua, ma o ia oloa sa aofia ai totonu o poloaiga faatonutonu o tau o oloa.

Mo le silagfia e le mamalu o le Palemene o aiaiga o le Tulafono faiga faatauvaga ma le puipuiga o tagata fai faatau 2016 faatoa mafai lava ona toe faia le poloaiga faatonutonu o le tau o oloa, pe afai ua maea se iloiloga toto'a o le Komiti mo faiga faatauvaga. Ma ua faamaonia ai foi o lo o i ai se aafiaga ma e ono faaitiitia ai faiga faatauvaga mo ni oloa o maketi o fefaatauaiga.

O le mea moni lava lau Afioga e le o iai se aafiaga tele o faiga faatauvaga i le taimi lenei. O le tele lava o faasea o lo o tuuina mai e faatatau lava i le siitia o tau o oloa o lo o auina mai fafo, e mafua mai ona o tulaga aoaotetele o lo o aafia ai le lalolagi atoa. E tusa ai ma le faamaumauga o lipoti o asiasiga sa faatino e le Matagaluega mai ia Tesema 2022 ma Ianuari 2023 faapea se asiasiga faaauau e faioloa o le atunuu atoa i Upolu ma Savaii o loo faamaonia ai le siitia o le tau o oloa i lenei vaitau faatusa atu i vaitaimi e lei aafia le laloagi ma Samoa i nei faamai tetele.

E le gata i lea o lea foi ua lagalagala finagalo o sui mamalu o le Palemene i lenei fonotaga ua maea, faapea lenei fonotaga e faatatau lava i lenei mataupu ma ua alagatatau ai loa ona faia se fuafuaga talafeagai ina ia fesoasoani ai lenei mataupu mo le agai atu i le lumanai. E i ai le talitonuga e ui lava i le tele o laasaga e tatau ona faatino mo lea faamoemoe a o lea ua iai ia fuafuaga a au nei o le Minisita ma lau Matagaluega e tapena se poloaiga faatonutonu i le tau o oloa 2023 - general price order 2023 ina ia mataituina ai le siitia le tau o oloa nei ma le luamanai.

E fiafia foi e faailoa atu o le taimi lenei o lo o galulue le Matagaluega o Pisini Alamanuia ma Leipa ma le Komisi Faiga Faatauvaga a le Ofisa o le Loia Sili e tau soalaupule nai nisi vaega laiti o totoe ina ia faamautinoa ai le sologa lelei o lenei poloaiga i lona tulaga aoao tetele. Lau Afioga i le Fofoga Fetalai ma le mamalu o le Palemene o soo se poloaiga lava e faatino e ao

lava ona faamaonia e Le Ao Mamalu o le tatou Malo, e tauala mai i fautuaga a le Kapaneta pe a maea iloiloga ma Lipoti a le Komisi ma faiga faatauvaga ma le Matagaluega. O le a faamaea tapenaga uma o lenei poloaiga i se taimi vave lava lau Afioga.

Lau Afioga i le Fofoga Fetalai ae ou te le i see ese ma le mataupu lenei, e ao lava ona ou faailoa atu lenei vaega taua lava e fesoasoani atili ai mo le faamaninoina o lenei mataupu. O le taugata o le tau o le soifuaga i lenei vaitau, e leo po se lilo i sui o le Palemene ae le gata i lea o le mamalu o le atunu u e afua mai ona o vaega nei.

Faamai o le Koviti lau Afioga i le Fofoga Fetalai. O le tele o oloa taumafa o lo o tatou faaaogaina e faamoemoe iai o oloa auina mai fafo. O Samoa o se atunu u lotolotoi i totonu o le Vasa Pasefika e fai le mamao mai isi atunu u, so, e fai a la si tauagata lau Afioga i lalo o vaa oloa. Taofi poo le faaitiitia o femalagaina o vaa lau oloa ona o taua ma fevaevaeaiga. O taua foi ma feeseseseaiga a isi atunu u tetele o le lalolagi ae aafia atu ai ma tatou i Samoa nei. Mo le silafia ma le mamalu o le Palemene ua taugata le soifuaga e le na o Samoa o lo o aafia ai i ia tulaga uma o lo o aafia ai le lalolagi atoa.

Lau Afioga i le Fofoga Fetalai ma le mamalu o le Palemene e manatu ai o lena ua manino nisi vaega e pei ona fesiliglia e sui mamalu. O le tulai mai o le Faigamalo a le FAST o lea ua tapena lelei ai vaega nei e fesoasoani ai mo lenei lava faafitauli. O le poloketi o le \$1 miliona tala o le a fesoasoani tele mo aiga, le atunu u, atinae faatoaga ma alamanuia. O le polokalame o le uluui seleselelega o loo taulamua ai nei le Matagaluega o Faatoaga lau Afioga. Faamalosia pea le faaaogaina pea o taumafa o loo maua i o tatou laufanua ma le sami ina ia foia ai le soona faaalu o tupe lau Afioga.

O le faaaauauina pea o le faatinoina o le polokalame mo galuega faavaitaimi, o lo o i ai lava le agaga ina ia faaaauau pea lea polokalame aua ia tupe maua o lo o maua mai i Samoa. O lo o faaaauauaina foi polokalame fesoasoani a le tatou Malo po o le tatou PSO Grant lea mo Pisini Tumaoti, ma o le Aso Gafua na tea nei o Iuni na faasafua atu ai vaegatupe mo Faalapotopotoga Tumaoti e 10 i le atunu u aofia ai le Chamber of Commerce, SAME ma isi. O lo o i ai foi siitaga o le vaega o tupe mo lenei polokalame mo le Tausaga Faaletupe 2023/2024.

Ae le gata i lea sa faamatuu atu foi fesoasoani mo Asosi mo Tagata Faigaluega i le atunu u ma e lima Asosi na faamanuia i lenei fesoasoani, e aofia ai le PSA, Workers Congress, Medical Association, ma isi. O lo o i ai foi vaegatupe o loo faagaaga e fesoasoani ai mo pisini laiti ma o loo faatino ma faafoeina le fesoasoani e le Ofisa o loo nafa ma lea tulaga po o le tatou Business Hub.

O lea foi ua faatulaga atu e le tatou faigamalo le siitaga mo tagata faigaluega, ia o lena ua totonu i le tala o le tupe lea faamoemoe. O le a toe iloiloina le Tulafono o Faiga Faatauvaga i se taimi vave ina ia faafaigofie ma tuuina ai totonu vaega ma fai ai ona aiaia ai ia toe iloiloina faatino

poloiga faatonutonu pea tutupu mai ni faalavelave faafuasei. O le a galulue uma Matagaluega fesootai ma auaunaga a le MCIL ina ia sologa lelei lenei faamoemoe o le agai atu i le lumana'i.

Lau Afioga i le Fofoga Fetalai ona ou see mai lea i eelele o le tatou Malo i lalo o le Samoa Land Corporation. Ona ou liliu mai mai lea i nisi o fesili a sui usufono mamalu.

**Susuga Maulolo Tavita Amosa:** Lau Afioga i le Fofoga Fetalai pe maua se avanoa faamolemole lava.

**FOFOGA FETALAI:** Ia malie lava lau Afioga i le Minisita se i tulai mai le sui usufono mo Sagaga 2. O se mataupu sa e laga?

**Susuga Maulolo Tavita Amosa:** Lau Afioga o lea lava.

**FOFOGA FETALAI:** Ia saunoa.

**Susuga Maulolo Tavita Amosa:** Faafetai ua manino ma malamalamalama tulaga o le siitia o le tau o le soifuaga ma e le fesiliglia lea tulaga, sao lelei lava le saunoaga. Ua faafofoga foi le Palemene nei ma Samoa i a outou fuafuaga mo le fesoasoani i le faamamaavega malo faafetai. E pau a le mea lea sa ou toe tulai atu ai ona sa ou laga tulaga foi lea i se faamamaavega vave mo le taimi lenei, temporary seia oo i le ituaso e fua mai ai tatou atinae ia o le \$1 miliona tala. O lea sa avatu ai se fautuaga pe mafai lava ona tau subsidies ane lava ia tiute o basic full items o nai mea ia e faaaoga mo le soifua maloloina o le fanau, pepe ma mea faapena ina ia mafai ai ona talafeauga ma le tatou PDS - Priority 1 mo le faamamaavega e fesoasoani i le limavaivai ma le leai ni mea e tua ai le mativa, o le upu lea e faaaoga mai i i se i tulou. Ia e pei o le mea lea ua soso atu ai o le tatou galuega o le tatou vaa e alo faatasi. E avatu ai se tuualalo foi i tulaga faapea leaga o taiala ua uma ona mamanu mai e le tatou faigamalo ma le faaaloalo lava.

**FOFOGA FETALAI:** Ia se i tulai mai lau Afioga i le Minisita.

**Tofa Hon LEATINUU WAYNE SOOIALO:** Faafetai lava i le sui usufono foi o Sagaga 2 ua saunoa i le tulaga lea. O lea ua faamauina lau Afioga o subsidies e le o se mataupu faigofie lau Afioga ona e tele ona aafiaga e tatau ona i ai, a o le agaga o le manatu ua tuu mai ia masalo e tilotilo iai le tatou Faigamalo i se taimi po o a ia ituaiga commodities e mafai ona aafia i le tulaga lea, po o se aafiaga foi o le tatou tupe maua o le a oo iai.

Ae ua faamauina lau Afioga le tulaga lea e manaia le finagalo ua aumai, ae le na o le matou Matagaluega e tagai ai i tulaga ia ona o loo aafia ai le

aotelega o le tatou tupe maua, ae le gata i ina, ia e tele Matagaluega o loo aafia ai ae faafetai lava mo le finagalo ua aumai.

Ona ou oo mai lea i eleele o le Malo, mo le silafia e le tatou Palemene nei le tulaga ua i ai le tatou SLC poo eleele o le tatou Malo. E ova atu ma le 3 afe latou o loo manaomia ni fanua e nonofo ai. O lo o iai ia lisi faatalitali mo i latou e fia maua ni fanua aepeitai e iai i latou o lo o nonofo i ni fanua e tai 100 eka, 150 eka, 80, 50 ua nonofo ai a na o latou ae faatoa na o le tamai pito ae pau a le mea e mananao ai o le nonofo i le fanua. O lea foi ua uma ona fai se fuafuaga ma faatonuina le tatou Matagaluega ia toe tilotilo i lease agreement nei ua uma ona fai po o faaaogaina fanua pe leai, ae a faapea e leai ua tatau ona toe aumai ma toe vaevae atu mo i latou o loo manaomia. E toatele latou o loo mananao i fanua ua nao le nonofo ai i fanua ae le o mafai ona latou faatoa atoa le fanua. O le agaga lava lea o le tatou Malo ina ia tofutofusia tagata ma sina fanua e nonofo ai.

A o le faigata e le faaaaoga ae a fa iatu e toe faafoi mai ua faaali mai uiga le lelei foi ona o le tulaga e le mananao lava e tuu mai fanua nei i tulaga ia.

Ia o le talosaga a Vaimauga 1, o lea e le o alaala mai si ou uso i i a o le a fai atu pea. O le tulaga ua iai le taimi lenei o lo o ua tuuina atu e le tatou vaega lea eleele e 150 eka mo Letogo, 150 eka mo Vailele, e vaevae ai e le itumalo poo alalafaga ia, ina ia mafai uma ona tofu le tagata ma si ana fanua e nofo ai .

O lo o i ai foi ia Komiti o Fanua ia i latou o lo o i ai a o le popolega lea e i ai, a sui loa le Komiti o Fanua ua ese foi le latou aiaiga ia toe o atu foi laia toe sui. O i i mea ia lea sa maua ai fanua ia ua faatau tai 3 tai 4 e tagata. Ae ou te talitonu o lea e malamalama ai le Afioga i le Sui o Vaimauga 1 i le tulaga lea. O lo o manao mai ina ia pau i lalo le tau o le fanua lea \$35 afe i fanua ia o freehold lea ua liliu faasamoia i le taimi lenei ona tumau ai lea o le tau e \$35 afe. E le mafai ona toe pau i lalo aua o le valuation o fanua nei ou te iloa ua tatau ona oo i le tai 100 afe ae o lea o lo o avatu lava ina ia mafai ai ona nonofo latou i le na tulaga i fanua o lo o iai.

Sa laga foi e le sui o Faleata 4, le Tofa ia Ale Vena faapea foi ma le sui mamalu o Vaimauga 1 le tulaga o loo taoto ai matapu fanua faaliliuina faaleaganuu. Ona o atugaluga ua tulai mai, e iai nisi ua maea ona totogi mai nisi o fanua i le SLC ae o atu i le MNRE e le mafai ona resitalaina ona o lo o faapea mai o Fanua o Freehold Land. Ae o le a avatu sina faamalamalamaga i le tulaga lea lau Afioga, ae se i ou toe foi a i tua ia Vailele ma Letogo ua leva ona vaevae fanua o lo o faatali mai foi le Matagaluega o le SLC e o atu e saini ia mea o lease agreement.

E oo mai i le taimi lenei o la ua nofoia ae le o atu e saini, ona o lo o i ai le tulaga lena e faapea se i taumafai pea e fai ia aiaiga poo a nisi aiaiga fou e mafai ona iai. A o le mea foi e tatau ona iai a faapea e tatau ona tuuavanoa i ai a le sainia ia tatou lease agreement ua tatau ona aumai ia eleele ia mo nisi o i latou. Mo le silafia le faagaoioiga o fanua o le tulaga lenei e afua mai i le

faaiuga a le Kapaneta i le FK0742 i le aso 7 Novema 2007. Lau Afioga i le sui usufono mammalu ua leva ona fai le Tulafono lea. O le auga o lenei faaiuga a le Kapaneta ia faamatuu atu fanua i tuutuuga faapitoa ina ia matua le mafai ai ona toe faatauina pe alienate a tatou fanua ia. O lenei faiga faavae e puipuia ai latou e vaivai ma le latou tamaoaiga. O le talitonuga lena na iai i lena vaitaimi lau Afioga. Sa faatonuina ai e le Kapaneta i lena vaitaimi le Loia Sili i lena foi vaitau e silasila i se Tulafono talafeagai e faamatuu ai fanua e avea ma fanua faaleaganuu ma ia faia ni teuteuga talafeagai e atagia ai le faaiuga a le Kapaneta. Mo le silafia e lau Afioga, o eleele ia ua faatauina o Fanua Faaleaganuu ua teuteuina ai Fuaiupu 8 o le Tulafono o Fanua ma Suafa i le 1981 ina ia faaofiina i ai i le tuanai o le parakalafa ia, ia lea ua mafai ai ona fai le Tulafono lea lau Afioga.

**Tofa Ale Vena Ale:** Lau Afioga i le Fofoga Fetalai...

**FOFOGA FETALAI:** Ia malie lau Afioga i le Minisita se i tuu atu le avanoa i le sui usufono o Faleata Nu 04.

**Tofa Ale Vena Ale:** Faafetai lau Afioga i le Fofoga Fetalai, e pei o le itu tonu a lea sa ou laga ai le mataupu lea. Ae faafetai lau Afioga i le Minisita o lea faatoa ou mautinoa nei o lea na fai le Tulafono. E faapefea na fai lenei Tulafono e liliu le fanua freehold e avea ma Fanua Faaleaganuu? O le atugaluga lena e pei ona ou momoli atu i lau Afioga ma le Minisita foi o le... ona o Fanua tonu ia o lea e tuuina atu i lou Nuu. O le matua taufaavalea a o le Tulafono lea. O le matuai taufaavalea a. E faafetai na fai ia ituaiga Tulafono faapenei ua matua solia ai le Tulafono Faavae, our constitution e le mafai ona faa-Samoa se Fanua Faapapalagi le mafai not hand. E faapefea ona pasia lea ituaiga Tulafono faapenei lau Afioga i le Tamaitai Palemia ma le Kapaneta? E faapefea ona fai? E matua solitulafonon a nei mea e fai. A o le mea ou te ofo ai, o lea e saofafai mai foi i i vaega uma ia sa i ai i le faiga o le Tulafono lea.

Lau Afioga i le Tamaitai Palemia ma le Kapaneta toe silasila lelei i le mataupu lea, e le faavalea e se isi le Nuu lenei o Toamua ma le Itumalo lenei o Faleata. E faapefea ona aumai le faaleaganuu ia lea ua uma ona totogi fanua ae o atu i le MNRE ae fai mai le MNRE, e le mafai ona resitala. Ae afai foi la ua fai faaleaganuu, e faapefea la ona fai aua leaga o le fanua faaleaganuu e pule ai Matai. E tatau ona ave le pule o lou fanua lea, pule oe Simi ma Seve ma ga.

Lau Afioga i le Minisita, lau Afioga i le Tamaitai Palemia ou te tatalo atu ma lou faaaloalo lava i le mataupu lea. E le fetau le mataupu lea e le talafeagai ma le auala lea ua tuuina atu ai mo lou Nuu ma lou Itumalo. Silasila i ai le Malo po o le a afai e tatau ona repeal le Tulafono lea e tatau

ona fai lau Afioga ma le faaaloalo lava. E soli Faavae le Tulafono lea. ma lou faaaloalo tele.

**FOFOGA FETALAI:** Lau Afioga i le Minisita.

**Tofa Hon LEATINUU WAYNE SOOIALO:** E faamalulu atu i lau Afioga i le Igoamatua e saolele lava oe, ae peitai ua uma ona sui le Tulafono, ua uma ona toe teuteu le Tulafono. Matou te le i teuteua, na teuteu i le 2007, lea la e i ai i le taimi lenei. Ae foliga mai la ua 16 tausaga lau Afioga talu ona uma ona teuteu le Tulafono. O lea la e faamalulu atu ai lau Afioga po o le a foi se finagalo ua aumai i ina lena itu ae taatia mai lou fanoga ua aumai lenei taimi . A fua foi la i ai i le tulaga ua oo iai ma le tau lea faatau atu ai ia outou e tai \$35 afe tala.

A tatou toe foi loa la i le freehold pe a faapea o le tulaga lea e i ai, o lona uiga e tatau ona malilie le tou Itumalo, faatau tai \$100 afe na ona fai atu faapena ae le mafai ona ou faapea atu o le a sui i le taimi lenei.

**Tofa Ale Vena Ale:** Lau Afioga i le Fofoga Fetalai...

**FOFOGA FETALAI:** Ia e i ai se isi mea o totoe lau Afioga i le sui usufono mamalu mo Faleata 4. Lea ua aumai lau fautuaga e sui le Tulafono e i ai se isi mea?

**Tofa Ale Vena Ale:** E leai, o le itu lea ou te fia soso atu ai ma le faaaloalo tele, aua e le toe i ai se taimi e toe fai atu ai se tala i le mataupu lea. Ioe. A o le agaga moni o lea ua fai mai ua i ai le Tulafono. O lea la ua matua fesiligia a e lou sui a faipule le faiga o le Tulafono lea. E faapefea na fai le Tulafono lea ua liliu ai le fanua freehold i se fanua faaleaganuu? Lau Afioga i le Tamaitai Palemia ma le Kapaneta how can it be? Aua o lea ua e faapena mai nei ou aao ao o oe o le cure, the Government of the Day. Ioe. Afai ua sese le mea lea, a ua sala uta faatonu tai. O le agaga lena o le sui usufono ou te manao i ni mea e faamaoni ona fai e aumai i le nuu lenei, aua ne i tauoleole mai faapena. A o lena foi mea fai mai e toe sii le value i luga, ae tuu e a? Ae fai le amiontonu po o le a le mea e tatau ona i ai, freehold of customary land? Faafetai.

**FOFOGA FETALAI:** Ia, se i tulai mai le Minisita o Galuega Tetele.

**Tofa Hon Olo Fiti Vaai Afo:** Lau Afioga i le Fofoga Fetalai, toetiti a lavelavea ifo fofoga o nai la toeaiina i autafa. Ae o lea ou te manatua le teuteuga lea o le Tulafono i le tausaga lea 2007. O fanua ia freehold ia o fanua sa i lalo le WESTEC mai le SLC, ona tatalo foi laia o sui na vaitau i fanua ia o latou faapea sa ave i le taimi o Siamani, ona fai ai lea o le Tulafono

lenei, o le a faatau atu la ia outou i le \$35 afe. A uma ona toe liliu loa lea faa-customary land, aua ne i toe faataua esea fanua.

E pei o le tulaga lena sa fai i le afioaga o Vailele ma le afioaga o Toamua ma Vaitele ae onosai. Olea ua saunoa atu le Minisita o le a i ai se taimi ma ua faamauina lou finagalo.

**Afioga Hon Toeolesulusulu Cedric Pose Salesa Schuster (Minisita o le Punaoa Faalenatura):** Lau Afioga i le Fofoga Fetalai...

**FOFOGA FETALAI:** Ia se i tulai mai le Minisita o le Punaoa Faalenatura ma le Siosiomaga.

**Afioga Hon Toeolesulusulu Cedric Pose Salesa Schuster:** Faafetai lau Afioga i le Fofoga Fetalai. E na ona toe faamanatu atu i le sui o Faleata 4 o lea na avatu se vaivaiga o le Matagaluega o Eleele ma Fuagafanua o latou tonu ia sa resitala i ai lea e i ai le vaega lea saunoa ai le tama. I le taumafai i le faatinoina o lea vaega lea pei o le tasi i i le fanua sa mafai ona resitala ae taofi loa le toe resitalaina ona se i toe silasila ai le Loia Sili i le sao le faaletulafono ma le tatou Constitution e pei ona saunoa ai le tama. O le taimi la lenei lea na avatu ai o lo o faatalanoa le Ofisa o Loia Sili ma le Matagaluega o Eleele i se auala e mafai ai ona faatino ai po o le sao po o le sese o le Tulafono. Ae o lo o faamoemoe ina ia mafai ona vave maua se iuga ona o lea ua toe faamanatu mai e le tama ia Ale.

**FOFOGA FETALAI:** Ia aua laia e te toe popole o lea ua taatia i le Ofisa o le Loia Sili atonu e sao a le mea lea e te finau mai ai.

**Tofa Ale Vena Ale:** Lau Afioga faafetai lava ae toe pau a lenei o lo'u, ua ou taliaina lau afioga i le Minisita o le SLC ma le Minisita o le MNRE o lea foi ua faapenei mai aao o le Tamaitai Palemia meaning foi lele she didn't know ae pe na faapefea na fai ae ui i lea taoto atu. Ae pau a lou concern lea e i ai e le mafai i lo'u talitonuga ona fai se Tulafono e aveesea ai se fanua freehold land, freehold land to become a Customary Land. E manino a le tatou Tulafono Faavae, lea la e ala ai ona ou augani atu i le sese la lea ua fai e le Malo. E tatau ona aumai fua fanua ia. Ia manuia tele la outou faatofalaiga. Faafetai tele i lau Afioga i le Palemia ma le Kapaneta. Soifua manuia.

**FOFOGA FETALAI:** Saunoa mai lau Afioga i le Minisita.

**Tofa Hon LEATINUU WAYNE SOOIALO:** Malo lava le onosai i lau Afioga i le Igoamatua. There are good laws and theres are bad laws. Bad laws lena e i ai outou toatolu lea ua mafua ai ona outou o i le Faamasinoga.

Ae a faapea la o lou silafia e tasi lea Tulafono leaga, ia taatia maia lou finagalo leaga ua uma ona fai le Tulafono ae se i autilotilo i ai mo le agai i luma.

Lau afioga ona faaiu atu ai lea o se faamatalaga ona ou see mai lea i le tulaga lea na fesiliglia e le Afioga i le Taitai o le Itu Agai e uiga i le \$10 miliona e lagolago ai le tatou Budget Support.

Lau afioga i le Fofoga Fetalai ona ou liliu mai lea i le mataupu e i pito sili ona taua, sa fesiliglia ai e le Taitai o le Itu Agai le \$10 miliona a le ACC e lagolago ai mo le Tala o le Tupe. Mo le silafia o le fesoasoani a le ACC e \$10 miliona i le Malo o lo o faia lava e tusa mai aiaiga o lana Tulafono e faamatuu se fesoasoani pe a manaomia e le Malo. E le'o o se uluai taimi foi lea ua faatino ai lenei fesoasoani e tusa ia ma le Mataupu 71 o le Tulafono 1989 a le ACC. Na faatinoina mumua foi ina ua manaomia e le Malo se fesoasoani o le budget support mo le isi atinae e pei o le National ID lea na tufa ai le tai \$50. Ia e eseese mai la ma le Tulafono a le SIFA lea o lo o aumai ai ona o lo o i lalo o le latou Tulafono le tupe lea, ae o le tulaga la lea na talosaga i ai ina ia aumai se latou fesoasoani e tai pei lava o le National ID lea na tufa. Ae o le faalavelave o le tulaga lea ua i ai o lea ua ave ma tatou tagata faigaluega aua foi le siitiaga o latou totogi.

Ae pei o le faafesili a lau afioga pe faapefea isi oloo tipi latou... ia se i oo atu foi i lena taimi fai se fuafuaga a le ACC po o le a se fesoasoani i lena tulaga. Ae mo le taimi lenei pau lea o le agaga lea ua i ai mo lea faamoemoe.

**Tofa Hon Lauofo Fonotoe Nuafesili Pierre Lauofo:** Ia lau Afioga i le Fofoga Fetalai o se mea fiamalamalama atili.

**FOFOGA FETALAI:** Ia tulai mai lau afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** O le \$10 miliona lea sa ou fesiliglia ona e ese lava le tulaga o le \$10 miliona, aua o le \$10 miliona o le tupe lava na tipi mai totogi o tagata faigaluega e ala mai lea i le levy ACC 1% a o lea o le a ave e toe fai ai latou siitaga. O le mafuaaga lena, e le pei o isi siitaga ua tuanai sa aumai lava i lalo o tupe maua foi ia masani a le Malo i lalo o revenue collection masani a le Malo sa gafatia ae o le tupe la lea e sao, ae e pei o lea e matau atu o le a ave e totogi ai le siitaga pe faatupe le siitaga, ae pei lava ona ou fai atu e maimau pe ana faapea e ave ai a o le faalavelave e avatu ae toe tipi mai foi 1% pe a fai latou totogi e toe faafoi i le ACC.

O le uiga lena o le fesili ina ia... aua e tatau ona fai e manaomia e le aufaigaluega siitaga e lagolagoina foi e lou sui. E mafua ona ou fesili pe o atoa la le 10% aua manatua a ua sii foi i luga le 1% lea e toe faafoi a o isi vaega foi lea o isi Kamupani, o isi tagata faigaluega o lo o galulue i le Private Sector ae manatua foi lau Afioga la foi e tipi mai latou 1% e ave i totonu o

le ACC. O lea foi la e i ai ma latou tupe i totonu i o i le \$10 miliona lea ma isi tupe. O lea la e mafua ai ona ou fesili po o i ai la se fuafuaga mo se fesoasoani mo nai na foi tagata faigaluega pe leai. Ia e pei o le faafesili lea ma le faaaloalo i lau Afioga.

**FOFOGA FETALAI:** Ia tulai mai lau Afioga i le Minisita.

**Tofa Hon LEATINUU WAYNE SOOIALO:** Faafetai lava i lau Afioga. Ia e pei foi ona e silafia o lo o tipi mai lalo o le Tulafono. A aumai la i lalo o le Tulafono ua aumai i i ave i le ACC tuu i totonu o le Tulafono a le ACC mo le faagaoioina lea i le finagalo e finagalo i ai le Malo i lea taimi ma lea taimi. E pei foi ona e silafia lau afioga i tulaga o tupe ia e faatulafono a le tatou Malo ia e aumai lava e fai ai fuafuaga a le Malo pe a manaomia. Ae mo isi tulaga ia, ae taatia mai lou finagalo seja i ai se taimi ona tatou oo lea i lea tulaga ae le o iai se fuafuaga faapena. O lo o iai foi se fuafuaga o loo faatalanoaina e le tatou Matagaluega i le taimi lenei mo se medical insurance mo tagata faigaluega uma lava. Ia ne i te i ua ou vave fai atu ae se i oo i lena taimi ona faatino lea o le tulaga lea.

Lau afioga i le Fofoga Fetalai e manatu ua maea ai i ia nei mataupu sa laga mai e sui mamalu o le Fono Aoao Faitulafono. Ae momoli atu le agaga o le faafetai i la outou faamaite e ala i fingalo faaalia aemaise foi o ni fesili e faatupu manatu ai le Malo aemaise le matou vaega o le atinae o Pisinisi, Alamanua ma Leipa ma Faalapotopotoga a le Malo.

Ia o lenei itula e momoli atu ai le faafetai tele i le matou Matagaluega i ai latou uma o faauluulu i ai le Matagaluega ma le aufaigaluega. Faafetai mo le galuega punouai lea ua iu ai ma le manuia fuafuaga a le tatou faigamalo. I lenei vaitaimi e momoli atu foi le faafetai tele i lau Sui Minisita Lagolago ia Palauli aemaise foi Sagaga mo le fesoasoani mai foi i le galuega ua faatinoina i lenei aso.

A o lenei itula ia se i liliu atu lau Afioga i si o matou itumalo o Faleata 2. Ia si ou nuu o Vailoa, ia tulouna le Faiga, ia lau Tofa Nuu ma Leatinuu, aemaise foi Siliga ma Umusaisiliga. E le galo foi ia te au le matou nuu i Vaigaga ma Vaiusu, malo lava le faatoatoa malo le tapuai. Susu mai Seiuli le Alo o le Malietoa faapea le Falefia o Alii e pola puipui foi e Ulugia ma Ulugia, aemaise foi le mamalu o le tatou nuu i tua, e le o aafia i tulaga o faiganuu, ia tai pei o Tulaele, Talimatau, Siusega, Falelauniu ia faasolo atu ai ma Elise Fou, ia mai latou e oo atu i Tapatapao, faamalo lava le tapuai mai, ia lenei ua iu ma le manuia le tatou lauga, ae talitonu te feiloai i se taimi. Ia o ifo taeao e tatala le tatou ofisa o le tatou itumalo, e toe tatala lea ua ma talanoa ma le Afioga i le Minisita, ia masalo o se aso o lenei vaiaso e maua atu ai le tatou \$425 toe faasolo loa lea i tua isi polokalame o le tatou itumalo. E momoli atu ai le faafetai tele i lau Afioga le Fofoga Fetalai, lau Afioga i

le Tamaitai Palemia, ia afifio foi lena itu aemaise le mamalu o Minisita, aemaise foi le tapuaiga a le tatou atunuu, ia viia le Atua. Soifua.

**FOFOGA FETALAI:** Ua faamalo saunoa faafetai foi lau Afioga i le Minisita o Pisinisi Alamanuia ma Leipa e tusa ai foi ma le talifuaitau i nisi foi o mataupu sa laga e sui usufono mamalu o le Maota. Malo a faafetai o lea foi ua manino mea sa faanenefu foi i sui usufono mamalu, ia lea ua e saunoa ma faailoa. Malo a galulue, faafetai foi mo le faasoa.

Ia ua oo mai i lau Afioga i le Minisita o Galuega Tetele ma malae vaalele, o vaa, ia, so o se ituaiga transport ia, lau Afioga Honorable Olo.

**Tofa Hon OLO FITI AFOA VAAI:** E faafetai atu i lau Afioga i le Fofoga Fetalai ua maua se matou avanoa. Ia e muamua lava ona ou faatalofa atu i lau Afioga i lenei taeao na liugalua, ia faamalo foi le folau, ia faamalo le pale ma le onosai foi. E maitauina lava e fai pitotasi lava lena itu o lau pitolaau, ae avatu lava lau faamalo i lou lava onosai i aga foi a le tatou Palestene aemaise le Taitai o le Itu Agai.

Ou te faatalofa atu foi i lau Afioga i le Tamaitai Palemia, lau Afioga i le Sui Palestene faapea le paia o le Kabeneta ma Sui Minisita, e faapena foi lau Afioga si ou uso o le Taitai o le Itu Agai ia, ma sui usufono mamalu o le tatou Palestene. E ui ina matou vaavaai atu ua fai se malologa a nisi o lena itu ae le afaina, a i ai lava Tanuvasa ua atoa Aana. Ia, e faapena foi ona ou faatalofa atu lau Afioga le Failautusi, le mamalu o le tatou Palestene faapea foi lau Afioga i le Sui Failautusi.

Le paia maualuga o Ofisa Sili o Pulega o Matagaluega a le tatou Malo faapea Pulega Tumaoti, ia ae a le aufaipisini a le tatou atunuu o lo o tautua foi, aua le tamaoaiga o si o tatou atunuu.

E faapea foi ona oo atu lou faatalofa ma lau faamalo i le tapuaiga a Samoa i ou itu taulagi ia faapea foi ou itu faalupea o lo o taoto ai outou paia ma outou mamalu, e le mafai ona toesea, aua o le vao filifili ma le upega e lavelave e talagata i se matou tala.

O lenei taeao na liugalua lau Afioga i le Fofoga Fetalai ia ua agai foi ina faliu le la i lona tauafiafi. E i ai le taofi ua taufai paea le matila ma le ofeloa, aua ua tatou molimau faatasi lona mamalu ma le matagoie o le Atua, ia lele ua sausaufialele ai le manu nai Utufiu, aua o lea ua tatou fesilafai pea i le magafetau o le soifua manuia i aao agalelei o le tatou Matai Silisilise.

Lau Afioga le Fofoga Fetalai, e maitau lava ma le totoa i aga o fetufagaagaiga o le tofa ma le faautautaga a le tatou Maota i lenei fonotaga. E moni ai le Tusi a i ai Iesu i se aiga, ia o se aiga fiafia. E fia faaleoina ai le agaga o le faafetai tele, faamalo, faamalo saunoa, ua taliga e fialogo fetalaga ma le tofa sasaa i a outou Afioga i sui usufono o le Maota nei. O le upu moni lava i se lagona, ua liliu matagivale alu togi matagilelei, aumai, avatu so matou lagona, ia ma taoto lagatonu ai a tatou faiga filifiliga, i lenei fonotaga.

I le agaga fiafia lau Afioga le Fofoga Fatalai, e momoli atu ai le faafetai tele a lenei ituvai o le tatou Malo, ia po o lenei o vaega o Galuega, Felauaiga ma Atinae Tetele a le tatou Malo, mai lava le toootoomua o le tatou Maota, a o le faafetai ma le faamalo mai i se auauna le tau ma se tautua le atoatoa a lenei aiga. Afai lava ua faamalieina se auaunaga faatauvaa, ia tatou viia le Atua e ona le tomai ma le malosi o lo o mafai ai ona matou tautuaina lo outou mamalu aemaise le paia o le tatou atunu.

E iva itupaepae o lenei aiga, ina ia manino lelei a matou matafaioi lau Afioga le Fofoga Fatalai e agai tonu i ai le mamalu o le atunu pe a manaomia...

Ina ia manino lelei a matou matafaioi lau afioga i le Fofoga Fatalai, e agai tonu i ai le mamalu o le atunu, pe a manaomia se fesoasoani. O le Pulega o Uafu ma Taulaga, o le Pulega o Vaa o Samoa, o le Pulega o le Suavai, o le Pulega o le Malosiaga Faa-Eletise. O le Pulega o Felauaiga i le Laueleele, o le Pulega o Malaevaalele, ma le tatou Kamupani lea o le PFL, Pulega o Auaunaga Tau Vaa ma le Matagaluega e tasi, o le Matagaluega o Galuega, Felauaiga ma Atinae Tetele a le tatou Malo.

E mafua ona ou toe laulauina nei vaega lau afioga i le Fofoga Fatalai, ina ia silafia ai e lo tatou Maota, e tele auaunaga eseese i totonu o lenei vaega ae o lo o tau faasoa se seleni mai lo tatou Malo e faatino ai o tatou manaoga. E le gata foi i lena, ae toatele lava le mamalu o le atunu, e sese atu ia te au i nisi o mataupu e fitoitonu i isi Afioga i Minisita. Ua oo lava foi i nisi o tina, i a latou mataupu faale-ulugalii, ua oo atu foi ia te au i se fesoasoani. A o le mea e laki ai lau afioga i le Fofoga Fatalai, e toalua au Minisita Lagolago, e agavaa uma i laua i ituaiga mataupu nei ona e i ai o latou tomai faapitoa i mea lava ia, i mafatiaga o tina o lea la e tuu ai lava le galuega lea ia i laua la te faia i aso uma, aso uma, aso uma.

Ona ou oo mai lea i mataupu sa faaalia i finagalo o sui usufono sa afea ai lenei aiga. O le upu moni lava lau Afioga i le Fofoga Fatalai ma outou Afioga i sui usufono, ua faamauina uma lava e lenei vaega tulaga o outou manaoga. E faamau au, faamau afioga i Sui Minisita e toalua, faamau au ACEO e toaiva i mataupu lava. Ma e leai lava ma se finagalo faaalia e le taua ia i matou. Ne i alu le po atoa lenei o ou laulauina, a o lea ua faamau mea sa finagalo i ai a outou afioga. O auala, o suavai taumafa, o le eletise ma so o se mea, ne i meaane ua tatou talanoa toe tulai mai se sui usufono ou tali atu ae uma ifo e le mafai ona fai se mea, po o ua le faia foi ona matau lea o le tatou itumalo i se faaiuga ua fai atu. Ae o lea o le a matou savalivali atu lava ma matou vaai, o ai le itumalo e manaomia lava se fesoasoani i se taimi vave, ona faapena lea ona au atu le fesoasoani.

Lau afioga i le Fofoga Fatalai, ona ou oo mai lea, o le a ou amata mai i le Matagaluega o Galuega, Felauaiga ma Atinae Tetele. I se aotelega o matafaioi ma se auaunaga a lenei aiga, aemaise lava i ni atinae fuafua mamao, faapea foi ni atinae ua mafai ona ausia, i lenei lua tausaga talu ona

matou mafuta mai. O lena ua outou molimauina ua maea ona launch le matou Sector plan. O lo o faamauina uma ai ia fuafuaga mamao a Pulega taitasi uma lava e iva a lenei vaega. Aua le uunaia pea o le atinae o le tatou Malo mo le isi lima tausaga. E fia faaleo se auaunaga vaivai a lenei aiga lau afioga i le Fofoga Fetalai, o lo o faatino ai so matou sao i le Tala Faatatau o le Tupe lenei.

E le gata i lenei foi Tala o le Tupe, ae o tausaga uma. A matau le Maota faapea foi le tapuaiga a lo tatou atunu, e feololo lava ni a matou taumafaiga. E le gata i le faaauau pea o atinae ma galuega tetele, e pei ona outou molimauina. Ae faapea foi ona tau saili ni a matou tupe faaopoopo e faatupe ai le Tala o le Tupe lenei.

O nisi la o vaega, ona tou te le o silasila atu i nisi o auaunaga i aso uma ma taimi uma a lo tatou Kamupani Vaa. Ia tele lava a tatou togipau o le tatou vaa ua i ai nei, o Tutuila, o Tokelau, a o lea ua i ai ma le isi mea fou lea, o Rarotonga.

Lau afioga i le Fofoga Fetalai, e uma lenei Fonotaga, ou avatu se talosaga i le Palemia ma le Kapaneta, ou te malaga atu ai i Rarotonga o le a saini ai le tatou feagaiga e faatino ai le tatou auaunaga lea a lo tatou vaa, e service ai ia motu ia a Cook Island e lima pe ono, i lo latou fofoga taumafa, o le vai ma nisi mea e manaomia. E pei o le mea lena sa talosaga mai ai le afioga i le sui Palemia o Rarotonga, lea na malaga mai i le Sisigafua ma ma talanoa ai i le vaega lena.

E talitonu e tasi lena, o nisi foi o tupe fou o le a tatou maua, o le tatou service lea. E pei ona ou talanoa atu ai i le tausaga ua mavae, lea sa tulituli matagau lava le tulaga lena. Ua outou silafia foi le tele o tatou vaa meli ua agai mai i totonu o le tatou atunu. Sa toe fetuunai lava a tatou fees ma le talitonuga, o le a pue mai e le tourism ma nisi o lala a lo tatou Malo ia nisi tupe e faaopoopo i ai.

O le isi tulaga, o lea ua faamatuu atu nisi o laisene o Kamupani vaalele fou. O le tausaga na tea nei, o Ausetalia ma Quanta's, ia o lena foi ua outou silafia, ua faigofie ia femalagaaiga a tatou tagata mai Ausetalia. Ua tuu atu foi le laisene i le Fijian Airways e lele sao atu ai i inei i Honolulu. Aua foi ia tatou tagata o lo o papaaao i Amerika. E taunu mai le tatou Faigamalo lenei lau afioga i le Fofoga Fetalai, e na o le lua lava Kamupani vaalele sa i ai. E na o le Air New Zealand ma le Fiji Airways. A o le taimi lena o lo o sii gasegase pea le tatou Samoa Air Ways. O le taimi la lenei lau afioga, ua fa a tatou kamupani vaalele, o le Air New Zealand, Fiji Airways, Quantas ma le Virgin. A o lea foi ua faagasolo ia le laisene o le vaa lea mai Saina, lea na malaga mai ana Charter flights. Ma ua tatalo mai, e fia maua ni latou laisene e fai ai a latou commercial flights. Ma schedule mai taimi e faatulagaina ai a latou faigamalaga.

O le tulaga lea ua i ai, ua tau faaumiumi, e masalo po o le iva i le sefulu vaalele a lea kamupani, ua aumai uma specification i le tatou MWTI. Ina ia

lesitala uma ma faamau ituaiga vaa uma ia, ina ia a faapea e faaletonu se vaa se tasi, a ia continue le latou service. Ma o se tulaga lelei foi, aua e tofu uma lava le sefulu lea, ma latou fees, ma maua ai nisi tupe a lo tatou Malo.

Ona ou oo mai lea i le isi vaega o lo o gafa nei ma le tatou Matagaluega, o le poloketi a le waterfront. O lea e faafoe e le tatou Matagaluega le tulaga lea. O le tele foi o la ua uma ona faatino le Fiafia Parks, ae o lea foi e mataitu le tulaga o le tatou maketi fou i Savalalo, e pei ona nafa ma le afioga i le Minisita o SLC.

O le Alaoa dam, ua i ai le faamoemoe e oo atu ia Oketopa ua faasolo ia tauofoga o lea atinae taua. O lenei atinae, mo le silafia foi, o lo o taiulu ai le Ofisa Sili o Pulega o le Matagaluega. Ma e i ai le taofi, o le a matua lava le tatou supply mo Upolu i Matu po o i inei i Apia ma faasolo atu i Sisifo ma Sasae pe a oo ina faamautu le atinae lenei. E maua ai foi ma sina fasi eletise i ina e le tele. Ae pei o le auga o le faamoemoe, o le taumafai lava e puiupui o tatou aiga i le talafatai o Apia i tafatafa o le vaitafe lea. Ae toe maua ai ma le tatou suavai e store i luga i Alaoa, e faasafua mai mo le mamalu o le tatou atunuu.

O le isi vaega ou te fia tautala i ai, o le vaega lea o tamaitai ua galulue faainisinia i totoru o lenei aiga. O le Vaega lenei o Galuega, Felauaiga ma Atinae Tetele, ua matua faatupulaia le numera o tamaitai inisinia. E masalo o lau tau matau i le taimi nei, ua ova ma le onosefulu tamaitai i le Sector atoa e i ai le tomai inisinia. Ma o ituaiga galuega ia, e sea sea galulue ai tamaitai. Ae lagona le lagona fiafia, aua ua ese foi lagona finau ua oo i le itupa o tamaitai, i le latou faatinoina o galuega faapitoa. E sea sea se tamaitai ona outou silasila i ai, vatubu le paia o le Maota, e agai mai ma sona ovalola ma ona boots e faigaluega ai, e tele lava i seevae muliumumi. Ae a tau ni tamaitai aulelei i totoru o le Malo lenei, o inisinia i totoru o le vaega lenei. O le fomu ia, ia latou toniga lena.

E pei o le agaga lena e faafetai tele atu ai, i nei alo tamaitai o le tatou atunuu, ma lo latou sao taua i le tele o taimi ma a latou galuega.

Ona ou oo mai lea i le Pulega o Suavai. Ua faapena foi ona matou faamaumauina uma lava, ia finagalo sa faaalia, ma talosaga e pei ona tuuina mai. O tatou galuega o lo o faagasoalua nei, a ou matau atu, i le na o le lima talosaga a itumalo, o lo o fia faalelei a latou suavai taumafa. E lima mai le limasefulutasi itumalo, o ataata ia o Taulelei, ua tele ina faasopolia uma le atunuu i le auaunaga a le Pulega o le Suavai. E faatasai ai foi ma le lagolagosua a isi foi vaega o le tatou atunuu i vai tumaoti, ma nisi foi Faalapotopotoga, e pei o le BAT. O lo o faapea foi ona latou faia le auaunaga lea, e fesoasoani atu ai i nisi o alalafaga o lo o fia maua le suavai.

E ui lava lau afioga i le Fofoga Fetalai, e mate le suavai i nisi taimi ona o vaitau mugala. Ae ua tatou molimaumauina faatasai le gasolosolo lelei o faatinoga o galuega a le Pulega. Aemaise lava i le taimi lenei, o lo o fausia lava le

infrastructure ma mautu lelei ia le faataotoga o paipa i tafaala ia e faasoai le suavai i tua o aiga.

E tele ia nisi polokalame fou lau Afioga i le Fofoga Fatalai ou te oo atu ai i se taimi i le taupueina o le suavai lenei, ae e iai le manatu e faamoemoe lava i le aisiga a lenei Pulega i tatou paaga masani ia e fesoasoani iai tatou i mea tau tupe.

E i ai le taimi sa laga ai le vai lea e i uta i Malololelei i nisi o afioga i Faipule aemaise foi le mamalu o le atunu oloo papaaao i le agai atu i luga i Tiavi. O le taimi nei lau afioga i le Fofoga Fatalai i le atinae lea ua maea ona faataatitia nisi o paipa, amata mai i Malololelei ma le agai mai Tiapapata i aiga fou. Ae tasi lava le mea lea e faatalitali ai le tatou Pulega o Suavai e faatali atu i le tatou Matagaluega o le Siosiomaga ia ma le Pulega o le LTA i le faataotoina ia o tuaoi ao faatino ai le galuega foi lea o le Cross Island Road, e le mafai ona faatino le latou galuega sei mautu lelei mai ia le tulaga lea, ona faataoto lelei mai lea o le latou paipa ona faapena lea ona faaaoga mai le suavai lea.

O le isi itu lau Afioga i le Fofoga Fatalai ia, oloo faamaea o le viliga o le vai i Tafaitoala, e pei ona iai nisi o talosaga ma nisi o Pulenuu na oo atu ia te a'u ia toeititi ona faamaea lea o le galuega nei ona faapena foi lea ona fesoasoani atu i lena itu o le tatou atunu.

I le afioaga o Aleisa e moni ma faaamaoni le saunoaga a le Sui o Sagaga 3, oloo fai se malologa, e ui lava oloo iai le suavai i le taimi lenei i Aleisa, ae o le itu lea e fai si maualuga oloo papaaao ai foi nisi o le mamalu o le atunu ae faapea foi le afioaga o Aleisa, ma e le'o mafai foi e le suavai oloo iai nei ona a'e atu i luga. O le taimi nei o lea ua tapena se tatou booster design e boost ai le vai agai i luga ina ia maua le suavai a nai aiga ia, e pei o se fesoasoani vave lea ia ae faagasolo o nisi o suesuega i punavai i le pito i uta pe talafeagai ma faatanoa aua foi lea itu o le tatou atunu.

O Moamoa Uta i le taimi lenei ia ua uma foi ona iai le tatou borehole i le taimi lenei lea foi ua amata ona faataatia mai tatou paipa i uta ina ia fesootai ma le isi vai agai i tai ia faapena foi ona faaaoga e le mamalu o le tatou atunu aua le taimi o mugala e fesoasoani ai i le suavai.

O Fagamalo foi sa agai mai ai le sui mamalu ua maea ona faatino le survey le tatou pore hole e pei ona saunoa iai le tatou Sui Palemia masalo e le'o toe mamaao ae taunu mai le tatou fund e faatino ai le tatou suavai lea i Lealatele. O le faamoemoe ina ia malosi le suavai e agai e le gata foi la o i Lealatele ae agai atu ma connect faatasi atu ma le tatou vai i Saleaula ona malosi atu lea o le vai i lou Itumalo lau Afioga i le Tiakono Toeaina.

Ia ona oo mai lea i Manase ia o lena toeititi ona maea tuuina atu le suavai mama i Manase lau Afioga i le Tamaitai Faipule, ia e le'o toe mamaao ae faamaeaina lea vaega. E iai laia o se tamai mataupu lea e fia faamalamalama atu ona o le tele o le taimi i lo'u ofisa ia e gasolosolo atu lava le mamalu o le atunu i latou pili foi ua tele le aitalafu ae ua leai nisi sa rent i fale o i latou

e owners, o le tele o na mataupu ao lea lava e feagai maua ma le alii Pule i le tau faiga o se fesoasoani, ao le tulaga lena aemaise lava i mea ia o new connections ia o le tulaga lena faamolemole oloo manino lelei ia tulaga o feagaiga ma tuutuuga oloo tuuina atu e le Pulega o le Suavai, e ao la ona ou te faamanatu atu e na'o le ona le fanua e aumai le faatanaga i le Pulega e faaipii ai se suavai. O le tulaga lena ua tulai mai a lisi ai le tagat i luga o le fanua lena ona omai ai lea o le owner faimai ia lea ua alu ae le totogia le pili 2000.00, 5000.00 o le vai. O le ala tonu la lena, e responsible le owner o le fanua poo le fale e totogia se aitalafu o le suavai.

Ona ou oomai laia i le Pulega o Eletise, e faaletele ni mataupu na laga mai i le Pulega o Eletise o lona uiga foi oloo tumau pea le lelei o galuega faafoe a le tatou Pulega vagana ai nisi o taimi e motusia ai le tatou Eletise ia ona oni galuega fiafaaleleia i tatou poumoli tulou le Maota ia poo le toe suiaina foi o uea malolosi leaga e fai lava ma tasui a tatou uea nei. Lau afioga i le Fofoga Fetalai e leo faamatamala le tatou Pulega oloo tuuina atu pea lava ia faasilasilaga e logoina ai le mamalu o le tatou atunu pe afai e motusia le eletise i se galuega toe fia faaleleia, ae peitai e iai foi le taimi e motusia faafuasei atu ai e aunoa ma se faasilasilaga e faamalulu atu ai i le tatou atunu o lona uiga oni aafiaga le fuafuaina. O le uiga o la'u faamatalaga a le so'a foi e se oga se poumoli ia poo tuuga laau foi ia i autafa o uea eletise i autafa o aiga, e pei o tulaga lava na e le maalofia i le faafogafoga foi a le atunu e mafua ai ona tulai mai le tulaga lea.

O le tatou Smart Meter lea ua uma foi ona ou tali atu i le Afioga i le alii Faipule sa laga lea mataupu, ma e le natia i sa'u faamatalaga oloo feagai pea le Pulega ma faafitauli i Smart Meters. Ua fai si umi o tau faufau mai lea system o smart meters ma oloo faatali pea i le Pulega mo se latou fautuaga. Ae o lau tau autilotilo atu ua tatau nei ona faamalolo manumalo ia Smart Meters. Ua tele le taimi tele tupe a le Pulega oloo faaalu i le System lenei, o se tasi o faaletonu o lea ou te mataua nei i smart meters a faapea nei e blank ua pe le display o le smart meter e alu lava le power a le aiga ae o le cash power na iai e oo loa i le tulaga lena e pe, e disconnect. O lea la e pei la ou te tau autilotilo atu ai e pei o le mea lena o lea e tele ai le matou gau i lenei taimi, ae lafo pea i le matou Pulega e aumai se tou fautuaga ona faapea lea ona fai se fuafuaga.

O le tatou Renewable Energy lea sa laga mai foi e se tasi o Sui ona o faamaumauga ua palasi maualalo le pasene o le malosiaga faafouina (renewable energy). E tatou te talanoa loa i eletise faafouina ia tatou talanoa loa laia i afivai (Hydro's, Solar, Turbines) ma isi tulaga na e lavea ai le diesel. O le upu moni lava lau afioga i le Fofoga Fetalai e mafua ona feseetai le pasene o le eletise faafouina ona e fua le eletise e maua mai i le Solar i le susulu o le la i lea aso ma lea aso, e fua foi le eletise maua i le savili pe afai e tumau pea le saosaoa o le savili i lea aso ma le aso ae manatua e fesuisuiuai, e fua foi la le suavai maua mai i le tetele o timuga ma lava se vai. O lona

uiga e fluctuate a le pasene lea e alu i luga ma sau i lalo aemaise lava pe a faapea e increase le demand o le eletise pe agai i luga ona faapena ai lava lea ona fesuisuiai le tulaga o le pasene lenei aemaise le taimi lenei o lea e paused le atinae lea o Solar e pei sa outou faafogai i se taimi poo le tausaga lea ua tea nei, oloo iai lava le mataupu lea i le Green Market lea e pause ai, ae o lea lava e siisii i luga le faaaogaina o le diesel ae o le mea tonu lava lena ae leo toe umi se taimi ona tatou maua mai lea o se tali i lea vaega.

**Afioga Fuaava Suluimalo Amataga:** Ia lau Afioga i le Fofoga Fetalai pe maua se avanoa

**FOFOGA FETALAI:** Malie lau Afioga i le Minisita sei tuu atu le avanoa i le Sui o Aleipata Itupa i Luga.

**Afioga Fuaava Suluimalo Amataga:** Ia ua faafetai atu i lau afioga mo le avanoa ae atonu o se avanoa lelei foi lea sei fai se malologa a le Afioga i le Minisita i lana saunoaga matagofie ma le manino ona o le mataupu foi sa laga e lenei Itumalo i le tatou Eletise ma pasene lea ua pau i lalo i le 32% e pei ona iai le saunoaga a le Minisita o Tupe. Ia o lea e faamaninoa ua alu i luga le consumption poo le demand ae ua leai se tatou development foi lea e tulituli ai e faatumau a i le 50% poo le agai foi i luga. E pei la o le a ua saofai i i le development a tatou ao lea ua alu ai i luga le demand foi lea, ae pei ona auvatu foi se tuualalo, o le isi vaega e tau fesoasoani i le demand o tatou efficiency appliances foi ia lea e galulue ai foi ma le MNRE i le tulaga lea ia efficient foi lea, e sau le matauila le ai uila ia tau alu ifo ai lea i lalo o le demand aemaise la aemaise la o lea ua e saunoa o lea ua taofi le tatou Solar ae e pei o le uiga lena sa taumafai atu ai se manatu o lenei Itumalo. Aua sa iai foi polokalame faapea e faaaauau ia le Solar i tuā i Aleipata i le mea oloo iai tatou Turbine ia o Savili. Ia e sao le saunoaga a tele a le la ia ua tele foi le power ua maua mai i le la, ae a feololo foi le savili ua faapena ae o si ona lave o la e tumau a tatou plant ia ae ua tatau ona faaopopo nisi tatou Wind Mills se 10 pe a, aemaise foi nisi Solar Plant aua o la e avanoa tua i si o matou pito i taumafaiga a lau Sector ia alu ai i luga le tatou eletise ia taumafai e tulituli ua alu i luga manaoga o le tamaoaiga ao lea e nofo a i lalo ia developments. Ia o se faamanatu atu lea ma le agaga o le faaaloalo faafetai.

**FOFOGA FETALAI:** Ia sei tulai mai lau afioga i le Minisita e faaaua le saunoaga

**Tofa Hon OLO FITI AFOA VAAI:** Ia faafetai, faafetai mo le faamanatu mai, ia e saolele le saunoaga a le alii Faipule o le tulaga lena o lea ua auvatu foi le talosaga i le Minsita o le Siosiomaga ia aua la ni tatou moli faapena e

tau tuutuu mai ai i lalo le faaaogaina o le eletise lea. Ae o le tulaga lea o tatou Solar e leai e leo taofia le tulaga o tatou Solar ae o le tulaga foi lea o le Kamupani lea sa ou taua i le taimi ua sola o lea e loka ai le faatinoina o tatou Solar Plants. E pei ona ou faiatu e le'o toe umi ona tatou maua lea o se tali ona faagaso loa lea o tatou Kamupani Solar lea toeititi maua le 15 o Kamupani lea ua iai latou talosaga ma ou te talitonu lava e le umi mo le tulituliga o le tatou 100% ae tatou oo iai

Lau Afioga i le Fofoga Fetalai ona ou oo mai lea i le Pulega o Felauaiga i luga o le Laueleele, faamauina foi le la outou lagolago aemaise lava o lo outou faafetaia pea o se auauanga faatauvaa a lenei Pulega aemaise lava i le latou galuega faatino i le taimi o lologa o lou Itumalo ma Itumalo foi i Faasaleleaga, ia faafetai tele lava mo faamanuiga faafetai Tea, ua matua lagona i o matou tino lau faamanuiga ia te i matou o se auauaga faatauvaa ia sa mafai ona matou faatinoina. Ae o i tonu lava lau Afioga i le Fofoga Fetalai o le a agai atu ai le faamuamua a le Pulega lenei a le LTA, e faalogologo ma le totoa lau afioga ma le mamalu o le Palemene ia e leai se manaoga na misi ia te au i le LTA, o lea e faamaumau uma lava, o mea tau auala e pei ona ou faiatu e toalima matou o lea faamaumaua vaega ia.

Ae i le tulaga lava ua maua mai i le tatou Tala o le Tupe lenei lau afioga i le Fofoga Fetalai ou te iloa e matua lagolagoina ifo e a outou Sui mamalu le ave o le tatou faamuamua i taligamalo i le tausaga ma e tele nisi auala e fia faaleleia ma faamatagofie ai le tatou tapenaga aua ia le tatou taligamalo. Ia ao lea lava e iai tulaga o seleni ia e mafai ai ona faatino nisi o tatou auala oloo manaomia i le taimi lenei.

O le tatou Cross Island Road poo le tatou auala lea e agai atu i Tanugamanono i Siumu ia o lea ua uma ona award le Kamupani lea a Saina e latou te faatinoa le Lot 2 agai atu i Tiapapata i Siumu ma oloo talia le faasainiga o le latou Konekarate i latou Performance Security ia ma Safeguards Security oloo manaomia ma le tatou Pulega o le LTA. I le tulaga lea e agai i Tanugamanono i Tiapapata o le mea oloo amata ai le galuega lena o lea ua tapena le tauofoga le galuega lena mai i Tanugamanono ia agai i Tiavi. Le West Coast Road lea poo le auala lea e agai i o i le malaevaalele ina foi ua outou silasila iai i lena atinae matagofie ua taatia mai i le taimi lenei ma ua toeititi lava taunu i le mea oloo tulitulimatai i o i le tatou malaevaalele, ma o lea foi ua tapena le sainiga o le tatou Konekarate a le Kamupani lea ua latou maua ia ma le LTA e faatino lea galuega. Ae pau lava si tuualalo ua ou pasi soo mai i le alu lea agai i Sisifo, ia tulou a le Maota e nao se tuualalo i afioga i Faipule oloo papaaao i lea itu ia toe mataga lava le tatou auala i le toe tutupu ifo ai o vao i autafa o taligalu ma tulaga faapena. E tatalo atu lava i le Pulega Alii ma Faipule o le teuteu mealelei lava e le tele ni nai vao o tutupu ifo ae o le faamanaiaga lava o tafaala i le agai i le Airport oloo omai iai tatou turisi faapea foi ma tatou malo agai mai i Samoa.

O isi galuega oloo faagasolo nei o le Phase1 o le galuega lea e i Anoamaa o lea ua amata ona tusi le tatou Design agai i Anoamaa ma oloo fund le World Bank le tatou galuega lenei. O le Phase 2 lea e agai atu ai ua iai foi le fund mai le World Bank mo le fausiaina lava o le itu lea o aualatetele o taligalu ma sui ai loa ia tatou Fords foi ia poo auala simā i Salelesi ma Eva. Ia lau afioga i le Taitai o le Itu Agai aua o lea e te i le pito lea. E faapena foi Safotu lea foi ua tapena le tauofoga lau afioga i le Tamaitai Faipule i le Konekarate e tusiaina foi le ata, ina ua faalogo foi ia e saolelei i le le saogalemu foi o lena itu o le motu tele i Savaii. E faapena foi le tulaga lea ua tatou molimauina a tatou usu mai i le itu sisifo i galuega, ia e pei ona ou talanoa atu ise taimi muamua i le poloka o tatou i le taimi ua iai, ia o lena foi ua i totolu o le Sector Plan a lenei vaega ia le tatou auala lea poo le access road lea na ta'u atu e agai mai i Vaitoloa ma ua iai le fund e faatino ai le Feasibility Study o le tatou auala lea agai mai i Vaitoloa sau i luga o le sami i tua ifo o le TATTE ma le kolosi ifo feagai ma moli lea i Fugalei lea e i luma o Farmer Jo ona faapena foi lea ona toe agai mai i tua ia sau lea afe le isi auala i totolu o Petesa ae agai mai le isi auala i Mulinuu. Ia e pei tasi lena vaega o tatou atinae oloo fuafua.

O le tatou auala lea e pei ona taua i Faatoia, ioe lau afioga i le Sui mamalu ua leva ona fia faatino le galuega lea, lea e kolosi i Maluafou seia paia Faatoia, peitai ane lau afioga i le Fofoga Fatalai o le tatou atinae lea oloo faatali le tatou Matagaluega o Siosiomaga e tau sort out ia le lisi o compensation sa fai, ia e leo mautinoa tonu poo fea se mea o agai iai, ae poo fea e sa'o poo le tatou Matagaluega poo nai aiga foi e ona fanua ae o le a taoto atu lava i le Afioga i le Minisita ia le mataupu lea.

O auala sima ia ua leva ona uma na faataoto i Lano ma Afega ia oloo talia le faamaeaina o le tatou design o auala laupapa ia e lua ona faataunu lea. O lea foi ua iai le fund mo le tatou tapenaina o le ata o le tatou auala i Sapapalii, naunau atu lava i le tulaga lea lau afioga i le Fofoga Fatalai ona e te taulalata i le vai, ua ou alofa atu i lau afioga lou soifua aemaise o lou maota, ia e faapena foi ia le tatou Itumalo atoa ona fausia ai lea o se isi faiga i le auala sima na, o le a matua faamaualuga ia aua nei toe oo iai se vai lau afioga.

O le tulaga o i, ae lea e le'o tuu mai i le Sui o Falelatai ma Samatau, ia ao faafofoga mai o lea ua fuafua se tulaga fesoasoani leaga ua ou vaai ai iina i le ford lena oloo i Matanofo ua fai lava si maualalo, ae e le'o lelei foi le tulaga o le sima o lena vaega o le a taumafai atu se fuafuaga.

Ona faaiu lea o sau faamatalaga i le LTA e fia faamauinā o le agaga o le faafetai i le Taitaifono ma lana Komiti Faafoe faapea foi le afioga i le Tamaitai Pule ma le Pulega ma le aufaigaluega atoa, ona na oomai ia te au ananafi ia se faamatalaga i le Awards faapitoa o le LTA ona o le fausiaina o le auala laupapa lea e i Vaisigano, o lenei awards sa tauaa mai e le Malo o Iapani tauala mai i le latou JICA sa faatupea lau atinae, lea la ua numera tasi ai le tatou atunu o Samoa i le construction ma le tulaga foi lea o le

mataituina ia faapena ona faaaoga tatau foi lea sa fausia ai tatou le auala laupapa lea e i Vaisigano. Ia e momoli atu ai ma le faamalo i lau Afioga i le Tamaitai Konesula i Iapani ou te iloa oloo e faalogologa mai lau Afioga Faalavaau Perina Sila ia mo le taliaina o lea faailoga sa ou autilotilo atu ai ma le agaga faafetai ae toaga pea e aisi pea i le atunu oloo e aumai ai ona o le tele foi o nisi a tatou atinae oloo fia faasolosolo atu i lau afioga.

**Afioga Fuaava Suluimalo Amataga:** Lau afioga i le Fofoga Fetalai pe maua se avanoa.

**FOFOGA FETALAI:** Ia malie lau afioga i le Minisita sei tulai mai le Sui o Aleipata Itupa i Luga.

**Afioga Fuaava Suluimalo Amataga:** Faafetai tele lava i lau afioga mo le avanoa, faafetai foi i le Afioga i le Minisita, faalogologo foi lava ma le toto'a e faagaeetia foi i le Faailoga lea ua maua e le tatou LTA, lelei le faatinoga o galuega, saunoa manino foi lelei le faaaaogaina o tupe ma o se mitamitaga foi lea o le Maota. O lea ua pine mai ma tautino mai ia e leai o lea lava sa lelei le faatinoga o tatou galuega. Ae e iai si tamai mea lava lea, o lea ua e saunoa i le faaaauauina o tatou Poloketi ia i le West Coast Road i le alu lea aga i le malaevaalele, ia faafetai foi o lea ua amata foi ona autilotilo i le isi foi Poloketi lea a le World Bank i le alu atu lea i tua iai matou i le East Coast Road. Ae na ona o se fautuaga e taatia atu pea iina i lau Afioga i le tatou West Coast Road lea e alu agai i le malaevaalele, ia o lea ua e saunoa i nisi o auala faaopopo agai mai i Vaitoloa seia oo mai i Fugalei, ae e iai lou talitonuga i le tatou auala lea e alu agai i le malae vaalele e uma le auala e leai se passing lane, ae ou te talitonu foi o le mea lena e tele ina poloka ai. E tele lava ina o atu i le malaevaalele, e iai foi nai ave taavale ua matutua e tolotolo a i le auala ia o le faigata ia ona overtake e se avetaavale. Ia ae iai foi isi avetaavale e pei oni aoga avetaavale ta te tau atu ai ae a iai la ma ni passing lane tai pei o Toamua, Puipaa se vaega o Faleula o nai mea faaopopo na, ia ou te tautino atu a, e oo foi i le tausaga lea e te maua foi le isi tatou award mo le lelei o le faiga o galuega faapea e saogalemu ai foi le tatou atunu. O lea la ua faatupulaia taavale ae ua poloka ona e nao le lua a lane, ae e le mafai foi ona overtake leaga o la e pisi atu lava le isi itu, ae a iai ni passing lane faapena ma taumafai e faamamalu le Tulafono foi lea afai e faifaiga a le taavale ona faatafatafa laia ae tuu atu le avanoa ia mo isi. Ae o lea foi e tau faalogologo pe iai ea se Tulafono a e below 10maila i le itula ia e ticket foi oe ae a e ova i luga o le 35 ia e ticket, ia e pei o nai mea na e fesoasoani ai i toatuga o feagai ai aemaise lava le agai lea i le West Coast Road, o la e feololo matou i le alu lea i Sasae.

**Afioga Fuiono Tenina Crichton:** Lau Afioga i le Fofoga Fetalai...

**FOFOGA FETALAI:** Ia se i tulai mai le Sui o Falealupo.

**Afioga Fuiono Tenina Crichton:** Ia faafetai mo le avanoa, ia manu e lei see ese le sa o le Minisita o le matou auala, ae o lenei foi Itumalo leaga oloo i luma foi o le Minisita le talosaga o lenei vaiaso ona o tulaga foi o auala oloo faaaogaina, ou te talitonu foi ai ua oo atu se tusi a Alii ma Faipule o lenei Itumalo aua le taumafaiga pea o matou auala, ua faia uma auala o nuu oloo matou tuaoi ao la e tu a Falealupo e lei gaioina auala ia e nao le pau a lea o le tatalo i lau afioga poo afea se taimi e faatino ai lea vaega ma le faaaloalo tele.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Ia sei tulai mai le Taitai o le Itu Agai...

**Tofa Hon Lauofo Fonotoe Nuafesili Pierre Lauofo:** Ia faafetai mo le avanoa e faamauina foi le agaga o le faafetai i le Afioga i le Minisita, o lea ua faafogofa mai lenei Itumalo ua talia tatou talosaga, o lea o le a sii i luga auala laupapa ia o Salelesi ma Eva o auala sima. Ia sei silasila la iai i le matagofie malo faafetai, o le auala foi lea e agai i Sasa'ē lea sa saunoa atu ai le Sui mai Aleipata Itupa i Luga, sei tautuana lau Afioga sei silasila ane lava i mea o tafaala ona o le auala lea e tau atu lava i le Lemafa e fai lava ma solo, na solo foi i timuga tetele lea na maea atu nei ia luga o Lemafa. Tasi lea faafitauli e feagai pea ma le auala lea ma poloka ai le feoaiga o taavale ma nai tagata e malaga mai ma malaga atu i tuā, ae sei faaaaopopo ane ma lena vaega i lau polokalame faamolemole.

**FOFOGA FETALAI:** Se i tulai mai le Sui o Faasaleleaga Nu 5 mo le faasaoina o le taimi o lau afioga i le Minisita.

**Afioga Peseta Vaifou Tevagaena:** Faafetai lava i lau Afioga i le Fofoga Fetalai, leaga o lea ua faalogologo atu foi ma le toto'a lenei sui usufono ia o lea ua fai lau faasoa, ia na ona faamanatu lava le auala o si ou Itumalo leaga o lea e foliga mai ua manuia nisi o talosaga ao leva lava e taoto atu si o ta Itumalo leaga o lea foi ua maua nisi o talosaga ao lea a e taoto atu si o ta Itumalo mai foi a i iai tausaga ua mavae taumafai lava lenei auala o si o'u Lano, na ona faamanatu lava i lau afioga i lau faasoa nei tei ua galo, ma lo'u faaaloalo lava.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai pe maua se avanoa...

**FOFOGA FETALAI:** Ia se i tulai mai le Sui o Vaimauga 1.

**Afioga Sulamanaia Fetaiai Tauiliili Tuivasa:** O le agaga faafetai foi o lenei Itumalo i le afioga i le Minisita ona ua maea foi nai auala o nai afioaga o Fagalii aemaise o Maugafiafia ae toe faamanatu atu i lau Afioga le vai lea e i le va o Maugafiafia lea e alu atu i lalo i Fagalii aemaise foi o lea ua tatala le malaevaalele, ia e pei o le toatele o tagata e le omai agai i le main road ae e pei e faaaaoga mai le va lea e pei o le tulag lena, ma sei silasila ifo i le tatou talosaga na auvatu agai i Letogo, Laulii ma Vailele. Ia o le faamanatu lena i lau Afioga i le Minisita, ae momoli le agaga o le faafetai ona e mitamita a ona o le Award lea ua maua i le tatou auala laupapa e momoli ai le faafetai i le Afioga i le Tamaitai Pule, o le Minisita lenei ta te vaai a e galulue faatasi ma ana CEO e momoli ai lava le agaga o le faafetai i lau faafoega o e foi oi lalo o lau Pulega ae silasila ane i le ta talosaga lena, ia ma le auala i le faleaoga o si o matou nuu o Fagalii ia ma lou agaga faaaloalo leaga o lena ua pisi le malaevaalele, ae toe a o si tamai 20mita le alu i totonu o le faleaoga ma lo'u agaga o le faaaloalo lau afioga i le Minisita.

**FOFOGA FETALAI:** Ia lau Afioga i le Minisita...

**Afioga Aiono Tile Gafa:** Lau Afioga i le Fofoga Fetalai pe maua se avanoa?

**FOFOGA FETALAI:** Ia sei tulai mai Aana Alofi Nu 2...

**Afioga Aiono Tile Gafa:** Ia faafetai a mo le avanoa, ona o lea sa sauia i le saunoaga i le afioga i le Minisita, tulaga lea i le auala lea a matou e alu atu i Sisifo, o lea ua e saunoa sei tagai iai ifo ai matou nuu lea e i, lau Afiog i le Fofoga Fetalai e pei o le auala tuai lea sa iai ae lei faafou le alu atu lea, o lea sa iai lava Konekarate latou te faamamaina, ia ae leaga la matou leiloa se suiga foi lea ua iai. Ae faaeteete foi i mea o alavai i le maintain ina o alavai foi ia i autafa poo le a le tulaga o iai. Ia nao le fia fesili i lau Afioga i le minisita poo toe faaaaoga a tatou Konekarate ia mo le faamamaina o shoulders foi ia o le aualatele ma lo'u faaaloalo lau afioga faafetai.

**Tofa Mauu Siaosi Puepuemai (Vaa o Fonoti):** Lau Afioga i le Fofoga o le Fono...

**FOFOGA FETALAI:** Ia se i tulai mai le Sui o le Vaa o Fonoti...

**Tofa Mauu Siaosi Puepuemai:** Ia e momoli atu le faamalo ma le faafetai i lau Afioga i e Fofoga Fetalai i le faatautaiga foi o le tatou Fono, ia o le tulai atu o le Sui o Vaa e momoli atu le agaga o le faafetai i le Afioga i le Minisita

e tusa ai o le galuega la e faatino nei i Sauano ma Saletel lea sa afaina ai le pasi ma maimau ai le soifua. O le falelua lena ma lona auala la ua iai se tulaga lelei e faaleo atu ai le agaga faafetai. Ae o le vaega laititi lau Afioga i le Fofoga Fetalai o Fagaloa Uta e 7 afioaga oloo iai, ae tatalo atu ma le agaga faaaloalo i lau Afioga pe mafai ona faamei mai le Konekarate lea e i le falelua sei toe faia lelei ia auala lea e alu atu i luga o Lemafa agai i Fagaloatele, ona o lea e matauina i le taimi lenei o lea faafogafoga mai si ou Itumalo lea na toe sau nei le text a le Sui Taitaifono e faamanatu mai ia te au le tulaga oloo iai matou le auala lea e i uta. Ae o le tulaga o le auala e alu i le alu i tai e momoli atu ai lava le faafetai tele i lau Afioga Minisita aemaise foi o le Pule Sili ma le Matagaluega o la ua matua lelei a, ae toe lava o uta ae pe mafai ona aumai le Konekarate lea e i tai na te faaleleia auala ia e i uta o si ou Itumalo ma le faaaloalo faafetai.

**FOFOGA FETALAI:** Ia tulai mai lau Afioga i le Minisita.

**Tofa Hon OLO FITI AFOA VAAI:** Ia faafetai i lau Afioga i le Fofoga Fetalai ua tele foi nai mea faaopopo e ui lava tou te lei aumaia nei mataupu ae ou te ava tele ia outou Afioga. E pei lava la ona ou faiatu e faamaumau a a'u o au Sui Minisita o a'u CEO o le Pulega atoa la e tuu mai i o e leai ma se mea e misi i tulaga ia. Na pau lea i le tulaga o le passing lane lea na saunoa iai le Sui i le la, ou te faamalulu atu i lau Afioga e le toe solomuli le tatou galuega o lea ua uma ona awards ia le tele o Specification e fau ai le tatou auala, ma e lava foi ni fanua o iai e fai ai le tulaga lea. E pei ona ou talanoa atu foi i le tausaga ua mavae o lea e iai le tatou four lane, o le auala faalava lea e agai atu i Aleisa o lea foi ua taoto ua maea ona fai ia tatou design o lena auala, ia e fuafua lava la i le tulaga o femalagaiga.

Ia Peseta o lea ua faiatu le tulaga o lou auala foi lea, e ave lava le faamuamua i le tulaga lena o le saogalemu o tai i le aai o lou Itumalo, ae faataitai la i le tulaga lea o aualatetele lea e te saunoa mai ai e faaaoga ai se isi vaega o lau miliona pe a faapea o totoe se tupe ae a faapea e leai ia o lea taumafai atu a i se taimi o lata mai.

Ia Falealupo ia malie lou finagalo ua galo atu le mea sa e saunoa iai, ia lea ua matua faamauina ma lo'u loto fiafia. Ia ma tulaga uma...

**Afioga Masinalupe Makesi Masinalupe:** Lau Afioga i le Fofoga Fetalai...

**Tofa Hon OLO FITI AFOA VAAI:** O sui uma na aumai outou manaoga e iai ma le Sui o Lefaga ma Faleaseela o lea ua matua faamauina uma lava sa saunoa iai le Sui o Lefaga ma Faleaseela.

**Afioga Masinalupe Makesi Masinalupe:** Ia ua lava lea faafetai.

**FOFOGA FETALAI:** Ia malie lau Afioga i le Minisita, o Aana Alofi Nu 3 lea o le teuga o mea foi ia e autafa o le auala.

**Tofa Hon OLO FITI AFOA VAAI:** Ia e moni le afioga i le Sui Faipule ia ae e pei e ese la le vaega lena oloo tausia pea e Konekarate. E lelei foi o lea faafogafoga mai Konekarate na o lea o le a ou alu atu lava ou te asiasi a oo loa iai se tulaga lena, ona ou logoa loa lea o le afioga i le Tamaitai Pule e fai ai ni faaiuga pe a ua le .., ae sei vagana ai ni nai mea laiti i tafaala i luma o le aai lau afioga e le tele tele, ao sina tasi tasi foi lea ae ua maualuluga lava e fai iai se fua e faamatagofie ai le tatou auala.

Lau Afioga ona ou oomai lea i le Pulega o le Malaevaalele, o le tele ia mafaufauga i lenei malaevaalele lau afioga, ia o lea ua molimauina ua toe tatala le tatou malaevaalele i Fagalii. Ae ou te ta'u atu e lei soona faia e le Pulega o le Malaevaalele le malaevaalele lenei, sa autilotilo le Pulega o le malaevaalele e fesoasoani i le gasegase o le Samoa Airways o le matou sao lena. E ese foi le tulaga na ou tau autilotilo atu iai e pei e foliga mai e le'o lea le mea oloo manatu iai le tatou Kamupani. Ae e momoli atu le faafetai tele i lau Afioga i le alii Faipule o Vaimauga Nu 1, ia faapea foi le paia o le afioaga o Fagali i ona tulaga faalupe faapea foi le Itumalo atoa mo le lagolagosua i le atinae taua o le tatou Malo. I le tulaga lea ua iai i le tatou faaopopoga poo le tatou extension o le tatou runway, o lea ua maea ona faatino le design i le toe faaaaopopoina o le isi umi o le malaevaalele i lona phase 2, e le'o toe mamao ona amata lea o le galuega agai i lona itu i sasa'e lau afioga i le alii Faipule, ia e le'o se galuega taugofie ae o le lagona lava o le faaleleia atili ma faamautuina le saogalemu o le tatou malaevaalele. E le tele ni vaega na aliali mai i le malaevaalele ae faamauina le faasea o le Pule o le Samoa Airways e faapea e le'o lelei ona salu ma'ama'a tulou le Maota ma le faafogafoga a le atunu, e le'o lelei ona salu maamaa ninii lea o le runway. Ia ou te leiloa foi iai pe na agai le afioga e salu poo iai ni mea faapena ae ou te lei vaai o agai i luga o le malae.

Ia o le isi foi tulaga e pei ona ou taua e faapea mai, "ia malie lau Afioga i le alii Minisit leaga ua agai le Pule o le Samoa Airways i luga o le Media, ma e ao lava la ona ou tali atu i le taimi lenei ao faafogafoga foi le media i lana saunoaga lea. O lea foi ua ou vaavaai atu e faapea e lei faia se faaopopoga but e sa'o e lei faia se extension but o lau lauga na tatala ai le malaevaalele o le tupe atoa lea ua faatinoai e aofia ai ma le faaopopoga o le malaevaalele. Ia tailo la ia na ia poo le a le tulaga o iai, lea foi ua faapea mai ua aafia pau o le vaalele i le ta lea e iai nei. E fai a si laititi o le size o le maa tulou lava le Maota lea e faata ai Fagalii. O le size lea e faata ai Fagalii e tutusa lelei a ma le size la e faata ai Faleolo i le malaevaalele, ae ou te leo malamalama foi i le alii Pule poo le a le mea ua saunoa ai faapea, e pei o le tulaga lea lau afioga i le Minisita oloo iai te oe le tofa e faatumauina ai, aua o lea ou te iloina nei e temporary lona avanoa i lau afioga. Ae talu ai o le

maoae o lona tomai faainisia i le malaevaalele faamolemole faatumau le galuega a le Inisia lea ae a faapea e leai, ia e sili ai lou alu atu e aumai i i le matou Pulega o malaevaalele e sau e galuega ai faainisia.

Ia o le tulaga lena lau afioga i le Fofoga Fetalai ona e faanoanoa ai lava le mafaufaufau ona o inisinia sa fuafuaina lea na plan ina le malaevaalele lea, o isi inisinia na plan ina le malaevaalele o isi inisinia na o e inspect le tulaga o specification o le malaevaalele poo comply ma Tulafono. Ia e iai lo latou tomai faapitoa ua lava foi lo latou aoaoina ma le latou tomai, ua maea foi ona asia foi le malaevaalele lea ma faamaonia e le tatou Kamupani foi lea o le Pacific Aviation Security Office (PASO) o latou lea o lea e vaaia le saogalemu o mea tau malaevaalele i le Pasefika atoa e leai ma se mea o faaletonu, ae maoae le tomai lea lau Afioga i le Fofoga Fetalai ua faaali mai e le vaega lea.

O vaalele ia e iai vaa a le Samoa Airways Twin Antons e faaaogaina e faaaogaina e nao le 400mita o le tulaga lava lena oloo iai, o le ituaiga lea e e iai le Talofa Airways e tau o le Aero Commandas o le ituaiga lena latou te faaaogaina le 1000+ mita i le umi o se runway. O le eseesege lena leaga o lea e finau lagona ma mafaufauga o le atunuu i le taimi lenei. O Fagalii i le taimi lenei e 700mita le umi o Fagalii toe faaopopo loa la iai ma le tatou extension lea o le a fai nei ua double le umi o le runway e faaaoga e vaalele ia o le Samoa Airways, ma ou te molimau atu i lau Afioga i le Fofoga Fetalai nao Samoa e faata latou tamai Airports ia, lea e faaaoga e tatou Twin Antos ao Fiti, Tonga Vanuatu lea na matou o iai, ia e alu a i luga o le asuemu o le mutia o le gravel o la e faaaoga ai a. E fua la pe fetaui foi ma le twin antos aua e maualuga le vaa lena, ae o la'u autilotilo atu i le mea lea e finau mai ai le Afioga lea e fua i le Talofa Airways aua e maualalo lava ae masalo o finagalo e faared carpet le tatou malaevaalele poo se mea faapena.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, ua ou tulai atu ua ou vaai atu ua lata i le taimi o le tatou malologa...

**FOFOGA FETALAI:** Ia o lea a e vaavaai atu iai le Fofoga Fetalai e leai se mea o le a e faamanatu mai ai fua o lea e malamalama le Fofoga Fetalai.

Ia talu ai o lea ua oomai i le taimi o le tatou malologa...

**Tofa Hon Fonotoe Nuafesili Pierre Lauofo:** Ia lelei...

**FOFOGA FETALAI:** Ia, o le a faamaea le saunoaga a lau Afioga i le Minisita pe a tatou toe taliu mai, ae faataatia ese galuega mo le tatou malologa.

*Na faataatiae Taulumaga a le Fono Aoao Faitulafono mo lana malologa i le itula e 7:45 i le afiafi ma toe faaauau i le itula e 8:17 i le po.*

**FOFOGA FETALAI:** Ou te faasila sila atu ua toe amatalia nei Taulumaga a le Fono Aoao Faitulafono. Ou te tapa lau Afioga i le Tamaitai Palemia mo le Lafo.

## **LAFO MO LE TEUTEUINA O ITULA FONO**

**Afioga Hon FIAME NAOMI MATAAFA:** Lau Afioga i le Fofoga Fetalai ou te matau atu ua sologa lelei le faatinoga o le tatou galuega, e peitai o taeao o le aso puupuu ona tatou te manava i le itula e 12:00 i le aoauli.

Ma o le ala lea o le tulai e toe faatu le Lafo Toe Teuteu e faapea, *Pe afai e aulia le itula e 10:00 i le po nei e le i maea Tali a le Kabeneta, ona tatou malolo lea mo le 15 minute ma toe faaauau sia maea lau Tali faamalamalama i mataupu sa laga e le tatou Maota ona tatou tolopo ai lea mo taeao mo le Saunoaga Talifuaiteau a le Minisita o Tupe ma faagasolo ai sia maea le faiatuga faatolu o le Tulafono Tau Faaofi o le Faatatauina o Tupe 2023/2024.*

O le lafo lea lau Afioga

*Faaluaina e le Sui Palemia, Minisita mo Faatoaga ma Faiga Faiva ma le Minisita o Tupe.*

*Na faamaonia le lafo.*

**FOFOGA FETALAI:** Ia o le a faasolo le tatou galuega e tusa o le Lafo.

E faataatiae tatou Taulumaga mo le malologa o lo o saunoa le Afioga i le Minisita o Galuega, Felauaiga ma Atinae Eseese e talifuaiteau i mataupu i nisi o saunoaga a le tatou Maota. O le mea lea ou te tapa ma le faaaloalo lau Afioga i le Minisita mo le faaauauina o lau saunoaga.

**Tofa Hon OLO FITI AFOA VAAI:** Faafetai i lau Afioga i le Fofoga Fetalai. E manatu ua maea uia le ala i saõ aua foi se faasiligamalosi a lau afioga faapea foi le mamalu o le Maota.

Ae faaauau atu pea se faamatalaga ona o se mataupu e tuga le tulaga i le malaevaalele lava lenei lau Afioga i le Fofoga Fetalai, ae ou te malamalamalama foi i se faasea foi a le o lo o tauavea le tulaga Ofisa Sili i le taimi lenei o le Samoa Airways ona o ia na faavaea ma Shareholders i le isi Kamupani lea a le Talofa Airways. O ituaiga polokiki galemulemu ia lau afioga i le Fofoga Fetalai, tulou le Maota, e le manaomia e le tatou Faigamalo. Afai ua le mafai

ona tulaueelele le vaalele i le malaevaalele i Fagalii, lau Afioga i le Fofoga Fetalai, o loo avanoa le tatou malaevaalele i Paleolo, aua o la e lava sa faatau mai lava le vaa e fua i le umi o Paleolo.

O le Talofa Airways lau afioga i le Fofoga Fetalai ma le paia o le Maota lenei, e le toe mafai ona toe afea le malaevaalele i Fagalii ae se i talia se isi fautuaga mai le Kamupani lea e pei ona hire e le tatou Malo le Pacific Aviation Security Office, ia, ona toe i ai lea o se isi faaiuga. A o le faaiuga lena ua oo mai ia te au mai le afioga i le Alii Pule o le tatou Civil Aviation i le tulaga e pei ona i ai le vaalele lena.

O le tulaga i tatou aiga ia lea e i le itu i sasae o le malaes, o lea ua faatalanoaina le toe sii atu o nai aiga ia i fanua i uta ma le afioga i le Minisita o le SLC, ia ma o lo o faatalanoaina nei le mataupu lena ma le mamalu o nai aiga ia, e le'o toe mamao ae faatino le tulaga lea. O lo o i ai foi le tulaga o le toe faaleleia o le auala lea e pei o se auala faaopoopo foi lea e agai atu i le malaevaalele agai i Moataa, aua lava ia le tulaga lea nei tafe le alia lea e oo atu i le taimi lenei i Vaivase a o lo'o i ai le auala lena e mafai ai ona access tagata uma e agai i le malaevaalele. Ia o lena foi sa faapea ona taua e le afioga i le Minisita o le Samoa Airways o le tele ia o tupe i le taimi lenei i a latou charter flights agai i Savaii. O le tasi lea o vaega sa naunau ai lava le taofi ina ia mafai ona faaaogaina le tatou malaevaalele i Maota ma Asau, aua o le taimi lenei lau afioga i le Fofoga Fetalai, e \$100+afe le tupe o lo o fai ai le maintenance o malaevaalele lenei ae leai ma se tatou tupe o maua mai ai. Ia o lea la ua iai le tulaga lena. Ma o le isi foi vaega e mafua ai ona naunau i le vaega lea, ona o lea foi sa i ai tatou Medevac from Maota i gasegase lea foi e tilitili mai i le falemai e aoga ai le tatou malaevaalele i Fagalii ona e latalata i le tatou Maota Gasegase i Motootua.

O le tatou malaes foi lea mafolafola lea e i tua i se mea o Tiavea, ia, o le tatou malaes lena o lea ua i ai fuafuaga a le Pulega o le a lisi atu i le isi foi Pulega o lo o ia te au o le EPC aua le faatinoina o le tatou Solar Plants i lena foi ogaeleele telē ua i ai, e faaaogaina ai lena vaega.

O nisi fuafuaga i le tatou malaevaalele ia e le o toe po se lilo i tatou Taligamalo, ma o le taimi nei o lea o lo o taoto se talosaga a le Pulega o le Malaevaalele i le Afioga i le Tamaitai Palemia ma le Kapaneta i le faia lea ma le fausiaina lea o se VIP telē ina ia gatafia ona faatino i le tatou Taligamalo i le tausaga fou. Ma o lea foi ua faaali manino e le Pulega i le Minisita o Tupe, e faatupe lava e le Pulega le atinae lea o se tatou VIP fogafalelua, aua foi o le taimi lenei a omai tatou malo e savavali solo i fafo vaeatu le paia o le Maota e le matagofie foi i se vaavaai. Ae o le fale lea po o le tatou VIP lea o le a agai sao atu lava i luga o le auala o lo o i luga o le terminal ma agai sao loa i totonu o le tatou VIP. Ae pei ona ou fai atu o lo o talia le tatou talosaga e fua i le talia mai e le tatou Kapaneta.

O le tatou Pulega o Vaa, ia e pei ona ou fai atu olea ua siitia le tulaga faapisinisi o le tatou Kamupani Vaa aua foi ia tupe maua a le tatou Malo e

fesoasoani i le tatou Matagaluega o Tupe i le faatupeina foi o nisi vaega. O le tatou Fotu i le taimi lenei, toetoe a le toe oo mai le tatou Fotu pe a agai nei charters agai i Pagopago. O lea foi ua toe agai le Fotu i le taimi lenei, o la e taofiofi ai i o, e ono pe valu isi charters agai i Manua mai Pagopago, ona o le tele foi o atinae a le uso ia Tutuila o lo o faatino i le taimi lenei.

Ia e faapena foi i faigamalaga a charters i o i Tokelau. O le tasi lea vaega sa taofia i le 2019, lea sa faatau mai ai loa le vaa a Tokelau ma toe faaauau ai a latou fuafuaga, peitai o lea sa feutagai lava ma Tokelau o lea la ua toe tatala ai le avanoa lea sa maua ai le tele o tatou tupe i charters ia i Tokelau lea foi ua agai i ai ma ua faaaoga i ai le tatou Lady Samoa IV lea e agai i Tutuila.

O le Pulega o Uafu ma Taulaga lau Afioga i le Fofoga Fetalai e le o toe umi lava toe 2 nai au Pulega o totoe. Ia e leai ni mataupu na laga i le tulaga o le Pulega o Uafu ma Taulaga, ae pau lava o le faasilasilaga i a outou afioga. o lea ua tapena le Pulega o Uafu ma Taulaga e toe upgrade tatou terminals i Salelologa ma Mulifanua e faamanaia atili ma tau faaopoopo ia ma tulaga e pei ona laga i tatou Fonotaga.

O Satitoa le uafu lea na tele ai tatou tupe o lo o gotogoto ai i o, lea ua lisiina atu i se tasi foi o Kamupani o le tatou atunu le Silva Transport e latou te fausia ai ma toe fausia le sleepway lea e faaaoga e fai ai le maintenance o tatou vaa. Ia o le isi foi itu o lena o le a lisi atu i tatou vaafagota e toe move i ai le tele o tatou vaafagota o lo o i Matautu. Ae mo le taimi nei, e pei o le mataupu lena o lo o vevesi mai i luga o nusipepa ma tulaga faapena, ia o le vaa o lena ou te ta'u atu aua o lea sa ou asiasi lava i ai i le tulaga lea e faapea o se vaaoloa.

Ia mo le silafia e lau Afioga ma le mamalu o le Maota o le vaa lena o le vaa o le Kamupani o loo fausiaina le tatou uafu i Matautu, ma o le leai o se avanoa e taula ai i Matautu o le mea lena na sifi ai ai i tua i Satitoa. Ma o lea ua maua mai faamatalaga e toe foi mai, manatua foi le faiga o tatou headquarters ia e fai i Matautu, ia e faaaoga le tamai vaa lena i le latou galuega.

**Afioga Fuaava Suluimalo Amataga:** Lau afioga i le Fofoga Fetalai faamolemole lava pe maua se avanoa...

**FOFOGA FETALAI:** Ia malie lau afioga i le Minisita se i tuu atu le avanoa i le sui usufono mai Aleipata Itupa i Luga.

**Afioga Fuaava Suluimalo Amataga:** Ia faafetai lava i lau afioga mo lo'u avanoa, faafetai atu foi i le afioga i le Minisita o lea ua manino le faamalamalamaina o le uafu lea e i Satitoa i Aleipata. Ae pei o le tulaga lea sa taua foi i se faamatalaga a lenei Itumalo, ona o le tulaga foi lea, o lea ua e saunoa o le a faaaoga e le gata e lisi atu i le Silva Transport ae faapea e

faaaoga foi mo alia fagota. Ae pei o le tulaga lea sa alu atu ai se faamatalaga ona o lo o maua ma masalomia foi e le matou Itumalo le tulaga lea o tatou Border Control o vaafagota ia o lea e tau masalomia le sau i totonu o nisi o tulaga o mea ia o fualau faasaina ma tulaga uma faapea. Ae afai la o la e i ai le fuafuaga e faaaoga le uafu lea mo alia fagota, ia faafefea la le tulaga o tatou borders control pe faapefea le tulaga lea, ina ne i te i ua fai ma mea e ausia mai ai e nisi o lo o faapea ona fai lea ituaiga pisinisi ia ua faaaoga loa le uafu lea, aua o la e faapea nao vaa fagota e lau mai ai i'a ma mea faapena.

E pei foi ona saunoa le Minisita o Leoleo ua popoto foi tagata e fai tooth paste ma mea foi ia, ae leiloa pe aumai ia ua uma ona filei mai totonu ma nisi mea faapena. Ae e pei o le manumanuga lea o le matou Itumalo i uma ane ua tutu ai ni Pisinisi faapena i tua o, ona te i lea ua avea o se mea lea e faatupulaia ai lea tulaga ae pei o se mea lena e faamanatu atu ma le agaga faaaloalo, faafetai.

**FOFOGA FETALAI:** Ia tulai mai lau Afioga i le Minisita.

**Tofa Hon OLO FITI AFOA VAAI:** Ia faafetai atu i le finagalo faaalia, o le fuafuaga lena lau afioga i le sui mamalu faatoa fuafua ma faataunu i le tausaga fou, pe a oo ina taunu mai le tatou meli e faaaoga i a tatou taligamalo. Ae o vaafagota uma nei o loo taula i Matautu lau afioga i le sui mamalu, lau afioga i le Sui Fofoga Fetalai, o lo o i lalo i le vaavaaiga a le tatou Maritime a le MWTI ia faapena foi i le Tiute ma le uafu, ae o le tulaga lena. Ae faafetai ua faamauina le concern a lau afioga ma e le o faatamala ai le tatou Maritime i le monitor ina o vaa ia i le mea e agai iai.

Ia ona ou oo mai lea i le tatou X-ray Scanner e pei ona laga mai i le Xray Container Scanner. Ia o le upu moni lau afioga i le Fofoga Fetalai o lo o talia le tatou Matagaluega o Tiute ia e fua iai po o a le specs o Xray scanner ia e filifili, aua e lua ia ituaiga Xray sa filifili iai e iai le tulaga foi lea o le Floor Mounted Xray ia poo le Mobile Vehicle Xray Container Scanners. Ia e fua la le gaoioiga o specs o le tatou fale, le structure o le fale e fua la po o fea se mea o filifili i ai le tatou Matagaluega o Tiute nei meaane ua fai muamua le tatou fale ae uma ane ese le ituaiga Xray Scanner e aumai.

Ia lau afioga i le Fofoga Fetalai ona maea atu lea o se tali a lenei Vaega, ia o se upu foi ua le tautamalii i se faafogofoga, ia lau afioga i le Fofoga Fetalai ma le paia o lenei Maota a o se faafogafoga foi i le paia o le tatou atunu, ia faamagalo se vaivai o la outou auauna.

O le tatou Sector tatou vaega po o le tatou aiga...

**Afioga Auuapaau Mulipola AloitafuaMulipola:** Lau Afioga i le Fofoga Fetalai pe maua se avanoa...

**FOFOGA FETALAI:** Ia malie lau Afioga i le Minisita se i tuu atu le avanoa i le sui usufono mamalu o Aiga i le Tai.

**Afioga Auuapaaau Mulipola Aloitafua Mulipola:** E momoli a le faafetai i lau Afioga i le Minisita, lelei foi lea e fai ai le malologa a lau Afioga, ua se toa foi. Ona talu ai sa alu atu i le gagana lautele lau tautalaga i le Tala o le Tupe lenei ae sa i ai foi se taimi sa ou afea ai lau Afioga ona o le mataupu a lenei ne i te i ua see ese a o faaiiu saunoaga a lau Afioga, ona sa alu atu lau lauga i le gagana lautele e uiga i Uafu.

E le natia lau Afioga le uafu lea o si ou motu lea ua leva ona ou taura, o upu tautino lava e i ai latou o loo faafitifiti le lagona ona o ni popolega faapea ne i meaane fai, aumai le uafu i lalo o le malosiaga o le SPA. Ae sa tatou talanoa ma lau Afioga pe mafai a ona e saunoa e faamanino tulaga nei, o le soifuaga nei e tupu faatasi a le saito ma le titania, ua uma foi ona ou faailoa ailoga a tupu lea tulaga. Ae manino la leaga o lae faafofoga mai lou motu, e toalaititi a e faia le faatauthee i galuega lelei a le Malo. Ma le faaaloalo lava lau Afioga leaga sa afea i lau lauga faafetai.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai e fia faasaoina le taimi o le Minisita. Sa ou lauga i le scanner, e pei o lea la ua matau o lea sa faatau e le Matagaluega o Tupe Maua, ae pei o lea la ua saunoa manino le Afioga i le Minisita o Galuega Tetele o le Malo. Ona o ni tulaga la ia o i ai ae pei o lea matau ia pei ua 2-3 tausaga faatoa taunu mai lea scanner ae lea e le o faataunuina a le galueaiina o le tulaga lea i le tiute.

Ae pei o le tulaga lea ua saunoa manino le Afioga i le Minisita o Uafu ma... E pei o le uiga la pei foliga mai e le o pasia le fale lea e faatino ai le scanner, aua o tulaga lena lea tau maua o la ua leva ona taunu mai a o lea e le i faatinoina. Ona lea sa faapea e popole ai o le sui i le tele o nei mea e tutupu ona o le faaaogaina o le scanner lea poo le scan lea Matagaluega o Tupe Maua, ao lea la ua maua e pei o i i le Matagaluega o le Afioga i le Minisita lea e taofia le fale po o lea tulaga e faatino ai totonu le scan lea e faatino ai le tulaga o le tiute. Po o le saoga lea lau Afioga i le Minisita?

**FOFOGA FETALAI:** Tulai mai lau Afioga i le Minisita.

**Tofa Hon OLO FITI AFOA VAAI:** Ia lau Afioga i le sui mamalu ua matua sese i sisifo le tulaga e pei ona e saunoa. E faamalulu atu ai lou finagalo si au uu.

O le tulaga lea e pei ona ou talanoa atu ai o lo o faatali le pulega o uafu ma taulaga i le fausiaina o le fale i le ituaiga scanner ua malilie i ai le Matagaluega o Tiute. I le ma o le isi ituaiga scanner lea faapea e mobile, its a truck e fealuai solo le tulaga lena. Ne i te i ua fau atu le fale tatou Pulega

o Uafu ma Taulaga ae aumai e sese le tulaga. Masalo pei a o le ua faalogo atu, e pei a o le faaiuga o le tausaga nei pe a ua taunu mai le vaega lea.

Ia lau Afioga i le Fofoga Fatalai ua oo atu i lau Matagaluega tatou vaega o Galuega, Felauaiga ma Atinae Tetele o le tatou Malo, Lua Afioga i Sui Minisita...

**FOFOGA FETALAI:** Lau Afioga o se faafesili a le Aiga i le Tai lea sa avatu.

**Tofa Hon OLO FITI AFOA VAAI:** Oi e faamalulu atu lea ua alu atu lau Afioga i le Sui Fofoga Fatalai. O lena ua e tali sao lava i le tulaga ua tuai ai ona faatino le tatou galuega o le tauaimisa ia o le tou Itumalo.

O se tuualalo lava lau Afioga i le Sui Fofoga Fatalai, o le a lafo atu lava i le tofa ma le uta i le tatou Itumalo, fai e outou se faaleleiga i se mea e tasi ai ona aumai loa lea e matou te faatinoa le vaega lea. I meaane matou o atu e faatino ae tou fetotoai i le tatou Uafu lena a o le agaga ia o le tatou Faigamalo o lea manao e fesoasoani atu, i se uafu talafeagai ma mautu lelei mo tatou i Manono-Tai.

E pei o le tali atu lea lau Afioga i le Sui Fofoga Fatalai a uma loa ona faatoatoa le tatou Itumalo ma le tatou Nuu, ona toe lafo mai lea e avatu se fesoasoani.

A o lenei taimi lau Afioga i le Fofoga Fatalai ou te faafetai atu foi i Afioga i Sui Minisita o loo matou galulue faatasi faafetai tele lava. E taua foi le lua tuualalo foi ma le lua lagolagosua i lau galuega ua mafai ai ona faatino le tele o nisi tatou galuega. Lau Afioga i le Ofisa Sili o Pulega o le Matagaluega o Galuega o Felauaiga ma Atinae Tetele, faapea outou Afioga i Ofisa Sili o Pulega o Pulega Taitasi. O le upu moni ou te le selu atu ae faafetai tele lava i la outou tautua e le tau faamatalaina. Faafetai foi i la outou tuualalo mai ia te au nei ua faigofie ai ona ou faia se taitaiga i lo tatou aiga.

E le gata foi o a outou Afioga ae faapito lava lau faafetai tele lava i le aufaigaluega atoa, e le tau faamatalaina foi ia lo outou gapatia, laina, timuia le lava se malologa i le ao ma le po, ona o le moni o lo outou alofa ia Samoa ma lau tautua. E silafia e le Atua la outou auaunaga. O le upu moni e le pau fua se mataua o lo outou afu sisina. E tauia lava le galuega a le tagata e faamaoni ma le tagata e fiafia e tuu atu lona ola e tautua ai, ina ia manuia tagata uma o le tatou atunu. Faamanuia le Atua ia te outou.

Ia si ou Itumalo, le paia e o si ou Itumalo faafetai tele lava i la outou tapuaiga, e lagona lava i tino le pai mai o faamanuia ona o a outou talosaga ua mafai ai e sou faatauvaa ona tauave ma faatino ia lo outou tofi e pei ona tofia ai le tatou Itumalo e le Afioga i le Tamaitai Palemia ia agalelei le Atua i lau tapuaiga, manuia foi la outou usugafono i lea vaiaso i le fonotele a le tatou Ekalesia Metotisi.

E faaiu sa matou tala lau Afioga i le Fofoga Fetalai, agalelei le Atua i lau Afioga ia faapea foi le Afioga i le Tamaitai Palemia, Taitai o le Itu Agai ma le mamalu o lenei Palemene aemaise foi le tapuaiga a le tatou atunuu. Soifua ma ia manuia.

**FOFOGA FETALAI:** Ua faamalo saunoa faafetai i lau Afioga i le Minisita o Galuega faapea foi Felauaiga ma Atinae Tetele o le tatou Malo, aemaise foi o le tele foi o Pulega i lalo o le vaaiga a lau Afioga, aua lava manaomiaga masani o aso taitasi o le tatou atunuu. Ua faamalo le fai o le faiva, faamalo galulue. E talitonu foi e le faigofie lo outou tiute ma la outou galuega ae faamalo lava le tautua atunuu, malo foi le onosai ma galulue i taimi fita ma faigata o le atunuu. O le mea lea malo faafetai i lau Afioga i le Minisita ma au Pulega, malo le galulue.

Ia ua tatou oo mai lau Afioga i le Minisita o Faatoaga, Faigafaiva ma Suesuega Tau Saientisi.

**Susuga Hon LAAULI LEUATEA POLATAIVAO FOSI (Minisita mo Faatoaga, Faigafaiva ma Suesuega Tau Saientisi):** Faafetai i lau Afioga i le Fofoga Fetalai mo le avanoa, o lenei foi Matagaluega se i avatu ai se manatu ma se lagona e ala i le tatou fonotaga i lenei afiafi. O lea ua e lalau le faga i paau, ae ou faamalo atu le faga i aea i le alofa ma le agalelei o le tatou Tapaaau Sili i le lagi, o lea ua valo manu o pouli a o lo o tumau pea lona alofa ma Lona agalelei e ala i Lana puipuiga, taitaiga leoleo ma Lana faamanuiaga i le Palemene o Samoa.

E momoli atu ai le agaga faafetai tele i le paia ma le mamalu maualuga o le tatou Maota nei i ona tulaga faalupe. Lau Afioga i le Fofoga Fetalai o lea ua e sua pea le aulapauta ma le aulapatai. Ua e ta foi i le amouta, ua e ta i le amotai a o loloma le toeaso nai Moamoa i le aso a taeao aua le faaiuina o le lauliliuina o le tamaoaiga o Samoa. E momoli atu le agaga faafetai tele i malelega, tuleiga, saunoaga, fetalaiga le paia ma le mamalu o le Kabeneta, o lea ua taunuu mai i le numera 10 o le Tali a le Tatou Malo. Faamalo saunoa faamalo fetalai a loloma ai le tapuaiga mau a le Afioga i le Tamaitai Palemia, ma le Afioga i le Sui Palemia ma le saunoaga faaiu a le Afioga o le Minisita o Tupe.

Faamalo atu foi i tuleiga ma saunoaga a le paia o le Maota i ona tulaga mamalu ma paia masani. O outou Afioga o Sui Mamalu o le Palemene o Sui Filifilia mai Itumalo uma aua le filiga a Samoa mai i ona ao se i oo i ona iu. O Itumalo e fia mamalu e fia, paia e fia ma faalagilagina e fia e malu ai le tatou Faigamalo i lenei foi nofoaiga.

Lau Afioga i le Minisita Lagolago Maiava Fuimono o lea fai le tatou upu, tapuaiga mau a lau Afioga i le Ofisa Sili o Pulega o le Matagaluega o Faatoaga ma Faigafaiva lau Afioga Seuseu, le paia maualuga o le tatou Pulega lau Afioga Masuisui ma le tatou SROS, lau Afioga i le Taitaifono ia

Sulamanaia Monatini, tainane le Taitafono le Susuga ia Tuilaepa lau Afioga i le Ofisa Sili o Pulega Natasha ma le tatou Esetete Tausi tapuai maia o le fai le tatou faamatalaga e tali ai le finagalo o Samoa lea ua opea i le Maota.

O lea ou tafaimaia le Tamaloa na liufatu i le Alataua, aua lele ua maea ona paepaeloa Samoa i tuleiga ma saunoaga a le Maota Fono i Tiafau. O outou paia popo ma outou pa le solo, o outou tulatoa ma outou fuesina loloa o le laau e tino i le toa ae fai mai o lona malu ua ola ai Samoa. A o le augani lea a le toeaina o Ulufanuasesee i lana fanau o Taema ma Tilafaiga. Fai mai le toeaina, suga, ua talalua lo oulua pou fetalai tautuana le ausaga, ia ama le taua a ia lua matatau ia Samoa.

E manatua foi le loto le mavaega nai le Tulatala, saunoa ai le Tuitoga ia Talaifeii i toa o Samoa ua malie toa ua malotau. O a ou alu ou te le toe sau, faatoa ou foi mai i le aoauli folau. Aisea? Aua e talatau Toga ae Talatofi le atunu. O le a ou le toe sii ai la se matalalaga i lau faasausauga Samoa i lenei itula afiafi ao e alo i lau tapuaiga. Sa e ula le iula ma e po le fala ae pei o le faiva i poula a o alo lou Palemene i le lufilufiina o lou tamaoaiga, o lou alofa ma lou agalelei na tuu mai i lima o le Palemene, matou te omai e auau le upega na lalafo ma lau maa na togi ma lau tofa faatupu e atinae ai Samoa. Ona ou manatu lea lau Aifoga i le Fofoga Fetralai, e le faigofie itu aso faapenei, leaga tatou te tu i le too ma tatou tepa pea i le ata ma tatou fesili o ai le Pule? O ai le Pule na aumaia tatou i inei? O ai le pule na tofi ai tatou e le atunu tatou te omai i inei? E pule le Atua, pule pea le Atua i ana tofiga ia te i tatou taitoatas i uma ma le tatou valaauna, vaelua lea o Lona Suafa i Matai, o alii ma faipule tofi mai loa tatou te omai tatou te nonofo i nofoa nei e momoli le malelega, e momoli le tofa, e momoli le faautautagao, e momoli le manaoga, e momoli le tuualalo ma momoli mea uma aua se manuia o Samoa o lo o faafogafoga mai.

Samoa, e leai se poto, e leai se vave na te toe suia ou ala o paia e tumau e oo a i le faavavau aua o oe o le ua e faalanumaaveave. O le ao e mamala i le faasouga o ao ma le atu folasa aua e malu i fafo e mau i fale. Lau tiuga ma lau faaaloalo i le Palemene lenei ua avea ai matou ma matou tagata matou te omai se i lufilufi le tamaoaiga o Samoa. Faafetai le Atua, viia le Atua i lona alofa ma lona agalelei, i mea ua foai mo tatou ua tatau mo le aso. O le a sa tatou mea e fai pe ana faapea na ona tatou pisa, pisa, pisa ae pisa ae na o le savili a le a le mea lea e matau.

E maeu le alofa ma le agalelei o le Atua ia Samoa, ua tatou tepa i ula ma tatou futifuti a manu ula ma o tatou ula le faasolo le alofa ma le agalelei o le Atua e ala i lona tamaoaiga e momoli maia ao o le tatou atunu i le Malo e faatino ai faiva ma tiute e ala ai le lauliliuina o le tatou tala o le tupe.

O le matua o le lauga lenei Matagaluega e maua mai lea i le tusi a Efeso Mataupu 4: f1-f7: “*O lenei o au ua le noatia ona o le Alii, ou te aioi atu ia te outou ia outou savavali ia tusa ma le valaauna ua valaauna ai outou. Ia outou loto maualalo, ma le agamalu ma le onosai, ia outou faapalepale le*

*tasi i le tasi ma le alofa. Ia taumafai outou e taofi le lotogatasi i le agaga, i le noataga o le filemu. E tasi le tino, e tasi foi le agaga faapea ona valaaaina ai outou i le faamoemoe e tasi, ua valaaaina ai outou. E tasi le Alii, e tasi le faatuatuaga, e tasi le papatisoga, e tasi le Atua, o le Tama foi lea o Tagata uma lava. O le mai luga o mea uma lava, o le i ai i meauma lava o lo o i totonu foi i mea uma lava.”* Ua ou manatu e tamua i i se upu a lenei Matagaluega, ua ou tatalogo Maaefau i le Paia ma le Mamalu o le tatou Palemene, o le mau faavae ia tatou loto gatasitasi.

Ua maea ona lauliliu le tofa ma le faautautaga i lena itu o le vai, lenei foi le itu o le vai i tuleiga ma saunoaga o le taumafai o le tatou Malo e talitali atu i lo outou finagalo faaalia. Peitai o nei mea uma afaia tatou te le loto gatasitasi, e tatou tatou te manaenae ma tatou taapeape atu lava ma o tatou nutilili ai ona lelea loa lea e le matagi ma laumea e toli e le savili.

A o le leo lava ia o lenei Matagaluega, le paia e ma le mamalu mauluga o lenei Palemene e ala i la outou faasoa ma lo outou saunoa mai, lagona a le agaga faafetai o lenei Matagaluega. O le Matagaluega ua ave iai le faatuatuaga a Samoa aua lona atinaeina o le eleele o le sami, o le vaomatua ma mea uma na tutupu talu mai le foafoaga a le Atua Silisilise mai le amataga. O le eleele e fesootai ai le tagata ma lona faasinomaga, fesootai ai le tagata ma lona tamaliaga, e fesootai ai le tagata ma lona fanua.

E momoli ai le agaga faafetai tele i le paia ma le mamalu, o saunoaga ma tuleiga, o fetalaiga sa outou saunoa mai ai a o faalogologo atu lenei Matagaluega i ona vaega eseese uma. O le Matagaluega lenei o lo o i lalo o le vaavaaiga a lenei Pulega o le tatou Matagaluega o le Esetete Tausi. O le Esetete Tausi na fausia mai le vaitau o Siamani ae tatou te le i tutoatasi. A tatou vaavaai ma tatou molimau ma tatou maimoa uma mai lea augatupulaga i lea augatupulaga i le matautia o lenei Faalapotopotoga o le Malo sa i ai Aisea? Sa i ai mea uma, uma na fau mea uma. O talo, fai, ufi, popo, koko, mea fafaga, soo se ituiga atinae, fasimoli, susu povi, aano o manufasi, ave i fafo, falelaupapa, popo ma sua so se mea na atoa. Peitai na oo mai loa i le 1990 ua faatuatuana loa. Ona aumai uma loa lea o fanua ma meatotino a le Esetete Tausi ua fau ai isi Matagaluega a le Malo ae tutu ai a na o le atigimea ua faatuatuana lona atinaeina. E faaleoina ai le agaga faafetai i le sa avea ma Ofisa Sili o Pulega o lenei Faalapotopotoga o le Esetete le Afioga ia Patea Setefano, ua fiu e faasalalau se isi e alu atu e fia pule i i, aisea? Ua matua tulaga faaletonu lava.

Peitai e le o mate ai le faamoemoe. E momoli ai le agaga faafetai i le aufaigaluega sa galulue mai lenei fia tausaga e oo mai le aso. Ona o lo outou talitonuga e i ai le taeao malama e oo atu le vaafaaola mo outolu. O le vaa faaola la lea ua i ai fuafuaga a le tatou Malo, ua faatuina le isi Matagaluega fou o le tatou Malo e taua o le Export Authority. Tapena nei tatou Matagaluega e tuufaatasi le Esetete Tausi ma le Matagaluega lenei e fesoasoani i le auina atu o oloa i fafo. E toe vailiili lelei le Tulafono na fausia

ai le Esetete Tausi mai taimi o Siamani ma maua ai polofiti ma tua i ai le Malo i le Tala o le Tupe, lea o le a tatou toe o lelei e toe vailili lelei le Tulafono lena ina ia mafai ona toe faatulaga lelei lenei atinae a le atunu, o loo totoe ai le 7-6 afe eka, toe pau a lena o le mea la e totoe o eleele o lo o i Mulifanua i le taimi lenei.

E faatulai ai se faiga paaga lelei ma tuuina atu i fafo i tulaga tau pisinisi sa fai ma gau i le atunu lautele, ae faatulaga lelei le lisiina o eleele i le atunu. Faatulaga nai kuaka eka aua nai aiga e manaomia eleele, faatulaga eka mo le aufaipisinisi, faatulaga foi ma eka mo i latou o le a sauni agai i le mechanization ma le commercialization o faatoaga tetele, ina ia fausia ai le atinaeina o le faatupulaia o taumafa o le tatou atunu. Ae toe nei o se aga ona maea loa lea o le lauliliuina o le Komiti Faapitoa ua tapena e le Matagaluega e aumai le lipoti po o le ituaiga transition e fai ai le mataupu lenei. Ma le talitonuga o i e toe faatulai mai ai lenei Faalapotopotoga tele a le tatou Malo i se tulaga sili ona lelei. Ua tuu atu i ai ma le tatou Export Authority e pei ona fesiligia e lau Afioga i le Taitai o le Itu Agai o le faamoemoe lena.

Ua tatau ona i ai se Matagaluega a le Malo e taitaia fua o faaeleelega ma le export a le Atunu. O le taimi lenei o lae o a exporters ia na o latou. E leai se faamalumaluga e pei ona ou tautala pea i le Palestine government to government level, government to government approach ma le fesoataiga faavaomalo e talai ai noataga, bio-security, quarantine, o le avatu o tatou oloa i inei e ave i atunu mamao.

O le mafaufauga lena o le tatou Faigamalo ma o se mea foi na agiga i le atunu a tulai mai le Faatuatua i le Atua Samoa ua Tasi, o le mea lea e fai. A maea loa ona fai le tulaga lea ile lauliliuina o le fetuunaiga ma le tuufatasiga, ona tatalo atu loa lea i lau Afioga i le Tamaitai Minisita o Tupe ma Matagaluega o Tupe e manaomia se 20-30 miliona e toe fai ai le tatou mataupu lea. Faatoa tagi atu a lea o le Esetete Tausi a o lea lava e te alofa pea i le Samoa Airways, totogi atu lea aitalafu, faamagalo atu lea aitalafu, avatu le isi aitalafu.

Ua ou manatu e aumai i lumamea Saoleitiiti ma le tatou Matagaluega o Tupe ia e alofagia le talosaga lena ua avatu. E le o se mea laitiiti le mafaufauga lea ua fetuunai atu. Ona o le faamoemoe e toe oso le la, ma e sau pea taeao malama e toe fotuai ai le faamoemoe o le avatuga o tatou oloa i fafo.

Saunoa nisi o sui fai mai ua oge le atunu, ua leai ni meaaano ioe, ua faapena ona vavao o le tali fai mai ua seasea i ai ni tautalo i le maketi, ua uma aso ia o le faulalai o faaputuga talo i le maketi.

Mo le silafia i le faafogofoga mai o le atunu, ua sui uiga o le maketi. Muamua i Samoa nei ua le toe mananao tagata e toe omai i Apia, na uma ifo a o amoga talo avifo luma le auala tele fola loa, fola mai a i Aleipata e tau i Falealupo e fola ai i ina. Ua le toe omai i Apia e pei o le mea sa tatou i ai, sa momoe ai

ma nonofo ai, tai lua a aso o tau faatau uta. Ae ua e vaai le taimi lenei talu na fai tatou uluai seleseloga na ona uma a mei i tafa ala alu loa. E le o toe iai se ki taofi ua alu, alu atu ai ma fagusea, alu atu ma limu, alu ifo ai ma meataulima, tatou o i le upu foi lele na ona pau atu a pau mai.

Malilie la i latou o lo o ola pea le maketi lea i le tulaga o le tulaga lena , ae a e manao e maua ni au talo lelei .Ona e tietie loa lea , tietie atu a iinei taamilo i Aleipata taamilo mai Siumu, Lefaga ma Faleaseela, e tou te molimauina lau upu lea ua avatu. O le suiga lena lea ua i ai le tatou maketi le taimi lenei. Ae a tuu i le fea sao o le upu lea oge, oge, o oe a ia. E leai a sesi o tatou o le Maota e leai sona faasinomaga, leai sana au tautua leai se mea e tua i ai ia ona tupu loa lea o le mea lena, ua alu atu e manao e faatau le tautalo \$10 ae \$40 talo ua sui aga a le Maketi. O aso ia sa na o le tai 50 container talo sa ave, ua faatupulaia ua i luga atu i le 20 container i le masina lea ua alu .

Ua matua o a nai o tatou tagata e saili maketi i le mea e lau i talo, ulu, ufi, manioka. O mea eseese na ua outou silafia, maua foi le tatou faiga fou lea na fai nei e le tatou SROS, faaaisa its a new method e aulia ai e le ulu, talo ma mea uma ia le frozen commodities 6-7 masina o faatau ae le o tuua ai lava le tatou agai e ave tatou oloa i le tulaga tau felesi, ave le vaa a lalo, toe ave i le vaalele.

E tolu vaiaso talu ai faatoa tatou toe faataitai ai lea i le Air Freight, sau ai foi se tasi o tamalii o le tatou atunuu ave ai le tatou 200 tagatalo felesi. Aisea? E ese le quality o le talo e avatu i le vaa a lalo, ese le quality o le talo e ave i le vaalele. Aua foi o le vaa a lalo e tolu vaiaso faatoa taunuu, avatu lea ave i le quarantine ave faaasu, e uma ane ua fa vaiaso talu onafafai le talo faatoa ave i fafo. A o le vaalele, e fa itula talu ona uma onafafai, avatu loa ave sao i lima o le maketi.

O le uiga lena o lau faamatalaga le paia o le Palemene, ua sui aga a le tatou maketi ona o le tulaga o le fesuiaga o mea o lo o tutupu mai.

Le tatou Matagaluega o Faatoaga ma Faiga Faiva...

**Afioga Leaana Ronnie Posini:** Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita se i tuu atu le avanoa i le sui usufono o Safata 1 lea sa taua le oge o le atunuu.

**Afioga Leaana Ronnie Posini:** Faafetai tele i lau Afioga. E leai lava se manatu e faalavelave i le saunoaga matagofie a le Afioga i le Minisita o Faatoaga, a o le agaga lea lea sa tau molimoli atu, o lea foi sa saunoa lau Afioga ua tuuaiina lou tagata ma lenei itumalo ia faaleaga le tulaga ole Uluai Seleseloga. O lena la lea sa ou taumafai atu ai, lena e i ai faamaumauga i totonu o lau lauga sa fai, na ou faafetai tele i le mea lea o Uluai Seleseloga. A o lau matau lea na ou fai atu ai, ona o au lea ou te nofo i tua ma ou agai

mai le auala i taeao uma ma aso uma, ua le maua le tele o tautalo lea e masani ona fola i le auala e pei o lea na e saunoa.

O le ala lea na ala ai ona ou fai atu, o lea o lo o i ai le oge i totonu o le tatou atunu. E oo foi la i le maketi, e oo foi la i le tau o faaeelaga ia. E pei o le agaga lea.

**Susuga Hon LAAULI LEUATEA POLATAIVAO FOSI:** O lea ua ou maua lau Afioga i le Fofoga Fatalai.

**FOFOGA FETALAI:** O lea ua maua. Ia se i saunoa mai lau Afioga i le Minisita.

**Susuga Hon LAAULI LEUATEA POLATAIVAO FOSI:** Ua e vave tu mai ae ou te le io o atu ia oe. O le oge lea na ou talanoa atu ai. Se i ou oo atu ona e tu mai lea.

O le faamoemoe o le tatou Matagaluega o Faatoaga ma Faiga Faiva i tatou polokalame faalauiroa ia ua alu atu nei, le mea lenei o le mafaufauga pe faapefea ona tatou tauaveina le manulauti lea ua momoli mai e Malo Aufaaatasi ma le popolega i le lalolagi o le sioti o meaai i totonu o le atunu. Na matua momoli mai e le FAO mai le United Nation le popolega i le Food Security o le lalolagi atoa e aafia ai ma tatou i Samoa, lea na fai mai ai le semina tele lea na omai ai nei le SIDs i inei, lea na matua momoli mai le mau lenei. O le a le tali a Samoa? O le a le tapenaga a Samoa i le mea lenei, o le upu tonu lava lea ua tatou matananana i ai fai mai ua oge? O le a le tali a Samoa? O le tali lea a Samoa lea na momoli, mai lava i le tatou uluui tala o le Tupe, na liliu ai le fuafuaga o le mea lenei sa tatou faia mai lenei fia sefulu tausaga e \$500,000 le paketi, ae na o le lua lava faaaliga sa fai ai. E tasi i Apia i le eleele fou po o le Malaefatu, tasi i Salelologa. Ina ua tulai mai le tatou faigamalo, na liliu ai loa le tofa lea. Aua ne i toe malaga mai le aufaifaatoaga i le taulaga, ae tatou o i nuu ma itumalo, lea sa faatino ai loa i le tausaga muamua. Na faatino la, faatino e tau o le Talomua, lea sa aumai uma ai, o ai uma i latou o asosi a le aufaifaatoaga ma le aufaifaiva omai ae o atu le tatou Matagaluega. Ae na pasi loa le tatou paketi o lea o le a faauma, ona liliu loa lea o le Uluai Seleselega.

Ou te manatu e le toe tau faamatala atu sau upu, o lea ua maimoa Samoa i le uiga ma le aano moni o le mataupu lenei. E le tau aoaia e Laupua Tamafaiga i le atunu, o la e silafia e Samoa, leaga e le fou. Seiavagana se Samoa na ola mai fafo ona le malamalamama lea i le mea lea e tau faamalamalamata atu. O fea tatou te tua i ai? E le sau le isi aiga e aumai le meaai i luga o le laulau a le isi aiga. E le omai le isi nuu e fafaga le isi nuu, tulou, e tua lava tatou mo tatou. O le ala lea o le polokalame lea e faasopolia uma ai le atunu atoa i tatou uluui seleselega na avatu. A o le faamoemoe la, e vaevae lelei le \$500,000 lea e tai \$10,000 a le itumalo, lea la na faasoasoa

atu ai i le paia ma le mamalu maualuga lava o le tatou mafutaga nei. E oo lava i le Afioga i le Tamaitai Palemia, le Afioga i le Sui Palemia ma le Kapaneta atoa, na fai uma Uluai Seleselega. E le o se mea lena lea sa avatu ai le agaga faafetai, ona o i latou na tali mai. Lea na pau lea o le auala tatou te tua i ai i le taimi lenei, le taimi lenei o lea ua alaga, ua oge, ua taugata le soifuaga. O le a la le tatou mea e fai? O le a le tapenaga a Samoa mo le mea lea? Le paia o le Palemene, o le tapenaga lea, tatou toe agai e faatuputeleina le totoina o le fofoga taumafa o le atunuu, lava meaaano, fualaau taumafamata, fualaau faisua, ia ma ituaiga mea eseese e gaosi ai taumafa. Fafaga ia lava a tatou povi,fafaga ia lava a tatou puua, tatou moa, tatou mamoe, ona uma loa lea o le mea lea tatou te vevesi ai o le tatou ola faalagolago i meaai mai fafo.

O faamaumauga a le Matagaluega e pei ona taumafai atu le Minisita Lagolago, aua e molimau Minisita Lagolago, masalo e sili atu Uluai Seleselega na afio ai le Afioga i le Minisita Lagolago nai lo au. Atonu sa faitio mai foi nisi ua ou vaai maualalo i nisi o outou itumalo, e faamalulu atu, faamalulu atu lava i le tulaga lea, leaga o la e faafogfa mai nisi o itumalo, ua sau le Minisita Lagolago fai mai, se ua tau sa'i mai itumalo pe a e le afio atu Laauli. E le mafai ona tuua tiute faale-Kapaneta pe a faapea e le talafeagai pe a ou malaga foi i fafo. A o lou leo, e fai ma fofoga taumomoli le Afioga i le Minisita Lagolago, lea na saunoa ai i le vaiaso lenei, e 50 i le 60 i le 70 container moa 40 futu, fresh chicken meat lea tatou te aai i le masina, i le masina e tasi lea tatou te oka mai Amerika, e faatusatusa lea i le 7 i le 6 miliona moa atoa lea e tali ai le sua a le atunuu.

Le Palemene, ua outou faafogfa i le mea lenei, ua tatou faatuatua tele i le moa mai fafo. O lea na ona tata logo atu lava Masefau ma momoli atu polokalame, o lea e faataavalevale atu, o le lauga lava lea o le tatou Uluai Seleselega lea e avatu. Le paia ma le mamalu maualuga o le aufaifaatoaga, toaaga tatou te toe foi e fafaga a tatou mea fafaga. E ova atu ma le \$100 miliona le tatou foreign reserve lea e alu i mea ia, e oo lava i le kapisi lapotopoto, e oo lava i le kapisi Saina ua aumai mai fafo. A o le a la le tatou tali atu i le mea lea? O lea e ola lausiusi mea uma i le tatou atunuu. O le ala lea o le momoli atu o tatou faaaliga nei ma o atu le Matagaluega e avatu mea uma mo le faaleleiga o tatou Uluai Seleselega.

O le Uluai Seleselega a Safata 1, o mea nei ave ai, 50 sapelu, 50 ili naifi, 20 suo, 20 piki, 20 oso, 10 fanavao, 100 seeds eseese, 250 koko, 250 niu, ma ituaiga o fualaau taumafamata ma fualaau tau faisua. Na momoli foi i ai ma le meaalofa e 200 faisua, 200 tilapia, o aliao ma limufuafua. O le faatupega o mea uma nei lau Afioga i le Fofoga Fetalai, e i totonu o le \$10,000 lea...

**Afioga Leaana Ronnie Posini:** Lau Afioga i le Fofoga Fetalai...

**Susuga Hon LAAULI LEUATEA POLATAIVAO FOSI:** Se i onosai mai, onosai mai, malie se i faasolo atu pea.

**FOFOGA FETALAI:** E i ai lava lou taimi, se i faamaea atu lou itumalo e i ai lou taimi.

**Susuga Hon LAAULI LEUATEA POLATAIVAO FOSI:** O mea uma nei i totonu o le \$10,000 lea na faasoa atu. A faatupe la mea uma nei o meaalofa nei na faaoloa atu, e \$7,000 ma le \$3,000 e avatu sao lava i lou aao e te fesoasoani i le faleie ma mea uma nei na fai. O oulua uma ma le Taitai o le Itu Agai, e tutusa lelei mea na folafola atu mo oulua.

**Afioga Leaana Ronnie Posini:** Lau Afioga i le Fofoga Fatalai...

**FOFOGA FETALAI:** Ia, malie ia lau Afioga i le Minisita se i tuu atu ia le avanoa i le sui usufono mo Safata 1 leaga o lea ua taua lona itumalo.

**Afioga Leaana Ronnie Posini:** Ou te faafetai tele i le Afioga i le Minisita o Faatoaga i tolaulauga ia na tolaulau mai. Ou te talitonu lava e sao lelei le tolaulauga lea e i ai, ae le i oo atu lava le tupe lau Afioga, aua o lea e te taua le \$3,000 lea, ua ta fiu e faatalitali. Se i e alofa ifo po o fea o i ai lena \$3,000, e leai se tupe o i ai. Ma le agaga faaaloalo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fatalai...

**FOFOGA FETALAI:** Ia mo le faasaoina o le taimi o le Minisita, se i tulai mai le Afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ioe mo le faasaoina o le taimi o le... O au nei o lea ou te le malamalama po o le a le mea ua taua ai fua mea ia. Ou te le i fesili pe fia ni mea na aumai i lou itumalo, sa ou fesili i o i le sui usufono le la, o a mea na momoli atu i le latou Uluai Seleselega, a o lea o le a te'i lava ua faamalaulau mai fua. A o le \$3,000, faafetai, o la e na maua. Ia o lea la na eseese ai maua... o la e na maua le \$3,000. O le isi vaega o le \$3,000, lea sa fai ai le teutusi a lau Minisita Lagolago, ae o le isi vaega, sa fai ai le teutusi a le faifeau. Ia ma le isi vaega sa tufatufa tai \$20. Ia faafetai.

**Susuga Hon LAAULI LEUATEA POLATAIVAO FOSI:** Malo faafetai.

**FOFOGA FETALAI:** Ia, tulai mai lau Afioga i le Minisita.

**Susuga Hon LAAULI LEUATEA POLATAIVAO FOSI:** Lau Afioga i le Taitai o le Itu Agai, e leai onosai mai o lea e faasolo atu lava.

Leaana, matou te le faasoaina se tupe, e faaupu au, ae transfer e le Matagaluega o Tupe le tupe i totonu o le tou fono faavae. Afai la o tuai, e le o au ma le Matagaluega. O le faamalamalamaga saoga lena, ae lava mai le onosai.

**Afioga Leaana Ronnie Posini:** Lau Afioga i le Fofoga Fatalai...

**Susuga Hon LAAULI LEUATEA POLATAIVAO FOSI:** Ae lava mai le onosai, lava mai le onosai.

**Afioga Leaana Ronnie Posini:** Leaga o lea ua saunoa le Minisita, faatoa uma nei lava lana saunoaga, na tuusao atu lava ia te au le tupe, a o lea e leai se tupe. Se se i tau ata ia lau Afioga i le Minisita.

**Susuga Hon LAAULI LEUATEA POLATAIVAO FOSI:** Leaana, se i faasolo atu. Ona ou maua lea o le tala mulimuli, sa ou le Fono i le aso Faraile, ae ua ou maua le tala mulimuli, ua lua toe ula i le Uluai Seleselega na avatu, ma oulua faia upu faalumaluma e uiga i le faaaloalo ma le taumafai atu a le Matagaluega. Ioe. O le a le mea na lua le saunoa ai i le Palestene i mea na avatu a ua lua saunoa fai mai e uilipaelo ma le afa Saleaula, ma nai a ea nai isi mea laiti ou te le iloa po o le a. Ioe. O le agaga lea ua ou manatu e faaali atu lua Afioga i sui usufono, ana ou iloa e te lua faapea e le maimaua se taimi o le Matagalauaega ma ou alu atu e faatino le lua Uluai Seleselega. O le upu sao lava lena, ona o i sa ou popole ai i le ituaiga uiga lea. Faatoa tupu lava lea o se mea o le o atu o le Malo e avatu se faaaloalo ae lua tulai mai le Maota lenei ma fai mai uiga e faifai i le faaaloalo tele a le tatou Malo na avatu.

**Afioga Leaana Ronnie Posini:** Lau Afioga i le Fofoga Fatalai...

**Susuga Hon LAAULI LEUATEA POLATAIVAO FOSI:** Faatali! faatali se i uma atu lau tala. Faatali, se i uma atu.

**FOFOGA FETALAI:** Malie le sui usufono se i uma mai le saunoaga a le Minisita.

**Susuga Hon LAAULI LEUATEA POLATAIVAO FOSI:** O lea la ua tonu ai i lou manatu i le tatou Paeaiga lea pe a pasi nei le tatou Tala o le Tupe, ia, o le a liuliu le tofa ia Maiava po o le a le mea o le a fai ia oulua. O le upu sao lava lena. Afai tou te le talisapaia le taumafai atu a le tatou faigamalo ae tatou toe omai i totonu o le Maota lenei ma faatalasua ma

faatalaula i ai, ona ou manatu lea, tou te le talia le faaaloalo. E faamalulu atu ai i le faafofoga mai a le itumalo...

**Afioga Leaana Ronnie Posini:** Lau Afioga i le Fofoga Fetalai ona o lea ua matau atu o lea ua...

**Susuga Hon LAAULI LEUATEA POLATAIVAO FOSI:** Ioe. E faamalulu atu lava i le... o lea e i i ia te au faamaumauga o upu na oululafo...

**Afioga Leaana Ronnie Posini:** Ua matau atu o lea ua... i le saunoaga a le Afioga i le Minisita...

**Susuga Hon LAAULI LEUATEA POLATAIVAO FOSI:** O le upu na saunoa i ai le itumalo, Leaana, ua uma taimi o fefulituaaiga, o lea ua omai e faifaatasi le tatou faigamalo ma fai mea uma. A o le a le mea lea e te fai mai? E oo i le tupe lea ua e fesili po o le a le mea ua tuai atu ai. E te le talisapaia ma e tali faaaloalo le mea lea e taumafai atu, e te tulai mai lava e faaleaga ma e faaoloataua le taumafai atu o le Matagaluega. O le mea la lea ua ou manatu, e tatau lava ona momoli atu...

**Afioga Leaana Ronnie Posini:** Lau Afioga i le Fofoga Fetalai leai o se mea e fia faamalamalama i le saunoaga a le Minisita o Faatoaga. O le matou fono faavae a le matou itumalo, e fa nuu o lo o i ai. Na tapena lelei le Uluai Seleselega. O le iuga a le matou fono faavae, a aumai meaalofa ia a le Matagaluega o Faatoaga, e vaevae tutusa uma. Mo le silafia o la e faafogafoga mai le matou itumalo ma le fono faavae, e vaevae tutusa uma. Ona oo loa lea ua avatu meafaigaluega ia, e avatu e 10 fanavao. Ia o la e talasua toeaiina i le... ua avatu e 10 ae fa nuu. Ia ona faapea loa lea, toe lava isi toeaiina fai mai, ia vae afa loa le isi fanavao. E leai o la e faalogologo mai le matou itumalo. Ae le faapea o ni uiga e omai e fai ni faaleaga i totonu o le tatou Palemene nei. E leai se mea faapena. O le agaga o le agaga e faataua le tulaga lea.

**Susuga Hon LAAULI LEUATEA POLATAIVAO FOSI:** Lau Afioga i le sui usufono, e i ai e faalele, ae i ai e matau.

**FOFOGA FETALAI:** O lea ua maua atu le faauilavea. Ia se i tulai mai lau Afioga i le Minisita.

**Susuga Hon LAAULI LEUATEA POLATAIVAO FOSI:** Afai ni talasua, tatou sua i fafo i le tatou ti. A o le faalogologo mai lea o Samoa o fai

upu ia, e le logomalie i le faafofoga a le atunuu. E le logomalie. A lea e te agai mai lava, o le a le mea ua tuai mai ai le tupe?

Le paia o le Aiga Satunumafono, e faamalulu atu, ne i avea lape o upu ma mea uma o lea ua saunoa i ai la outou sui usufono, ne i te i ua outou faapea e le manatu atu. E tumu i le faaaloalo. Ma o le ala foi lea na ala ai ona ou alu atu. Ae ana ou iloa, e sili lava pe a ave i le Island, Farmer and Fishery Association na omai fai. Ioe.

**Afioga Leaana Ronnie Posini:** Lau Afioga i le Fofoga Fetalai, e leai o la e faalogologo mai le matou itumalo.

**Susuga Hon LAAULI LEUATEA POLATAIVAO FOSI:** O le mea lena. Leaana, o lea ua ou fai atu...

**Afioga Leaana Ronnie Posini:** A lea ua e saunoa sao mai lava fai mai e tuu mai sao le \$3,000 ia te au...

**Susuga Hon LAAULI LEUATEA POLATAIVAO FOSI:** O lea ua ou fai atu, e te le tulia fua upu o au e ona upu.

**Afioga Leaana Ronnie Posini:** A o lea ua ou tali atu, e leai se tupe o aumaia. A lea na e saunoa sao mai?

**Susuga Hon LAAULI LEUATEA POLATAIVAO FOSI:** O la e faatali. A lea ua maua le tupe a Fonotoe?

**Afioga Leaana Ronnie Posini:** E le i oo mai se \$3,000 lea na e saunoa sao mai ai ananei.

**Susuga Hon LAAULI LEUATEA POLATAIVAO FOSI:**  
E te naunau pea ma tulituliaupu sese, ae te le vaai i le aano moni.

**Afioga Leaana Ronnie Posini:** E leai leaga o lafoga a o lea e faalogologo le atunuu. E leai se tupe ua oo mai.

**FOFOGA FETALAI:** E i ai le manatu o le Nofoa, leaga o lea e faafogafoga le Maota ma le atunuu, ae malilie...

**Susuga Hon LAAULI LEUATEA POLATAIVAO FOSI:** Ia ua lelei. E oo atu, e oo atu. Ae maua pea le to'a o le tai ma le... Lau Afioga i le Fofoga Fetalai o le agaga lea na manatu ai leaga o lea lava e tupu le mea lea o le faaoloataua ma faaleagaina ai se fuafuaga lelei o lo o faasolo mo le lumanai aua le taumafai atu a lenei Matagaluega.

Saunoa nisi o sui usufono e ala i le taumafaiga o le mea lenei o le tatou falemoa, lea ua uma ona ou faasilasila muamua foi i le tatou atunu. Ua taunu mai le talosaga a se tasi o kamupani moa tele i Ausetalia ma Ierusalem, e taumafai e fai le mea lea na saunoa i ai le Afioga i le sui usufono mo Lefaga ma Faleaseela, e faatinoina ai falemoa i totonu o fono faavae taitasi pe a faapea e manaomia. A o le taimi lenei o lea ua faatulaga atu le tatou polokalame lea ua faasoaa atu i tatou moa Samoa lena ua alu atu, e tufatufaina ai moa tai 10 ma tagameaai e ala i le tatou falemoa o la ua i uta i Nuu e ala i le tatou polokalame a tatou ma le Malo o Saina o le SACEP, maua ai le aofaiga o le 10,000 tatou moa o lo o faatuufua ma maua ai fuamoa, ma toe faafaillele ma toe fofoa, faasolo atu lava le tulaga o le tatou atinae moa lenei. Aisea? E talitonu e lava ma totoe tulaga uma o le maua ai lava o le tatou moa masani e pei ona i ai. E \$3 miliona o lo o i ai nei i lalo o le tatou World Bank e faatuputeleina ai le tatou atinae lenei ina ia maua le avanoa mo le aufaifaatoaga moa uma o le tatou atunu a o loloma ai le faamoemoe lea.

O le atinae moa lea sa taua mai Ausetalia, lea na matou asiasi i ai i le malaga sa o i Ausetalia, o se atinae tele ma e tele lona tupe e faatinoina ai. Na omai ma le latou proposal e aumai ma le talosaga e manaomia le guarantee a le Malo, ou fai atu, e le toe mafai, e le toe mafai ona fai le mea lena o le guarantee e le Malo, ua faasa. Ae o outou e sue mai se tou investor e sau e fund le mea lea. O la e la ua maua le latou investor, ae faaiuiu mea uma, ia omai lava latou ma latou tupe e faatino ai le faatuina o le latou atinae lenei i le atunu. O le faamoemoega, ina ia aua ne i tatou toe ola faalagolago i le mea lea sa ou taua muamua e ala i lafumoa, ae tatou ola faalagolago i mea e fofoa i le atunu e maua ai fuamoa, maua ai moa fasi felesi, e le gata ina serve ai le tatou local market, ae faatauina atu i Tutuila ma isi atunu a tuaoi. Ma o le auala foi lea e faatuputeleina ai le tulaga o totonu o fono faavae a itumalo pe a faapea e manaomia lea tulaga.

E faataua le tulaga o le...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai o se mea e fia faamalamalama...

**FOFOGA FETALAI:** Malie lava lau Afioga i le Minisita se i tulai mai le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Faafetai. Ou te tulai atu ona o lo o fuafua foi e si a matou itumalo i lalo o le polokalame lea i nai pamo. Ae ou te talitonu o se atinae taua tele. E le natia tulaga o la e fia maua se fesoasoani foi i vaega ia, a o lea la e faalogologo atu, e manaia tele le polokalame a le Afioga i le Minisita, e momoli atu ai le faafetai. Faafetai i lau Afioga.

Pau lava le mea foi lele o lea ua ou tulai ai, i sau saunoaga ina ne i faapopoleina ai le aufaipisinisi, aua afai e 40 container i le masina, ina ne i te i ua manatu ai o le a le toe aumaia e latou se moa, ona afaina ai lea o nai a latou pisinisi. Ae po o le a se faiga e fuafua foi lea ina ne i fai fai a tatou atinae pamoae taou vaai atu ua tapunipuni mai kamupani ma wholesale a nai toeaiina ia e fai latou wholesale. Ae po o le a se tulaga faapena foi lea i fuafuaga alualumamao a lau Afioga.

**FOFOGA FETALAI:** Ia lau Afioga i le Minisita.

**Susuga Hon LAAULI LEUATEA POLATAIVAO FOSI:** Lea ua maua lau Afioga i le Fofoga Fetalai. Se o le moa na o le tasi lava le product, a o le faipisinisi e selau miliona ana products o la e sell ae fua i le mea o i ai le manaomiaga o le atunu i le taimi lenei. O le a le mea lea ua vevesi ai? Ua sii le tau o le pusamo. Ua taugata le tau o le pusamo. O le a le tatou tali i le mea lea? Fafaga au moa. Fafaga ni au moa se 300 po o se 400, ai lava lau moa i aso uma. Fafaga ni au puua se 52, taumafa lava lau puua i vaiaso uma. Fafaga ni au povit se 12, taumafa lau povit i masina uma. It's a very simple formulation of food security. Ia ona le toe pisa loa lea. O le tali lena...

**Tofa Ale Vena Ale:** Lau Afioga i le Fofoga Fetalai faamolemole...

**FOFOGA FETALAI:** Malie lau Afioga i le Minisita, se i tulai mai le sui usufono mo Faleata 4.

**Tofa Ale Vena Ale:** Faafetai i lau Afioga i le Fofoga Fetalai mo le avanoa. Lau Afioga i le Minisita o Faatoaga, o le mea lea e tau fesili atu ai, ona o moa ia a le tatou atunu, sole, e matua fefeu lava. O moa la ia lea e i le polokalame lea lau Afioga e tutusa ma moa ia faamolemole lau Afioga? O lea foi la ua agai atu se mafaufau o Faleata 4 i se atinae pei o le mea foi lea e saunoa i ai le Taitai o le Itu Agai. Faafetai.

**FOFOGA FETALAI:** Tulai mai le Afioga i le Minisita.

**Susuga Hon LAAULI LEUATEA POLATAIVAO FOSI:** Ia, o lea ua ou maua. Ua tatou masani i le tatou moa Samoa, e le o se mea fou le fefeu. Na tatou ivi mai lava ma le fefeu lea faatoa tatou fananau mai. A o le moa lea, na o augagase, augagase, augagase. E te le vaai lava i se moa o i ai ni mea lololo po o a ni mea. Organic, e matua tumu i mea o minerale eseese e faalelei ai le tino o le tagata. A lea tatou te taumamafa nei i tama foi ia lea fai mai nei na o le tasi lava le masina ua lua kilo. E tatou te le iloa po o a mea o tatui ai i totonu. You never know. Ae o le agaga lena, tatou toe foi i le

mea sa tatou masani ai. Ua tatou iloa, tatou masani i le tatou faailao ma le moepilima e maua ai le tatou taumafataga.

O le mea lea e saunoa i ai le Afioga i le Taitai o le Itu Agai, aua e te popole...

**Susuga Maulolo Tavita Amosa:** Pe i ai se avanoa faamolemole lau Afioga?

**FOFOGA FETALAI:** Se i maea le tali a le Minisita i le Taitai o le Itu Agai.

**Susuga Hon LAAULI LEUATEA POLATAIVAO FOSI:** E faifaimalie lava le process lea e le faapea e patatu loa tupu i le taimi e tasi, e faifai phase le mea. E muamua aumai le fuamoia e faatupu e fofoa, ona faasolo atu lea ina maua le tamaimoa faalapopoa ave i tua faafeusuai, maua fuamoia toe aumai foi toe faasolo atu. E faapena.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, o le fesili e fia malamalamama, leaga o lea ua saunoa le Afioga i le Minisita, e amata mai le fuamoia, ae po o fea la o i ai moa na maua ai fuamoia? O au la lea ua le malamalamama, ua te i lava ua oo mai nei fuamoia, a o fea la o i ai moa na maua mai ai fuamoia.

**FOFOGA FETALAI:** Ia, o lea ua maua...

**Susuga Maulolo Tavita Amosa:** Lau Afioga i le Fofoga Fetalai...

**FOFOGA FETALAI:** Ia o le faafetauiga lava o upu, a o le agaga lava ia o la e sao lava le saunoaga a le Minisita.

Se i tulai mai le sui usufono mo Sagaga 2.

**Susuga Maulolo Tavita Amosa:** Lau Afioga i le Fofoga Fetalai, ia e leai e tau ese laitiiti lava lau mataupu. Sa ou tautala i le mea lea o le faaitiitia o faamai pipisi ma faamai le pipisi. O le popolega pe le maua ai le beds flu i mea ia ua aumai nei i le tatou atunu. O le mea moni lava sa fai au moa, o la e faafofoga mai le vaega lea o le Ofisa o Faatoaga, na oo lea i le 40+ moa, ae tasi la le taimi na maua ai i le faamai alu uma lava. E taunu atu la le fomai mai le Ofisa o Faatoaga ua 3 aso ae pe toe 5 lava nai moa la e survive mai ai. A o le popolega la, ona o le upu sa aumai, e fai ma vave cure faamai faapea leaga e mafai ona pipisi atu i taifau se i tulou, ma e ono aafia ai foi le soifua o tagata.

Ia pei o le ala lea o le faafesili atu i le tele o moa lea e lau mai.

**Susuga Hon LAAULI LEUATEA POLATAIVAO FOSI:** O le fesili a le Taitai o le Itu Agai po o fea e aumai ai moa ia e leai ni fuamoa... lea e aumai ai fuamoa ae leai ni moa, e muamua aumai muamua fuamoa mai fafo, fertilizer eggs, o i ina e amata ai. Listen very carefully. O lea e faamalamalama atu.

E muamua... a faapea o le a amata le faamoemoe lenei, masalo e aumai se 100,000 fuamoa ona aumai loa lea ave i masini e tau o incubators, ona fofoa loa lea o tamaimoa, ona amata loa lea o le food chain system lena. A outou fia malamalamalama pe tou faamaonia lau tala, o la e ua amata i uta i Nuu i le small scale, la e maua ai nei tamaimoa lea ua ave nei i tua i le aufaifaatoaga moa la e maua ai le 10 i Savaii ma le 10 i inei. Na maua mai fuamoa mai fafo ona aumai loa lea ave faafaillele i totonu o masini nei incubators ona maua ai loa lea o tamaimoa ona tausi ai lea ia malolosi ma ave loa i tua i faifaatoaga. Ona feusuai ai loa lea, tulou le afiafi o moa ia ma maua ai isi fuamoa ma lau mai foi ma faafofoa atu i i. E tatou te le toe o i le system tuai seiloga e tatao le matuamoa faatoa maua le tamaimoa. E leai. E maua loa fuamoa ona aumai loa lea faafofoa atu i masini, e vave. A tatou o i le mea masani, ia lena ua outou iloa, tatou te o e tau sue le pusa, ave lausului, ave pepa, e tau faamoe le matuamoa ia fofoa. A o le mea lea ua sui. I le tulaga lautele la pei ona tau faamalamalama i le le malamalamalama o le Taitai ia o le Itu Agai, e aumai muamua fuamoa mai fafo faafofoa, ia ona amata loa lea o le tatou...

O se mafaufauga na amata laiti faapea i uta i le tatou Matagaluega o le Livestock. O la e foi e fai i uta. A outou afifio i le Livestock, o la e i ai moa na aumai mai le atunu atoa na ao uma mai ai tatou toa, o matuamoa, o saveu. O la e fai foi i uta i Vaea, a o lea ua faatuputeleina i le polokalame lea a le Malo o Saina, ia lea la ua faasolo i le taimi lenei. E le i lalo ifo i le 10,000 tamaimoa lea ua taufatufa atu i tua.

Ua i ai le polokalame fou lea ua faaulufale mai e le World Bank e \$3 miliona e amata ai le faafailleleina o le free range o moa Samoa. E lagona lou agaga faafetai i le World Bank, ona o le amataga lea, le amataga lea tatou te toe o lava e toe fafaga a tatou moa Samoa. E le fafaga i nisi o meaai e pei o le mea lea na i ai i le taimi lenei e le maua ai le mea sa tatou masani ai. O lena tout e iloa uma lava le manogi o le moa Samoa pe a supo, e le taitai tutusa ma le moa lea ua taumamafa ai nei le atunu.

E momoli le agaga faafetai i le Afioga i le Minisita o Taavaleafi ma le Minisita o Tiute, le Sui Palemia ona ua toe faataga le avanoa mo taavale a le aufaifaatoaga. Sa faatapu i luga o le 10 tausaga, a o lea ua tatala le avanoa e aumai ai taavale a le aufaifaatoaga e ova atu i le 20 tausaga le matua o taavale. Ona pau nei o taavale e oo i uta i le mea la e i uta, le mea o lo o 20 tausaga lea ua tapena nei i ai. E le o toe mamao ae uma mai le faiga faavae e mafai ai ona talosaga mai le aufaifaatoaga. O le tele o nai isi taavale la e laina i tai i le uafu se i pasi le Tulafono.

A o le agaga faafetai lena o lea ua momoli mai le faatagaga e fesoasoani mo le aufaifaatoaga. E momoli le agaga faafetai i manatu na aumai e ala i le faaopoopoina o tatou fale asiisi i Itumalo. O i inei Upolu e tatau ona faaopoopo nisi fale asiisi Itumalo se lua e mamao tele le va o Falealili ma toe taamilo mai Atu Anoamaa, o lea e fuafua ai se isi fale i ina a le o Anoamaa 1 po o Anoamaa 2 ma se mea e tasi i Fale Vaimauga ma Aleipatai. Ina ia mafai ona latalata le mea e o iai le aufaifaatoaga e aumai ai fatulaau ma alu atu le asiisi Itumalo e asiisi uma atu outou i ni mea o lo o manaomia.

O lo o faagasolo pea polokalame lena e silafia e le Atunu, koko, niu, o lo o ave iai le tatou faamuamua. E ese foi le tufaga meafaigaluega lena e alu atu i ina, na e fai ai Semina i totonu o fale asiisi Itumalo na e aveatu ai le faamalosi i a tatou mea nei e lua o lo o agai I ai le faamoemoe. Pau nei o oloa sa tatou ola mai ai, o le toe faamalosiga o le tatou popo ma le tatou koko. O le tatou niu inu ia e le toe tau fai atu leaga o lea ua faasa le tatou niu inu, lea ua tatou vaai le niu inu i le taimi lenei i Samoa lea ua le i lalo ifo ma le \$5.00 lona tau. O le tau o le popo na o le 60sene, e laki pe a oo i se \$1.00 a o lea foi e toe taumafai le Matagaluega ia fai ese a mea e tau o niu inu ina ia maua pea foi le maketi e faatau sao ai le niu lea e maua ai le \$6.00, \$7.00 Niu Sila i le niu e tasi ae aua le taofiofia fua i le taofiofiga o le tatou peepee nei tatou popole nei le toe maua se tatou peepee.

O le tatalo a le Matagaluega i le paia ma le maualuga oa outou Afioga i alii Faipule ia outou alofagia le mea lea o le manuainiu. Ou te tatalo atu i Taitaifono uma o Komiti o tatou Fono Faavae ia outou alofagia le mea lea o se matua faamai leaga le mea lea ua tatou i ai i le manuainiu ma e le tatau ona outou faatali sei o atu le Matagaluega ua toagaogao le Matagaluega. Ae ia outou alofagia ia apoapoi i tatou Nuu ma Afioaga na ua tele tatou meafaigaluega, o iliafi, o to'i o sapelu, o naifi. Na tou te iloa le auala e fai ai faatamai organiu ma faaputu ma ao le afato, e aveese ai le mea lea ua tupu, ua matua tele le aafiaga o tatou toganiu ma le fua o niu talu le faamai lea. Ua ou tatalo atu ai ma le agaga maualalo i le paia ma le mamalu o le tatou Fono Faavae se outou alofagia.

O lona lua ou te tatalo atu ina ia outou alofagia e tuusai uma a tatou meafafaga, taumafai i polokalame lea ua aveatu a le tatou miliona tala ia outou alofagia fai lelei ni pa e tuu pa ai povia puaa. O le lipoti lea na oo mai ia te au ananafi i le Faalapotopotoga a le aufaifaatoaga i Savaii, ua matua malosi le puaa aivao faapea foi i tatou i Tumua nei. Ua matuai malosi, ua sili atu le saoasaoa o le aai a puaa i lo le tatou faaaoga. Ma ou te tatalo atu foi i le tulaga lea i le paia ma le mamalu maualuga a outou Afioga i Taitaifono ma le faafofoga mai foi a le tatou Atunu i le Pulega mamalu a Alii ma Faipule ia outou alofagia le talosaga a le Matagaluega tatou tutufaatasi ma tatou lotogatasitasi i le foia o le fafitauli lenei o le puaa aivao. O lo o taumafai pea le tulaga o le Matagaluega i mailei eseese, ua oo lava foi i le tulaga o mailei eseese ua oo foi lava i le tulaga o le talosaga a le matagaluega

o Leoleo ma Falepuipui o lo o iai auupega malolosi, tatou toe foi le mea lea o le huntering, hunters, o e tutuli, faaaoga ai tagata tutuli o nuu ma afioaga e faaaoga ina ia vave na foia le faafitauli lenei. Aua o le mea lava lea e tupu e saosaoa atu le faaleaga ma le taumamafa a puua ia ona oo loa lea i le tulaga lea e faitio mai ai nisi o lena itu, sioki meataumafa ma le meaaano.

E tatala i le masina fou le Falemoa a Frankie lea ua outou faafogofa mai foi, o le falemoa lea ua amata ai le faataitaiga o le falemoa lea na ou ta'ua. E 1,000 moa e fasi i le itula e tasi e faaaoga uma ai latou moa lea e tauuuufua ai le fuamoia i inei ia ona aveatu loa laia e faatino ai le tulaga lea, o le faamoemoe lava lea ina ia maua tulaga o le taumafa ma le moa felesi mo le tatou Atunu.

Sa saunoa nisi o sui usufono e ala i ava mo vaafagota i totonu o Afioaga, sao outou ua leva e le o toe faia se fuafuaga a le matagaluega o faigafaiva ma le siosiomaga i le auala e toe tu'i ai tatou ava ma e tatau ona fai. A omai vaafagota i le po ae tutumu mai ae ua pe le tai e le mafai ona ofi mai i uta ona tutu ai lava lea i tai se i sua lelei le tai ma ua ao ifo lava faatoa mafai lea ona omai i uta. E tele Itumalo o lo o iai uma le aufai alia a le Atunu la e faafogafoga mai ia e tatau ona fai le fuafuaga o le mea lea e talanoa lelei iai ma le Afioga i le Minisita o le Siosiomaga po o le a le auala e mafai ai ona toe faatetele ava nei mo le paia ma le mamalu o le tatou aufai faiva i le aloalo ma le 20 maila i fafo atu o le tatou Atunu.

Ia e manatu pau ia o mataupu sa laga i lenei matagaluega ae aveatu lau faamalosi i lau Afioga i le Minisita o le miliona ia ona ou te talitonu e fesootai lelei le taumafai atu a le matagaluega o faatoaga ma faigafaiva ma le tatou poloketi. E momoli ai lou agaga faafetai tele i lau Afioga i le Tamaitai Pule ma le tatou matagaluega o Tina ma Tamaitai e le faigofie le galuega, tatou steering committee foi e le faigofie, o le poloketi fou o le mafaufauga fou, o le tupe fou na tatou manatunatu e atinae ai le Atunu. Ae aveatu pea le faamalosiau ia maua pea e lau Tofa, e alualu lava le aoga manogi o finagalo o le Atunu taunu i le taunuuga sili ona lelei, pau lava lea o le auala e vave ai ona tatou tua e ala i le tamaoaiga ma le fofoga taumafa o le Atunu o faatoaga ma faigafaiva. Momoli foil au faamalo i lau Afioga i le Minisita o Tupe ia e le faigofie lau faasoae na ona ou tatalogo atu pea Masefau i le mataupu lea na ou taua e ala i le Esetete Tausi aua e le o i lalo o le tatou Paketi i lenei tausaga. Ae tele auala, tulou e sao ai le pusi, tulou lava, fai ai ma faatino mea uma e ala i le faataunuuga o le faamoemoe lenei ma e le mapu foi ma le mate le faamoemoe i le faatinoga o mea ia. Ae lafo atu i lau Afioga ma lau Matagaluega maua lava le tupe e faatino ai.

Ona faaiu lea o le faafetai mulimuli lau Afioga i le Fofoga Fetalai a lenei matagaluega i le lauga faataupou a le Afioga ia Lautimuia. Viia le Atua i lou valaauiina, faafetai ua e faatasi mai i le Maota i Tiasau e le tau fofola sou gafa i le Palemene. O lo o e solisoli muliaao i galuega a Matua sa omai e asa le gasu o le taeao. O ou mama na maua lau tofa aua Samoa.

E momoli le agaga faafetai tele i le aufaigaluega a le tatou Malo, paia ma le mamalu maualuga o Tupu ma E'e, Tamalii ma Failaugu, Faletua ma Tausi, Saoao ma Tamaitai o lo o faauluulu iai Matagaluega eseese ma Faalapotopotoga Tumaoti ma le aufaigluega atoa mai ona Ao sei oo i ona I'u. E le faigofie le tulaga o le fesuiaiga o Faigamalo, e le faigofie ae o le a faigofie ona o le tatou tulaga, e iai le mau lea ona ou faitau atu nie, ia tatou lotogatasitasi. O upu masani na a le Atunuu aua o matou nei a o outou taeao, o le galue ma le faamaoni e selesete ma le fiafia, tuu mai pea le polokiki i inei taatia mai pea i inei i le Vaitele lenei, a o outou the government of the day, tautua Samoa. O lau tuualalo lena, ae manuia faiva o le Malo pe a o tatou lalago faatasi ma aumai la outou tuualalo i Minisita uma nei ma matou fia fai le measili mo le Atunuu.

E momoli le agaga faafetai tele i le paia maualuga o le Palestene i ona tulaga faalupe i Itumalo e fia aemaise lena itu ma lenei itu, lau Afioga i le Taitai o le Itu Agai, afio atu o le Afioga i le Tamaitai Palestina, Sui Palestina ma Minisita o le Kapaneta, tatou tatalo faifaatasi mo le Atua ina ia tau so tatou ai mo le Atunuu. Lafo le tatou maa ma le le masalosalo aua le fesili i se taui pe fesili pe ua fia, pule le Atua i le mea e aumai mo tatou.

Momoli lou agaga faafetai tele i le matou matagaluega Seuseu aemaise Masuisui ma le SROS, STEC, Taitaifono aemaise lau Afioga i le Minisita Lagolago, alo i o tatou faiva manai a tatou galulue pea ma le talitonu. Sau le taimi o le Atua e faamanuia ai i lo outou afu maligi ma lo outou afutoto.

Momoli le agaga faafetai i lau Afioga i le Failautusi o le Fono ma le Sui Failautusi ma le tatou matagaluega atoa, lau Afioga i le alii Satini ma le tulaga i le Fofoga o le tatou Maota, malo le onosai malo le galulue. Ave foi lenei avanoa e momoli atu ai le faamaisega, talofa e, i le Tina ia Talanoaalalafagatumua Maria Ale Faatonu ua faiilagi le folaua ona o le valaau paia a le Atua. Faamaise le Atua i le Fetalaiga ia Saleaula aemaise le nofoaalo.

Avea foi lenei avanoa ou te momoli atu ai faamaisega i le Fetalaiga ia Nuu, uso pele, na aogamatama e oo lava ina faaiu galuega a le Malo. Faamaise le Atua i le Faletua ma le Nofoaalo ma le paia o le Aigaalii.

Lou Itumalo pele, Aiga Sa Tupua ma Aiga Sa Malietoa ma le Faletolu ia momoli le agaga faafetai ona o la outou tapuaiga faamalo le onosai, faamalo le tatalo mai, paia i aiga ma sa eseese. Lau Tofa i le Tuua Pao ma le tatou Nuu ia aua tou te popole o lo o lagumalu lava mea uma i le mafanafana o la outou tatalo ma la outou tapuaiga. Ia si ou toalua faapelepele ou te iloa la e matamata mai, Mom ia momoli atu lau faafetai i mea uma, faafetai i lau tapuaiga faafetai i lau tatalo o lo o maua ai sou manatu e tauave ai le ta valaauna aua le Atunuu. Lau fanau pele, ia outou onosai afai ua outou sauaina ma upuia outou ona o le tatou tautua ia Samoa folo pea sau taeao malama i le agaga moni o le tautua aua le manuia o le Atunuu.

Lau Afioga i le Fofoga Fatalai foi mai se tala, i ou faiva alofilima ma lau faafoeina o le Maota o le Atunuu, o ou mama na e le faigofie lou Nofoa, e le faigofie e 10 tausaga o vevela ai foi au i le Nofoa lena. Tele o faaososoga ma mea e tuu atu o le taofiofiga o manatu ma lagona o Sui usufono ae faafetai lena e maua lou taotai. Alofagia e le Atua lou soifua ia tapuaaoina pea aua le faafoega o le tatou Maota nei. Le faafogaga tapuai mai a Samoa o lo o taape i le Lalolagi atoa ia alofagia e le Atua lo outou alofaiva ma lo outou aitaumalele aua le tautuaina o si o tatou Atunuu. Ia manuia le faasausauga a Samoa o tapuai mai lenei po, manuia le Fonousu, soifua ma ia manuia.

**FOFOGA FETALAI:** Ua faamalo saunoa, faafetai foi malele i lau Afioga i le Minisita o Faatoaga, Faigafaiva ia aemaise foi o le tatou Fale Suesue ia ma le Esetete Tausi. Ia malo lava saunoa, faafetai foi mo le faamalamalamaina o nisi o itu sa laga i finagalo o le Maota ia lea lava ia lava tapena ia lau faamalamalamaga aua lava ia le faafogagaaga foi a le Maota aemaise foi le Atunuu. Aemaise foi o le taumafai o le tatou matagaluega o faatoaga leaga o lea sa ivitu iai le tamaoaiga o le Atunuu i aso ua mavae, ia a o lea e matau atu i taumafaiga a lau Afioga ma le Matagaluega ia o lo o taumafai e toe faafoi mai ia lena ivitu i lenei vaitaimi ia aua le tamaoaiga o le Atunuu. O le mea lea, malo faafetai, malo galulue. Ia tatou oo mai le tatou faasologa i lau Afioga i le Sui Palemia po o le Minisita o Tiute ia ma tatou Tupe Maua, lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** E momoli atu le agaga o le faafetai i lau Afioga i le Fofoga Fatalai mo lenei avanoa taua. Ia lau Afioga i le Fofoga Fatalai e muamua lava ona ou vaisausauina le paia sausaugata Samoa ma ou faatulou i le paia maualuga o le Maota Fono a Samoa i ona tulaga faalupe, aua le afio o lau Afioga i le Fofoga Fatalai ma Sui mamalu uma o le Palemene a Samoa. E talitonu foi o lo o afio le agaga o le Atua i totonu o le tatou fesilafaiga o lo o maua ai pea e tatou le filemu, le mafanafana aemaise o le tatou galulue faatasi ma lo tatou galulue feoeoeai e tusa ai ma le tatou Fonotaga.

Ae ou te le i asaina le tai nai utufia le vai na moomoo iai le Tuiatua i Mulinuu ma Sepolataemo, ou te muai faapoipoi laau tuvanu ma tapui a Tupo leaga e faigata ou paia ma ou mamalu Samoa o le aomamala. O paia faatalalelei, o paia faalemalo, o paia faaleatunu o le a ou le toe oo iai aua e taoto ae o se alaoo, e leai foi se tautai e toe fagota sagolegole aua o Samoa o le Atunuu Tofi o le laau foi ua maea tofi tofā. Ae o le a sosopo nei le manuvale i tiaseualii e ala lea i se faafetai faaleauau ma le faalelava ona ua mafai ona ia taitai mai lo outou soifua manuia ma so matou ola faatauvaa ua tatou feiloai ai i lona matagofie ma lona filemu i lenei afiafi.

Ou te muai faatulou atu i le afio o lau Afioga i le Aomamalu o le Malo lau Afioga Tuimalealiifano Vaaletoa Sualauvi II ma lou Faletua. Afio lau Afioga i le Sui o le Fono Suitofia lau Afioga Lemamea Ropati Tuiletufuga ma lou Faletua. Afio lau Afioga i le Tamaitai Palemia, lau Afioga i le Saofaapito lau Afioga Fiame Naomi Mataafa Mulinuu II, affio Afioga i alii ma tamaitai Minisita o le Kapaneta affio foi Minisita Lagolago. Afio le Taitai o le Itu Agai, affio Sui usufono uma o le Palestine o Samoa, afio lau Afioga i le Faamasino Sili, Susu le Vasega o Faamasino ma le mamalu o le Ofisa o Faamasinoga o le Faamasinoga Maualuga o Samoa. Afio le Pereseteine ma le Sui Pereseteine ma alii ma tamaitai o le Faamasinoga mamalu o Fanua ma Suafa a Samoa. Susu Susuga i Faafeagaiga taulagi o lo o latou tauasuina le ipuvai o le ola aua Samoa mo sona manuia mo a taeao. Ou te faatulou i le tapuaiga mamalu a Samoa, le paia lava lea i Tama ma Aiga, Aiga ma o latou Tama, Tumua ma Pule, Ituau ma Alataua, Aiga i le Tai ma le Vaa o Fonoti.; Aea le faafogafoga mai o Tutuila ma Manua, le afio i le Afioga i le Kovana Sili o Amerika Samoa le Kovana Lutena ma le Faigamalo, le paia lava lea o Sua ma le Vaifanua, Fofo ma Itulagi, Saole ma Saleaaumua ma le Launiu Saelua. Le afio o le laau na amotasi faatui o le motu, nofo matua ma le auvaa tootoo ma upu o le manuatele. Ua ala le mafuaalii le paia e ma le mamalu o Samoa atoa o lo o affio ma papaaa i so o se tafa o le Lalolagi aemaise lau faafogafoga pea o e maua mai lenei faasalalauga a le tatou Palestine o Samoa. Alalatai le vasega o Pulega o Ofisa Sili, o Matagaluega a le Malo aemaise foi Faalapotopotoga Tumaoti, le Loia Sili aea le Failautusi o le Fono Aoao. Lau Afioga i le Fofoga Fetalai matau atu i le sologa lelei oa tatou fonotaga i le la lua vaiaso ua te'a. Momoli atu le agaga o le faafetai i lau Afioga i le faafoeina o lo tatou Sa a o tatou folau pea i le lauliliuina o upufai faalemaloi totonu o lau Palestine. Faamalo foi i le Taitai o le Maota, lau Afioga le Tamaitai Palemia ma lenei itu le affio atu o Minisita o le Kapaneta ma Minisita Lagolago. Faapena foi lena itu o le Maota aua le afio o le Taitai o le Itu Agai ma lena itu i le tauaveina foi o lo outou pitolaau i galuega fai o le Maota, faamalo le folau faamalo le ta'i, malo le onosai.

Ia e manatu o le fagatonu le malama ma vilitonu le ifi a maina e tusa ai ma nisi o saunoaga a le mamalu o nisi o Sui Faipule e fia faalauaiteleina ma toe fia faapupulaina ai isi motugaafa a lou nei Sui. Lau Afioga i le Fofoga Fetalai o le tali lenei a le Matagaluega o Tiute ma Tupe Maua. O lo o iai foi isi Ofisa i lalo o lenei Matalugaluega pei o le Ofisa Sili o le Suetusi ia aemaise foi o le Tausi Mavaega pei ona silafia. Ae matauina o le toate lava o Sui Faipule na agitonu mai lava a latou faafesili poo latou finagalo faaalia foi i le Matagaluega o Tiute ma Tupe Maua.

O le Matagaluega lenei o Tiute ma Tupe Maua o lo o iai le matafaioi o le saogalemu ma le vaaia lea ma le puipuiga o tatou tuaoi faavaomalo ia po o le pulega lea o lo o gafa ma le tatou Border Security po o le Border Control. O i latou ia o lo o ulia lo tatou Sa o Tulafono o puipuiga faavaomalo ma le

faatinoga o gaioiga e taofiofia ai pe faalavea, faatautaia puipuiga faapea ma moliaga o i latou o solia Tulafono i o tatou tuaoi i le va ma isi Atunuu aemaise le taumafai e faaofi mai ni oloa faasaina i totolu o lo tatou Atunuu. O i latou nei e latou te suesueina ma siakiina le taunu mai o oloa ina ia aua nei aumaia ni oloa le faatagaina po o ni oloa e aumai faanana e pei o laaumalosi, fualaau ma vailaau ia ma pauta faasaina.

Ou te fia talanoa i fualaau faasaina, ua tele saunoaga ua agai i fualau faasaina ua ofi mai i totolu o lo tatou Atunuu, o le aisa ma meafaigaluega e gaosia ai nei fualaau faasaina i totolu o le Atunuu. O lenei mataupu e le o tuumamaina pe faapaole iai lenei matagaluega ma e le mafai foi ona faatamala i latou nei i lo latou tiute i le faatinoina o a latou galuega i le siakiina o oloa i le iloa ma le faamaoni e gata ai. Peitai e iai lava luitau o lenei galuega ona o lo o feagai pea le aufaigaluega ma i latou nei o lo o taumafai e faaofi mai nei oloa faasaina agai i totolu o lo tatou Atunuu. Ua saunoa foi nisi o Sui mamalu pei ona saunoa le Sui usufono mai Fagaloa ma fesiliglia le ofi mai o nei fualaau faasaina i totolu o le Atunuu ma faapea mai, O fea le faitotoa o lo o auala mai ai nei mea, a o fea o iai Taitai o le Atunuu? Saunoa foi le Sui o Faleata 4, i le gagana faaperatania ua faapea mai, Government must take a serious look at this, tatau ona vaai totoa le Malo i le mea lea. Sa saunoa le Sui o Siumu o le sa avea foi ma Minisita o lenei Matagaluega i le tele o tausaga ua mavae. Ua ia saunoa ma faapea mai; ua tatau ona soloia le green lane ia po o le ala lea e ui mai ai i latou e le o fai ni oloa e fia faailoa mai, tagata e le o manao e declare ia latou oloa. O le manatu o le Afioga i le Sui mamalu o i lea o lo o sao mai ai le fualaau faasaina, o le green lane ma ua tatau ona soloia ona ua tele mataupu tau fualaau faasaina i totolu o le Faamasinoga.

Lau Afioga i le Fofoga Fetalai.

**FOFOGA FETALAI:** Ua ou vaelupeina le saunoaga a lau Afioga i le Sui Palemia, talu ai ona o le tatou lafo tatou te malolo i le itula e 10.00 ia ona toe faaauau ai lea o le tatou galuega. E tusa o le lafo ia tatou malolo mo le 15 minute ia ona tatou toe faaauau ai lea seia maea le saunoaga a le Tamaitai Palemia, o le tulaga lena o le tatou lafo.

*Na faataatiaeise Taualumaga a le Fono Aoao Faitulafono mo lana malologa i le itula e 10:00 i le po ma toe faaauau i le itula e 10:20 i le po.*

**FOFOGA FETALAI:** Ou te toe faasilasila atu ua toe amatalia nei Taualumaga a le Fono Aoao Faitulafono. E faataatiaeise a tatou Taualumaga mo le malologa, o lo o saunoa le afioga i le Sui Palemia e talifuaitau i nisi o mataupu sa laga i saunoaga a nisi o le tatou Maota.

O le mea lea, ou te tapa ma le faaaloalo lau afioga i le Sui Palemia mo le faaauauina o lau sanoaga.

**Afioga Hon TUALA TEVAGA IOSEFO PONIFASIO:** Lau afioga i le Fofoga Fetalai, ae le i faaauauina se faamatalaga e momoli atu le agaga faafetai. Aua foi le malologa ma le faavevela, ua sau foi le malu ia o le tauafiafi, ae faafetai tele i lau afioga ma le Ofisa mo le maaau i lenei itula o le afiafi.

Lau afioga e fai le tatou malologa ua amata ona ou talanoa, i nisi foi o fesili sa tuuina mai i sui usufono o le Maota, e agai tonu lava i tulaga o laau faasaina. E i ai lou manatu, se taimi ou toe foi mai ma faaauau se faamatalaga i laau faasaina, o lo o faapena ona aumai i totonu o le tatou atunuu. Ae ou te fia talanoa muamua i tupe maua lau afioga.

O tupe maua mo le tausaga faleletupe 2022/2023. E amata atu se faamatalaga puupuu, i le tupe maua ua aoina e le Tiute ma Tupe Maua i lenei tausaga faaletupe. E oo mai i le faaiuga o le masina na tea nei o Me, ua mafai ona ausia le 107%, o le tupe sa fuafuaina mo le tausaga faaletupe lenei 2022/2023. O lona uiga, ua mafai ona aoina ia tupe faasili e tusa ma le \$90 miliona, pe a fua i tupe sa fuafua e aoina i le sefulutasi masina o lenei tausaga faaletupe.

O lo o i ai le fuafaatatau, po o se tala foi mai le Matagaluega o Tupe e faapea, i le maea ai o le masina lenei, ua tatau ona mafai ona aoina e le Matagaluega lenei le \$100 miliona e pei ona saunoa ai foi nisi o sui usufono. E le i maua mai se tala lata mai, ae o le vайaso na tea nei, ua oo le aoina o tupe maua i le \$90 miliona le tupe faasili.

O se tasi lea o pine faamau, ua atagia ai ua toe amata ona sologa lelei lo tatou tamaoaiga. E le na o le aofai o le faasiliga e fua i ai lea tala, pe ua tele, e leai. Ae ua ou matauina le maualuga o le tele o oloa ua auina mai i totonu o le tatou atunuu. Ua tele foi le faatau, ua maua tupe, ua lava le faasoa. A fua i tupe sa aoina i tausaga e lima ua mavae, e tusa ma le \$56 miliona, ua sili ai tupe maua a lenei tausaga faaletupe. E le i ausia lava se faasiliga faapea muamua.

O le fua faatatau lea, atoa ai ma nisi o a tatou atinae, fetuutuunaiga o le tau o tiute ma lafoga. O le vaai mamao i le faaleleia o lo tatou tamaoaiga, ua afua ai ona tuuina mai tupe fuafua mo le tausaga faaletupe fou, ua sili atu ma le \$600 miliona. O se tausaga muamua lenei ua faatulaga ai se tupe maua faaagaga a le Matagaluega i le maualuga lea, \$600 miliona, ua tuuina mai i le Matagaluega o Tupe, o le luitau foi lea mo lenei Matagaluega.

Ou te fia talanoa faalauaitele i nisi foi o faafitauli, o lo o feagai ma i latou nei i totonu o le Matagaluega o Tiute, aemaise le aumaiga o oloa, o lo o auina mai i totonu o le atunuu.

Mo le silafia, o le faafitauli, pitosili ona ogao, o le toa gaogao o le aufaigaluega e faatinoina le siakiina o oloa, e le gata i pusaoloa ae faapea foi

oloa ua teuina i totonu o faleteu oloa o lo o i lalo o le vaavaaiga a le Ofisa o Tiute, po o le CCA po o le Customs Control Area.

O lona lua o faafitauli, ua faatuputupulaia le aofaiga o oloa ua taunu mai i totonu o le atunuu. Atonu o se mea lelei, ae ua avea le alualu i luga o le faatupulaia o oloa, ua tulai mai ai le isi faigata, o le toagaogao o le aufaigaluega. E le gata i oloa faapisinisi, ae faapea foi oloa mo aiga ma tagata taitoatasi. E atagia lea i le siitia o le aofaiga, e le gat ai vaa oloa ua taunu mai, ae faapea foi le faitau aofai o oloa sa faaulufaleina mai i si o tatou atunuu, i le tausaga faaletupe o lo o faagasolo nei.

A fua la i le fuainumera o oloa ua faaulufaleina mai. E ui i se maitau i le pau o le aofaiga o pusa oloa, po o containers, aepeitai o le mamafa o oloa ua faauluina mai, o lo o atagia ai le siitia o oloa o lo o faaulufaleina mai. E talitonu, e le taitai ona lava le aufaigaluega o lo o i ai i le taimi nei. E toatasi lava le alii po o le tamaitai ofisa o lo o tauaveina le tiute o le siakiina ma le galueaina o le tiute totogi o faamomoli, o le faleteuoloa i aso uma. Mo pusa oloa e taumafai lava pe tai toa lua, pe tai toatolu, e siakiina pusa oloa ina ia mafai ona vave le galuega faatino, ina ia aua ne i taliga tagata o le atunuu.

O le isi foi faafitauli, e le o lava foi meatotino e fesoasoani i alii ma tamaitai ofisa i le siakiina o oloa. E pei o taifau sosogi ma nisi o masini faatekonolosi faaonapo nei, e fesoasoani lea i le sailia o faamomoli o masalomia o lo o i ai i totonu nei fualaau faasaina.

O le isi luitau o lo o faamauina, ma e i ai pea le avanoa e sao mai ai fualaau ma laau faasaina, ona o le utiuti o mea faigaluega manaomia. E i ai la tatou masini faata laititi, ma ua le toe atoatoa le lelei, ona ua silia i le lima tausaga o faaaogaina pea ia nei mea faigaluega. Pe a fua i le tele o oloa faaulufaleina mai, ua i ai le manatu ua le toe umi ae ua tatau ona toe faafouina.

O lea foi na taua le tatou masini faata mo pusa oloa, le tatou container x-ray. E i ai le manatu e le toe oo i ai se faamatalaga i lenei afiafi. Na ou matauina na saunoa i ai le Taitaifono, faapea nisi o uso a Minisita, ma o le tulaga moni lena o lo o i ai. Ae o lo o i ai se manatu ia te au nei, aemaise le Ofisa Sili o Pulega, e ao ona faatalosagaina ia i latou uma o lo o aofia i totonu o lenei poloketi. Pe a pe mafai ona tuu mai i luma le fausiaina o lenei fale faapitoa, ina ia mafai ona aumai loa le tatou scanner. O le tatou scanner la e aumai, o le tatou mobil truck scanner.

O lona uiga, o le tatou fale ma le scanner sa i lalo i totonu o le workplan, e i ai mea na muamua. Aepeitai ua i ai sina faafitauli ua tulai mai, i mea ia sa faamuamua i totonu o le workplan. O lea la ua i ai le talitonuga, o le a ave se tatou talosaga i le Project Manager e tauala atu lea i le ADB, pe mafai ona aumai i luma le tatou fale lea, ina ia fausia, ona mafai lea ona house ai i ina le tatou scanner.

O le toa o le mataupu lea, ua le gata i le tulaga ua taua i le quarry po o le maa o lo o manaomia, ae o lo o i ai le vai tele i totonu o le nofoaga lea e faapea e fausia ai le fale. O le lipoti lata mai, ia toeitiiti lava maea le

taumafaiga o lea faafitauli. O lea la, e leai se isi tala e toe fai atu i le tulaga lea...

**Afioga Sulamanaia Fetaiai Tauiliili Tuivasa:** Lau afioga i le Fofoga Fetalai pe maua se avanoa.

**FOFOGA FETALAI:** Ia malie lau afioga i le Sui Palemia, se i tuu atu le avanoa i le sui usufono mo Vaimauga 1.

**Afioga Sulamanaia Fetaiai Tauiliili Tuivasa:** E momoli le agaga faafetai i le Sui Palemia, po o le Minisita foi o Tiute. E matau lava ma le totoa i lenei afiafi le saunoaga matagofie a le Minisita. E momoli ai le agaga faafetai i le Minisita ma lana Matagaluega. O se tala fafia foi i lou sui usufono, ua saunoa foi le Minisita, ua ova le tupe sa tuuina atu e ao, i le \$91 miliona, ia faafetai ai i le Atua. O lea foi a silasila i le Tala o le Tupe lea e i ai, pe \$615 miliona, a o la foi e maua o lea ua ova le tupe a o lea e lei uma lenei masina.

Ia e momoli le agaga faafetai i lau Matagaluega ma lau afioga. E masalo o le 90% o le tatou tupe lea e i ai, e aumai e lau Matagaluega, e momoli le agaga faafetai.

Ae leaga o lea ua oo i le scanner, o le fesili, ona o i sa...e masalo o le Paeaiga ua tuanai sa pasia ai le tulaga i le faata lea po o le masini. O lea foi la ua aumai lou finagalo, o le masini feaveai. O le fesili lena, e faapea lava lou faatauvaa o se masini tumau i totonu. A o lea la ua aumai le tala, o le mobil lea ua i ai. E pei o le agaga lena sa tulituli pea, ona o le faaeteetega foi, ua leva ona i ai le tulaga lea. Ae o le faaeteetega o le grant e aumai e le ADB, po o tumau pea lena faatuatuaga i le tulaga o lo o aumai ai lenei masini.

Aua o lau tatalo, ana faapea e faatino lea masini i le tele o taimi, e le o se tupe lea e aoina e le Matagaluega, aua o le a maua uma isi tulaga o le masini lea e siakiina ai ia containers ma mea faapena. Ae momoli le agaga faafetai, e pei o nai fesili na sa fia tuuina atu, ua leva ona pasia lenei masini ina ia mafai ona faatino ai, a lea e oo mai lava i le taimi lenei...o la la ua e tautino faapena, o lea foi la ua toe ese le...o lea ua aumai o le mobil. Ae pei sa i ai le tulaga i le Paeaiga ua tuanai, ma sa faailoa, o le tulaga e tumau ai i tai, e le feaveaia i tua, ona o faaeteetega. E pei o tulaga na, sa fia maua lava so ta ita malamalamaaga, ona o le masini e aoga e maua ai a tatou tupe maua, ma le tulaga lea o le TIMS. E pei e faafetai atu ai i lau afioga ma le Matagaluega. Ia o le agaga lena o lea e faafesili ai, sa fia maua ai se malamalamaaga i lau afioga i le Minisita ma le lau afioga i le Fofoga Fetalai.

**FOFOGA FETALAI:** Ia tulai mai lau afioga i le Sui Palemia..

**Afioga Hon TUALA TEVAGA IOSEFO PONIFASIO:** Ioe, faafetai i lau afioga le sui usufono o Vaimauga. O le agaga foi lena o lea e ia te au, e tutusa lelei taua. O le naunautaiga ina taunu maia le masini, ua manaomia. E le o se tulaga e vane ai lau afioga i le Fofoga Fetalai. O tulaga ia ua e saunoa ai i tulaga o le masini, tulaga o le mobil ma mea faapena. Ina ua maea ona toe pasia e le Kapaneta, le tulaga tonu e tatau ona nofo ai le galuega lea. Sa faapena ona soalaupule uma le tulaga o technical specifications ma le Kamupani lea na malo, ma o lo o auai foi le finagalo o le ADB. E le o le faafitauli lena o lo o i ai i le taimi nei. O le faafitauli e pei ona ou talanoa atu ai, o le delay o le galuega o le poloketi lea i totonu o le port. O lea e apilitia atu ai se i tulou, lavelavea atu ai ma le tatou masini.

O le mea la lena, e tusa lava pe na pasia i le lua tausaga talu ai, e le mafai lava ona aumai, seiloga lava e fausia le fale lea. O le fale lea e le o mafai na fausia, ona o lea o lo o stuck po o noatia le tulaga lea, ona o le tulaga o lo o i ai le poloketi i le port. O le faaaliga lea.

Ae o le naunautaiga ina ia aumaia, aua ua leai se mea o toe popole ai. O lea na ou taua, se i ave se tatou talosaga se i faamuamua mai. O le tulaga i le workplan, e uma le A, uma le B, uma le C, faatoa oo loa lea i le tatou scanner. O le mea lea na ou fai atu ai, o le a tatalo, e aumai i luga le tatou scanner, fau le tatou fale, se i faaaoga.

O lenei mea, e laititi lava sou iloa, ae o lo o i ai tagata o lo o i ai tomai faapitoa, inisinia o lo o fuafuaina uma nei mea. A o lo o faamalumalu pea le ADB, ae o le agaga lena. Ina ia valuvalusia le agaga foi ina ia vave aumai le tatou masini. O lo o i ai le tatou faamoemoega aua le saogalemu o lo tatou atunu.

**Afioga Sulamanaia Fetaiai Tauiliili Tuivasa:** Lau afioga i le Fofoga Fetalai, e momoli le agaga faafetai, o lea la ua tautino manino le afioga i le Minisita, e leai o lea ua leva ona fia aumai, ae pei o le Minisita o Felauaiga lea ua tuai ona faatino le fale e aumai ai lau masini. O lea la e faapea o oe lea e delay ai, ae o lea la o le Minisita o Galuega Tetele lea e ala ai ona tuai. E momoli atu le agaga faafetai.

O lea foi e maua, o le masini fealuai, ae sa faapea o se masini tumau lava pei e taugofie, a o le masini fealuai, e pei e tau faigata, e fai ma alu atu i tua. Ae leai se mea o i ai, o lea ua maua le malamalamaga. E le o oe la lea e tuuaina, e tuuaina le Minisita o Galuega Tetele a le Malo. Ma lou faaaloalo lau afioga i le Fofoga Fetalai.

**Tofa Hon Olo Fiti Afoa Vaai:** Lau afioga, i le Fofoga Fetalai, o lea ua faafogafoga mai le matou pulega, o le truck le x-ray lea e... ia amata loa taeao ona fau le tatou fale. Ma le faaaloalo.

**FOFOGA FETALAI:** Tulai mai lau afioga i le Sui Palemia e faaaauau le saunoaga.

**Afioga Hon TUALA TEVAGA IOSEFO PONIFASIO:** E leai e le o le Minisita o Galuega. O le upu moni lava ia, ona o le scanner lenei, o lo o aafia i lalo o le poloketi. E o faatasi uma lava fuafuaga na faataoto mai ai, e pau lava e i ai le mea o lo o tupu i le poloketi. O lea ua uma ona aumai le lipoti foi a le ADB, e na o sina tuai lava, ae tatou onosai i le isi ono masina. Ma o lea ua logo mai foi au, o le a faaalu lava tulaga o le koleniina, ia faamasani le tagata na te operate ina le masini, ina ia oo atu i lena taimi ua alu i le atoa.

Na taua e nisi o sui usufono mamalu, le green lane. E manatu o se avanoa lenei e tuuina atu ai se faamatalaga i lenei faatinoga. E pei ona fai atu i se taimi ua sola. O le luitau tele o lo o feagai ai ma le Matagaluega. O le utiuti lea o mea faigaluega ma tagata faigaluega. O lona uiga, e ao lava ona Iloilo totoa e le Matagaluega, se auala e mafai ai ona clear ina oloa i se taimi vave. Ona o le umi ona taatitia o oloa i le uafu, o le taugata foi lea mo le mamalu o le atunu.

O le ala o le iai o le green lane, ina ia mafai ona faagasolo ai le kiliaina o oloa mo le aufaipisinisi. Ua maualuga le usitaia o Tulafono ma aiaiga a le Matagaluega.

Mo le silafia, o le aufaipisinisi, o lo o i ai le silafia po o le iloa masani a lenei Matagaluega, ua i ai i latou ua i ai le faatuatuaga. E i ai nisi o i latou ua mafai lava ona auina mai a latou oloa e le o masalomia. E vagana ai oloa ua masalomia, o i ina lea e agai ai loa ia suesuega. Ae leai se oloa e sau i le green lane, e faapea e tuulafoai. E leai e siaki lava ma fesiliglia le tulaga o le green lane. Ae o la e silafia e lau afioga lea sa avea foi ma Minisita lau afioga Tuuu. O le green lane o se mea taua i lalo o le Faalapotopotoga po o le customs a le lalolagi, o i latou ia o lo o .....

**FOFOGA FETALAI:** Ia malie lau afioga i le Sui Palemia, sei tuu atu le avanoa i le sui usufono mo Siumu.

**Tofa Hon Tuuu Anasii Leota:** E faafetai i le afioga i le Fofoga Fetalai, e leai e saolele le saunoaga a le Sui Palemia, po o le afioga i le Minisita o Tiute ma Lafoga. E talitonu lava o lenei fuafuaga na faataoto mai i le vaitaimi e le i tulai mai le mea lenai, ua anoia le sau o le aisa. Sa manatu o le fuafuaga lena sa taumafai e faafaigofie. A o lea la ua e saunoa mai i vaega ia, o le le lava o le aufaigaluega, le lava ia meafaigaluega.

E pei lava ona fai atu, e sao e i ai le faatuatuaga o le Matagaluega i kamupani nei ma ituaiga oloa e aumai i totonu. E pei o le fautuaga na tuu atu pea, se i silasila totoa i ai. E leaga o lea ua tatou tau vaai i ai, po o le fea tonu lava le mea lea e sao mai ai i totonu ia mea nei tatou te popole i ai. O lea ua e saunoa mai nei, ia lafo atu pea i lau afioga ma le Matagaluega, se i

silasila totoa i mea ia. Ne i te i ua tatou faatuatuaina ia tagata nei, a o i tonu lea e sau ai le mea. Ma lou faaaloalo.

**Afioga Hon TUALA TEVAGA IOSEFO PONIFASIO:** Ou te lagolagoina lou finagalo i le vaai totoa i mea nei. E pei ona ou taua, o el galuega ma le tiute fai lea i aso uma, a lenei Matagaluega. Ia aua ne i faatamala pe faapaole le faiga o le galuega.

Ae o le a ou talanoa atu i le aoga o le green lane. Ona o le green lane, e fesoasoani tele i le galuega a lenei Matagaluega, ma o lo o lagolago foi e le World Customs Organization, le tulaga o lona taua. Ae le faapea o le green lane lea o lo o sao mai ai mea faapenei. E i ai foi le isi manatu o le green lane e le tiutea ni mea, e leai, e leai ni tiute o tuusaunoaina i lalo o le green lane. Ae ua matauina lau saunoaga ma lou finagalo lau afioga, o le a faamauina le tulaga lea.

I se taimi ona ou talanoa atu lea i laau faasaina. Ona o lea ua uma ona momoli mai e lena Itu, o laau faasaina ua tele, ne i te i ua faaosofia se popolega i le faafogofa mai foi o le atunu. Ae leai ma se isi o outou na tuuina mai ni faamaumauga po o ni fuainumera, e faailoa ai le tulaga moni o i ai le tele o tulaga o le aisa, po o le maruana po o le a lava i totonu o le tatou atunu.

E faafetai atu i le Minisita o Leoleo, o ia lea na mafai ona ia tuuina mai foi ni faamaumauga, o lo o feagai foi ma leoleo, o lena sa manino ia le tulaga o lo o i ai. Se taimi foi ona ou avatua foi lea o ni faamaumauga o lo o maua i totonu o le tatou Matagaluega. E tusa ai o nei fualaaau faasaina o lo o ofi mai i totonu o le Matagaluega.

Lau afioga i le Fofoga Fetalai, o le tele o nei mau fualaaau faasaina, o lo o sao mai totonu o le tatou atunu o le aisa, po o le methamphetamine, e i ai masalosalogia o lo o sao mai i le border. Ma e tele foi se masaloga o lo o kukaina i totonu o Samoa nei. E le o toe i ai ni tapulaa ma aiaiga faataatitia, i le maua ma le faatauina o fualaaau masani, e pei o cold and flu tablets.

O fualaaau nei e maua ai vailaau manaomia, e kukaina ai fualaaau faasaina. [.....] O i latou nei, sa solitulafono i nuu mamaao, o i latou nei ua i ai le tomai e kukaina ai nei fualaaau faasaina. E le gata i lea, e tele ni ata ua maua i upega tafailagi, e aotauina ai lenei vaega le lelei. Ona ua i ai tagata ua i ai le tomai, e gaosia ai le aisa.

Na amata lava lenei masaloga i le mataupu lea na tulai mai i lfaletalavai i le falemai i le tausaga ua mavae. I le aveesea lea faasolitulafono ai o ni fualaaau e aunoa ma ni faamaumauga, e masalo o lena e silafia e le Maota.

E tusa ai ma faamatalaga na aoina mai lea taimi, na maua ai ua pau i lalo le tau o le aisa mai le tau masani sa tulei ai, i lea vaitaimi. O fuainumera nei lea ou te talanoa atu ai, o intelligence ia, e pei o le matauina lea o tulaga o lo o i ai. Na pau i le \$50, ae o le tau masani lava o le grand o le \$100. E

faatasi ai ma ni faamatalaga e faapea i lea taimi, e le o lelei le quality, o lona uiga, ai o le vaitaimi lea sa faataitai ai ona kuka nei mea i totonu o le atunuu.

E tatau pea ona faaaaua a tatou suesuega faa-saienitisi, ina ia mafai ona tatou on top of the game, ina ia mafai ona tatou teena pea tulaga o lo o aliae mai, e tusa o nei fualaau faasaina.

Sa faafesiliglia la matou Matagaluega, o fea o outou matau o lo o ofi mai ai nei fualaau faasaina i totonu o le atunuu. Po o vaa ia e aumaia pusaoloa? Po o le vaalele, po o nisi auala o lo o agai mai i totonu o le tatou atunuu, ae tatou te le o mailoa?

E tusa ai ma faamatalaga ua aoina mai ma faamaumauina, o lo o i ai masalosaloga i le ofi mai o fualaau faasaina...

**FOFOGA FETALAI:** Lau afioga i le Sui Palemia, e i ai foi le faaeteetega o le Nofoa i le taua o nai tagata ia, returnees i totonu o le atunuu. E manatu foi i puipuiga, i le atunuu, ma i latou foi.... E i ai le manatu o lea o le a aveese ma faamaumaua. Ua faatonu le Failautusi e aveese ma faamaumaua ia tulaga ia ua taua ai i latou ia, aemaise lava o ni masalosaloga. E popole foi le Nofoa, ina ne i tatou tuuaina ae le o mautinoa, e pei o le agaga lena e fesoasoani atu ai i lau afioga i le Sui Palemia. Ina ia faapena ona tatou agai pea, ae popoe foi i le tuuaina o se vaega o le atunuu, ae le o mautinoa ma ni mau maumaututu. O le fesoasoani atu lea i le Sui Palemia.

Upu na aveese mai Faamaumaua o le Saunoaga a le Sui Palemia... “[O lo o i ai lava le masaloga, o le toatele lava o tatou tagatanuu ua toe foi mai i fafo, e toe agai mai i totonu o Samoa. Ia o masaloga lea ou te talanoa atu ai, e pei o returnees.]”

**Afioga Hon TUALA TEVAGA IOSEFO PONIFASIO:** Ou te ioeina le tofa a lau afioga, ona e manatu lava o nei mea ua na o ni masalosaloga. A o tulaga uma lava o lo o talanoa atu ai, e le o mafai ona ou tauina atu ni mea mautinoa, ona o lea o lo o faatino pea suesuega ma iloiloga. E le mafai ona ou compromise ina se operation, e pei ona faaaaua, e on going i le taimi lenei o le Matagaluega. Ae ua lelei lau afioga.

O le matauina o le Matagaluega lelei, o le tele lava o nei oloa o lo o ofi mai i le vaalele, ma vaa lauoloa. O lo o i ai foi nai faamatalaga e pei ona saunoaina e nisi o sui usufono mamalu, o lo o i ai ni vaa fagota ma nei mea. Ia e pei lava ona tatou talanoa, e na o masaloga mea ia tatou te talanoa ai, ae o lo o mataituina pea pe moni pe a.

O le manatu foi lele, o lo o i ai le tatou motu valalata ma Amerika Samoa, o le manatu atonu o if oi lea e...ona o lea vavalalata, o if oi lea o lo o i ai le

masaloga. O ni vaa faapea o lo o omai, ona fai lea o ni fesuaiga i le gataifale o Upolu, ma faapena ona auina mai ai nei oloa faasaina.

O lo o i ai foi faamatalaga o lo o masalomia ai le i ai o nisi, o tagata faigaluega o lo o galulue i totou o le tatou Ofisa, e patino ma felauaiga ma le teuina o oloa nei. Ou te le ma e tau atu le tulaga lea. Ou te le ma e tau atu le tulaga lea, e le faapea e leai nisi, ae o mea uma lava nei o lo o agai i ai le masalosaloga e pei o le fesili na tuuina atu.

O lea na outou saunoa mai, o fea lea na faaulufale mai ai. O lea la ua tali atu i masalosaloga, e le o i ai ni faamaumauga maumaututu, ae o auala uma ia, e ono ofi mai ai fualau faasaina i totou o le atunu.

E le mafai foi ona aveesea le masaloga i tagata faigaluega o le Matagaluega. O le ala foi lea o le faamalosia o taiala ma faavaa o le galulue faamaoni, e limataitaina ai le faatinoga o galuega. E amata mai lava i le taimi e tau amatamata ai le tautua, e oo lava i le taimi e avea ai ma tagata faigaluega tumau. O lo o taumafai le Ofisa Sili aemaise o le pulega, ina ia grow se culture i totou o lenei Matagaluega, ina ia aua ne i aafia se isi i nei tuuiga.

E i ai le talitonuga, ua ese foi nei vaitau, e pei ona saunoa le sui usufono mo Siumu. O lo o i ai foi metotia a lenei Matagaluega o lo o agai i ai, aua foi le faamalosia ma le atinaeina o tagata faigaluega. Ina ia lelei le tatou team, ina ia aua ne i i ai ni tuuiga ma ni uiga faapena e tulai mai.

Na ou sau i le malaevaalele i le vайасо na tea nei. Sa ou vaavaai ma tilotilo, pe o fea ni mea e ono sao mai ai i ni tulaga faapea i totou o le malaevaalele. Na ou sau foi lea...ou te matauina foi,... ona o lea ua le sau le sui usufono mo Aana Alofi, na ou matauina le tulaga o ato, e pei ona...O lo o i ai foi le polokalame a lenei Matagaluega, e faafoia ai le tulaga lea o le ave sese e le isi o le ato a le isi. O lo o faaauauina lava i le taimi nei. O lo o galulue faatasi ai foi ma le Pulega a le Malaevaalele. O isi mea na ou vaavaai ai, o surveillance po o CCTV, ina ia mataituina pea ia le gaoioiga a le tagata. E po o fea e savali i ai, po o fea e agai i ai ma lana ato. E pei o mea na o lo o i ai vaega faapaaga o lo o matou galulue ai pea ma si vaega lea o le AA, o le Airport Authority ina ia faaleleia uma tulaga nei.

Ae o lo o i ai faamaumauga a lenei Matagaluega, e ao pea ona tuuina atu mo le silafia. O faamaumauga o nisi o laau faasaina ua mafai ona faaulufale mai ma ua mauaina e lenei Matagaluega. I le 2018 e 4 ia maruana. O le meths e tasi, na auala mai i le package i le Malaevaalele. I le 2009 o maruana na mauaina e 4 lona uiga e 4 tagata na ulufale mai ma laau faasaina nei ae tasi le cocaine na maua foi I le package i le Malaevaalele, i le tausaga 2020 na maua ai foi maruana e 4 ae tasi foi le cocaine na maua mai i le tatou courier lea o loo agai mai i le Falemeli. I le 2021 i le meths pau lea o le mea na maua i le tausaga lea , ona matauina foi o le taimi lea o le Koviti e lei tele lava ni malaga a vaalele ma ni vaa oloa na agai mai.

O le 2022 e le i se mea na faamauina atonu o le taimi lea o loo tatou iai pea i le Koviti. I le 2023 nao 1 tasi lava le maruana lea na maua ae silasila la iai

i le fuainumera ia e leo alu luga le tulaga o le sau agai i lalo. Aepeitai ina ia le tumamaina leaga o lea tupu o loo auina mai pea Fualaau faasaina i totonu o le atunuu, ae pei o le statistic lena e maua ai faamaumauga sao ia a le Matagaluega mo le silafia, o le matou va galulue ai ma le Matagaluega o Leoleo a maua e le Ofisa o le Tiute ia tulaga nei ona refer loa laia i Leoleo.

O Leoleo o latou e faatinoina le tulaga o moliaga ma le Faamaopopoina foi o evidence poo mau aua le tuuina atu o le tagata lenei i le Faamasinoga. O le tulaga lena o se faamaumauga ua mafai ona tuuina mai.

**Afioga Fuaava Suluimalo Amataga:** Lau Afioga i le Fofoga Fetalai se avanoa faamolemole.

**FOFOGA FETALAI:** Se i malie lau Afioga i le Sui Palemia sei tuu atu i le sui o Aleipata Itupa i Luga.

**Afioga Fuaava Suluimalo Amataga:** Ia faafetai, faafetai le Afioga i le Sui Palemia, Afioga i le Minisita e tusa ai foi ma faamaumauga lea ua aumai manino i le maota. E tau vaavaai atu i le trend lea aumai i le amata mai i le 4 ma le 1 ae pei ua uma e ua tau pau le numera lea maua mai i le Malaevaalele poo meli foi ma package ia aumai ai. Ae pei o le tele o saunoaga o loo agai e pei ua faatupulaia e vaai atu la e le tell lelei le tulaga foi lele ua laititi mea o loo maua lae agai mai totonu o le atunuu, aua saunoaga lea iai. Ae o loo maua foi ii o lea saunoa le Minisita o Leoleo na amata mai le 2018 e amata mai e tai 3 raids ma maua a ia laau faasaina poo le aisa foi. Ona agai mai la i luma e pei ua 5 pei e faasolosolo i luga ia raids ma tele, e pei la o iina lea tau atagia mai la le tulaga foi lele lea tupu.

Aua o lea e o atu a Raids ma maua, ae pei o le mea lea e maua i o pei na aafia foi le faamatalaga a lenei Itumalo, o tagata foi nei drugs loads popoto telee faataamilo le mea, afai e maua i le malaevaalele ma package ia. Lea na ala ai ona avatu ai se matou masalosaloga tulaga lea i le uafu lea tua Aleipata, aemaise foi o le fesootaiga lea o tatou ma le tatou Motu i Sasae, e pei e faigofie i le va lalata ma le fepasiaiga e aafia ai. Aua e tau maua foi nai faamatalaga i tua i si o matou Itumalo e iai a nisi alia e pei e fou i le latou vaai.

E pei e masani a au fai faiva ia i mea faapena ae pei o nai tulaga ia o lea aumai faamaumauga a le Minisita o Leoleo, o lea pei e alu i luga ia mea nei e osofai ai leoleo ma maua ia drugs nei. Ae pei o nai tulaga ia lea sa taua ai foi le mea lea o le tatou one payments system poo se mea foi e le mafai ona faaoga foi e tagata nei , pea faapea o lae trace e le Central Bank poo fea le mea le agai mai ai ia tupe nei ae na oni mafaufauga i se mea foi lea o lea faatamilo ai foi le pisinisi ma le polokalame a le latou foi, o loo faia nei tulaga ae mo se taumafaiga ia saogalemu si o tatou atunuu ma kilia le tele o nei faafitauli o laau faasaina ma le agaga faaaloalo faafetai.

**FOFOGA FETALAI:** Ia masalo o loo manino saunoaga a le Sui Palemia, o lea agai i le Custom i le vaaiga o le Tiute ao le tulaga lea ua uma ona saunoa manino ai le Minisitao Leoleo aua le silasila mamao foi o le puipuiga o tatou atunuu mai vaa fagota ma tulaga na. Ao le saunoaga a le Sui Palemia e pei o lea agai sao ii le Malaevaalele ma le Uafu, ia lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Faafetai lau Afioga i le Fofoga Fetalai , o le faapaaga lea la ou taua ma le Matagaluega o Leoleo o ii lae maua ai le trend o loo tatou talanoa ai , faapea lea pau i lalo le aofai o nei laau faasaina o loo aumai i totolu o le atunuu, e auala mai i tatou border poo le tatou tuaoi ao lea maua faamaumauga a Leoleo o lea alu i luga, o lona uiga o lea ua iai le me aua sosolo i totolu o le atunuu , poo le tatou leiloa foi nisi auala o loo auala mai ai ni laau faasaina i totolu o le atunuu.

O lea tuli mataina pea lenei tulaga ma vaavaai totoa iai, e taua foi le iai o ni sistema ma polokalame taua o nisi nei manaoga o lenei Matagaluega e mafai ai ona faatinoina le galuega ale Matagaluega ae lei ofi mai oloa ma tagata femalagai i totolu o Samoa. O se tasi lenei o polokalame taua o le maua lea o faamatalaga faavavave poo fesootaiga foi e agai atu i le intelligent i fesootaiga lelei, ma tatou tuaoi tatou i isi atunuu o loo vavalalata, aemais e foi ni faiga paaga.

O le faiga lea ina ia vave ai ona iloa tagata o lea malaga o loo iai le advance passenger information faapea foi ma faamatalaga o ni oloa o lea taunu mai i totolu o Samoa poo le cargo targeting system. A maua la faamaumauga nei i lona aotelega o lea fafaigofie ai ona tapena o galuega faatino ao lei taunu mai tagata ma oloa ia i totolu o le tatou laufanua. I le lumana i lea faatino uma nei galuega i lalo o le monitors surveilling camera system o loo iai se faamoemoega o le isi lea tool o loo manaomia o se tatou surveilling camera system ia lelei ona monitor 24 hours i totolu o le tatou Matagaluega o Tiute.

Ia o lea ou see ese mai tulaga o laau faasaina ae tau a na faapena atu se faamatalaga o lena ua nofo silafia foi le tulaga e pei ona iai. Ae ou te fia talanoa atu i tiute ma lafoga faamamaavega o oloa o aso uma e pei ona saunoa ai le Sui o Sagaga 2. E tomua atu se faamatalaga i le tau o iai nei le tiute o oloa mo aso uma. O le tele oa tatou oloa tau meaai sei tulou, e aofia ai le alaisa , falaoamata , susu , elegi o le tuna nisi o Fualau aina mata, ma fualauaina sua mai fafo , ua tuu saunoaina le tiute i le taimi nei.

Ou te manatua le tausaga na tea nei na ou faailo ai foi le tulaga lea, i oloa nei o loo tuu saunoaina, o nisi o oloa o meaai ma isi ua le oo iai le tuusaunoaina e afua ona o nisi o vaega taua o tatou ona e iai le faiga faapalen. O vaega nei e aofia ai le silasila i le soifua maloloina, tausiga lelei o le siosiomaga, faatasi ai ma le puipuiga o pisinisi, o loo faatinoina le gaosia o nei oloa i Samoa nei aemaise o lo o oloa o loo gaosia e tatou lava tagata.

O lo o faagasolo pea iloiloga a le Matagaluega e tusa ai ma oloa e faaaogaina e fanau laiti, Iloiloga faaaauau i oloa tau ava malosi o tapaa, meaai e aoga mo le soifua maloloina. Ia se taimi ona tuuina mai foi lea mo se iloiloga ma se faaiuga a le Palestine pea maea lenei galuega. O le galuega e faifaipea ma ose galuega taua i le fetuutuunaiga o le tau o oloa, o lesi taimi e maua ai foi le tatou tupe mai le vaega lea, ae maua foi se famamaavega mo nisi o le atunu.

Ae momoli atu lau faafetai i le sui lea mai Vaimauga Lau Afioga Lenatai sa talosaga mai lalo o le tulafono o tiute 2022 mo ni faamamaavega moo loa e auina mai i totonus o le tatou poloketi o le miliona. Lau Afioga i le Fofoga Fetalai e iai foi ia polokalame fesoasoani o loo faaaauau pea e le Malo ina ia maua ai tiute ma lafoga tuu saunoaina i atinae o le atunu e oo lava i atinae tau faatoaga. O se faataitaiga o lea na saunoa le Afioga i le Minisita o Faatoaga ma Faigafaiva i le tulaga o loo iai le toe tuuina atu i tua i le 20 tausaga o ni taavale o lea mafai ona omai i totonus o le tatou atunu mo le au fai faatoaga.

O tulaga o le tatou miliona o lea foin a silasila iai le tulaga lea, i nisi foi o vaega e tatau ona aumai e pei o mea ia na e saunoa ai Diace ma mea faapena e fai ai le mo mea o poloketi o atinae. Ou te iloa foi o le isi lea mataupu o lea silasila iai le Komiti o le Miliona ma aumai faatalosagaina foi lea o le tulaga lea e tauala mai le Matagaluega o Tupe ona soalaupule foi lea ma le Matagaluega o Tiute, ae ua faamauina foi lou finagalo. O le tulaga e pei ona iai o tatou laisene pisinisi lea na saunoa foi le sui o Vaimauga 3, Viamauga 1 o loo aumai pea lana faasea i le tulaga o le tuai ma faape mai. O aiga i fafo ua le mafai ona lesitala latou pisinisi ma aumai foi lana tuualalo e tatau ona faamuamua pea tatou tagata Samoa. Ioe ae lelei pea ona avatu se tala lata mai e tusa ai ma le tatou tulaga ua iai laisene pisinisi.

E oo mai le aso ua tele le fuainumera o le laisene pisinisi ua maea ona tuuina atu. Ua silia ma le 90% o pisinisi sa tatau ona laiseneina mo le tausaga ua maea ona faamaonia ma tuuina atu laisene I totonus o le 6 masina muamua o lenei tausaga, 90% ua maea ona iloiloina ma faamaoniaina. O laisene o loo totoe o pisinisi ua taulimaina ia talosaga ua tatau ona a le oo mai le talosaga ua oo le taimi ua tatau ai ona tapunia.

O loo iai foi nisi pisinisi ua taloaga mai ua mananao e tapuni latou pisinisi ona mon le silafia e iai isi pisinisi ua leva na le toe tatala ua 3 , 4 ,5 tausaga ao loo iai lava i totonus o le lesitala o pisinisi a le tatou Matagaluega . Ia ua avea foi lenei tulafono ma mea ua mafai ai ona kiligi le tatou register ma taumafai e update ia tulaga o pisinisi lesitala aemaise foi pisinisi ma le totogiina o latou lafoga ina ia update ia latou paymenstm. Le isi itu tau ua maua ai foi le fesootaiga a le Totogi Lafoga ma le tatou Matagaluega.

Ua amata nei galuega Iloilo a le Matagaluega ina ia mafai ona faamautu le lisi o pisinisi uma i totonus o Samoa, e lei oo atu lava ma o loo faatuai ona faaoo pepa moomia, e iai pisinisi o talosaga atu na faapea lea toe o e aumai

nisi vaega e leo toe tele. Ao latou nei ua le mafai ona toe oo atu, o le mafuaaga ua le mafai e latou ona faamalieina le Tulafono. Ae o loo iai pea le tulaga lea o loo aumai pea e le tatou Maota lenei e uiga i le lisi lea o fanua e iai se faataitaiga ou te fia avatua i le taua o le tapa e le Matagaluega o le lease... provide lease i luga o le fanua o loo faatino ai le pisinisi.

Ou te iloa lea afio mai le Tamaitai o le Tausi Mavaega , le Faauluuluga o le Tausi Mavaega o ii o loo iai le isi faafitauli , ua toa galuega a le Public Trust ona ua le mafai ona e administer ia states ona o eleele o loo iai ia estates nei ua leva ona tatau ona faagasolo ma faamatuu atu i e ona estates o loo ia le au faipisinisi o i latou nei ua o atu faatu pisinisi i luga o eleele lea e le o ni latou eleele, ma fai a latou lisi, a o lisi o lisi i le MNRE e 20 i le 30 tausaga. O lona uiga e le mafai lava o na fai se mea i luga o le eleele lea, seiloga lava e agai foi i le Faamasinoga ma tulaga faapena. O le taua lena o le i ai o le lisi. O lea foi na ou faalogologo atu o saunoa foi nisi o Minisita i le taua o le i ai o le lisi i mea faapenei, ia manino le tulaga e tu ai le pisinisi, ia aua ne i toe tulai mai nisi feeseseaiga i le va o le tagata e ona le pisinisi ma le tagata e ona le fanua. Ia pei o le tulaga lea e toe faapai atu ai ma toe faamanino atu le tulaga lea.

Ia o le tulaga o le tatou TIMS, ia o lo o sologa lelei le tatou TIMS.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai pe maua se avanoa...

**FOFOGA FETALAI:** Ia malie lau Afioga i le Sui Palemia se i tulai mai le sui usufono mo Vaimauga 1.

**Afioga Sulamanaia Fetaiai Tauiliili Tuivasa:** Sa ou talanoa i le laisene pisinisi. Faafetai lava i lau Afioga i le Fofoga Fetalai. Ona o le tasi lea o issue sa gugulu ai le atunu i le amataga o le tausaga. E silafia foi o le faafouga o laisene pisinisi e amata mai ia Tesema ia Ianuari. A uma loa Ianuari e le i faafouina laisene, ia ua charge loa le isi late fee lena e \$200. O le popolega la lea na i ai le sui usufono aemaise o le atunu, o laisene toe faafou, ua toe o atu le atunu e toe faafou laisene, ae fai mai la e o e aumai owner o fanua. A o laisene o la e alu lava, renewal.

O le popolega la lea na i ai le sui usufono, lea foi ua tautino le Minisita, e tele isi faleoloa e le i o atu e faafou laisene, ona o le a? O lea la o le a toe o e toe tapena uma mai le mea lea. Ae o le naunauga lava ia sa i ai le sui usufono, apalai la faiga fou ia ua taunu atu foi le Minisita i mea o new license, tagata fou lea e fia apalai. A o e lava o la e sa leva ona exist ma renewable, na o le faafou lava. O le taimi lea o le amataga o Ianuari, e o atu uma lava le aufaipisinisi e tapa ona logo loa lea o le Matagaluega o lea e i ai tulaga lea e faaletonu, o e aumai. Ae ia faafou le laisene, aua a uma le piriota lea ia Ianuari, e toe totogi foi le isi fee po o late payment i luga o le atunu.

Ae pei o le popolega lena ona o lea ua aafia fua tagata la e alu lava pisinisi, lea la ua faafogoa le tele o isi e le i toe omai, ua le mafai ona toe o. O a la mea o le a toe o e saili mai? E pei o le popolega lena. O lea foi sa ou taua le tulaga i nai tagata e omai fafo pe 2 vайасо e omai e fai se faleoloa. Ia e pei o le tautino lena, e alu lava le tagata lea na sau e fai se faleoloa e le i maua le laisene. Ona o le a? O le tele o fesuiaiga lea ua i ai. Ae pei o le tulaga lena s ai ai foi le tulaga sa tasi lava le mea e o i ai, a meet lava requirement, aumai le ioega o le fanua faaleaganuu lea e i ai, aumai e fia le tupe e amata ai ma le location, issue loa le laisene. Ia a o le mea la e i ai, e pei o le agaga lena o lea e tau fai atu i le oi o le atunuu lea e i ai, ona o le umi o le process lea i ai. Ia ma lou faaaloalo lau Afioga i le Fofoga Fatalai.

**FOFOGA FETALAI:** Ia, o lea ua maua atu le agaga o le sui usufono. Lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Ia, ta te faaeteete lava i upu, leaga a e saunoa ma e faapea mai ua oi le atunu, ia, tailo. E i ai se faamaumauga o lena mea pe na o sou tei mai Niu Sila lena na sau e fai lana business license ae toe iloa ifo e le agavaa aua e nofo i fafo? O mea faapena e... Leai onosai mai o lea e... ia e malie.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fatalai e leai. E ala ona ou tulai atu lau Afioga, o lou itumalo e toe o atu, o la e i ai pisinisi, ae ua toe o atu po o le a le tulaga e fesoasoani atu ai le faipule.

**FOFOGA FETALAI:** Ia, ou te faamalie atu i le sui usufono, o lea ua saunoa le Sui Palemia i le mea o i ai le tulaga o le Malo, ma o le tulaga lava lena. Ou te iloa e le o le taimi muamua foi lenei ua e lagalaga lenei mataupu i totonu o le Palemene. A o lea lava e tali manino lava le Sui Palemia ia i le faagasologa i lenei foi vaitaimi. Se i tulai mai lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fatalai, a expire loa lau business license ia Tesema, ua leai sou laisene pisinisi. O lona uiga, ua tatau lava ona e toe apply i le isi laisene pisinisi. O le renewal lava, o le isi lena application, aua e expire uma lava i lalo o le Tulafono pisinisi ia Tesema. O lona uiga, a e alu atu e toe renew, e te alu atu ma toe avatu uma lava mea na e i lalo o le Tulafono. E tatau ona e talia le sui usufono lea, o le Tulafono e i ai lona aoga na fausia ai le Tulafono. A e le maua la le tulaga lena, ia o lou faanoanoaga lena ia te oe. O la e maua uma mai e isi sui usufono o le Maota le taua o lenei mea o le Tulafono, e limataitaiina ai le faaleleia o le auauanaga, le faamaninoga o se mea ia aua ne i i ai ni mea faaituau pe faaalatua ma ia manino, ia aua ne i toe i ai ni vevesiga

po o ni tulaga e tulai mai i luga o fanua. Ia ou te ofo foi au i sou le malamalama.

Lau Afioga i le Fofoga Fetalai, ia o le a faaaauau pea, e le o toe umi se faamatalaga, ae ona o le tulaga o popolega, o lea foi na afua ai le toe tetueuga o le Tulafono lea, o lo o toe tapena nei foi nisi teuteuga o la tatou Tulafono o Laisene Pisini, ina ia mafai ona maua le faamaoni o i latou e ona pisini, e pei o faleoloa, o i latou moni e ona pisini ia. O le sole trade la i le taimi lenei, e talosaga mai le sole trader, o le tagata toatas. I le taimi lenei, a e talosaga mai o oe e ona mea uma ia, o oe e ona le faleoloa, o oe e ona le fanua, o oe e ona le oloa, o oe foi e ona le pisini, ia ona matou avatua lea o le laisene pisini. Peitai, e oo atu i tua i le mea e i ai le faleoloa, e le nofo ai le tagata lea i luga o le fanua lea, e le o ia la e faia le faleoloa, e le o ia e ona oloa, e le o ia e ona le tupe, e leai ma sana pule i le faleoloa. O le mea la lena ua i ai le manatu o le Matagaluega lenei e toe tapa le finagalo o le tatou Kabeneta e toe teuteu le vaega lea o le Sole Trader ia aua ai ne i faalafi e o tatou tagata i latou o lo o omai fafo e leai se pemita faigaluega, e leai se pemita laisene, e leai se pemita e mafai ona nofo ai i Samoa. O lona uiga o lo o nofo faasolitulafono i totonu o Samoa. O lea la o le a toe teuteu le tatou Tulafono lea ina ia taofia ai le mea lena. Ua outou silafia le mea lea ou te talanoa atu ai, o le faamaoni. O tatou tagata lava tagata lea e faatupua le solitulafono lea, o le faalafi o tagata e leai ni pemita po o ni laisene i totonu o latou faleoloa.

Ia, lau Afioga i le Fofoga Fetalai, ou te iloa ua le toe umi, toe tasi lava si vaega lea, ou te fia talanoa i le Tala Faatatau o le Tupe, o lau mataupu mulimuli lea. Lau Afioga i le Fofoga Fetalai, ia ua oo mai tala i totonu o le Maota lenei, ua oo le tatou Tala i le \$1 piliona. Ua i ai foi saunoaga ua faapea mai, ua na o ni tupe fuafua ma ni fuainumera taumatemate e pei o ni estimates i le vaaiga faa-accountant.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, o se mea e fia malamalama ai.

**FOFOGA FETALAI:** Ia, malie lau Afioga i le Sui Palemia... o le a se mea ua e fia malamalama ai?

**Tofa Hon Lauofo Fonotoe Nuafesili Pierre Lauofo:** Leai o le mataupu lea sa ou taua i lau lauga, lea foi sa ou fesiligia le Taitaifono o le Komiti o Tupe i le galuega foi lea a le Forensic Audit, ona o lea ua ou faalogo atu ua faaiui le saunoaga matagofie a le Afioga i le Minisita o le Audit Office. Ae o lea sa tali le Afioga i le Taitaifono o lea ou te tau manatua, faapea ai na tender le galuega lea, ia pe tasi ea le kamupani ua toe re-tender foi. A o lea e maua le faaaliga a le Ofisa o le Okika e toa-10 le aufaigaluega e qualify e fai le galuega lea o le Forensic Audit. Ia po o le a se finagalo ae faaaoga le

aufaigaluega a le Ofisa e faatino le... e faasaoina ai tupe a le tatou Malo. Aua o le Tala Faatatau o Tupe lea na tea nei sa ou vaai sa faaagaaga ai le \$500,000 a o lea ua ou vaai atu i le Tala Faatatau o Tupe lenei o lea ua faaagaaga ai le \$1 miliona a o lea lava e le i tino mai. Ae o se fautuaga...

**FOFOGA FETALAI:** O lea ua maua atu le finagalo o lau Afioga i le Taitai o le Itu Agai.

Se i tulai mai lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Ia, e matau atu o le fesili lea o lea e agai mai le tulaga o le Okika. Ia, ou te le mautinoa pe moni o lo o i ai nisi e agavaa i totonu o le Ofisa o le Okika. O lau matau, o i latou o lo o faigaluega i totonu o le Ofisa o le Okika, o latou na e agai e faatino galuega a le Malo, ma e le toe omai latou e toe suesue le Malo ma toe suesue tulaga sa galulue ai latou i ia tausaga ua tea. E pei o le mafuaaga lena.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Ia pe i ai se mea o faafinauina?

**Tofa Hon Lauofo Fonotoe Nuafesili Pierre Lauofo:** E leai o le tala lea e fai atu, o le tala lava na saunoa mai ai le susuga i le Okika, e toa-10 qualify auditors a lona Ofisa i le mea lea o le Forensic Audit, e faatino le Forensic Audit, lea la e mafua ai ona ou fesili. Leaga o la e saunoa mai le Afioga i le Minisita o le Audit, na te le o silafia po o sao lea faaaliga. A o le faaaliga lava lea na aumai le Ofisa.

**FOFOGA FETALAI:** Masalo o le matapu tonu lava lena e fitoitonu ma le Minisita o Tupe. Se i tulai mai lau Afioga i le Minisita o Tupe.

**Afioga Hon Mulipola Anarosa Ale Molioo (Minisita o Tupe):** Lau Afioga i le Fofoga Fetalai, faafetai mo le avanoa. Ou te talitonu o le auga lava ia o le tatou Malo ina ua taunuu mai, ia, o lo o i ai nisi o tatou poloketi e tele lava lona faaletonu. Ia manatua foi ne i galo i lau Afioga i le Taitai o le Itu Agai, o le process uma lava e through i le Audit Office. O le fesili la; how independent a le Audit Office faatino ai le galuega lea? O le naunautaiga o le tatou Malo, ia tutoatasi le faatinoga o le galuega lenei. O le auga tonu lena ua faasalalau ai ina ia mautinoa ia aumai foi le opinion ia tutoatasi ona o le Audit Office, they are part of the process.

E pei o le faamalamalamaga lena lau Afioga i le Taitai o le Itu Agai. Ma le faaaloalo.

**FOFOGA FETALAI:** Ia, masalo ua malamalama lau Afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** O le mea e fia faasao, o lalo o le Tulafono o le Audit 2013 ma le tulaga o le Audit e independent. E independent, o ia o le watchdog a le Malo e siakia uma galuega a le Malo, e lipoti sao mai lava i le Maota lenei, e le lipoti i le Kapaneta. O le sao lena.

**FOFOGA FETALAI:** Ou te fesoasoani atu i le Taitai o le Itu Agai, taatia pea le faigamalo latou ma a latou fuafuaga, ae o le tatou fesiligia o lena tulaga, ia e tali lava le Malo. O le mea lea, ia faauma mai le saunoaga a lau Afioga i le Sui Palemia.

**Afioga Hon TUALA TEVAGA IOSEFO PONIFASIO:** Faafetai lau Afioga i le Fofoga Fetalai. Ia o lea e faaeteete lava i se tala e fai atu ona o le tutoatasi o le Okika. E pei o le tulaga lena o lo o i ai nai popolega foi lea o lo o i ai i le faaaaogaina lea o tagata mai le Ofisa lea e omai e toe audit mea ia na latou audit ina muamua. O lea foi e faailoga fesili ai lava la ma le tulaga o ovataimi ia a fomai, e le i pick up ina e le Okika \$400 lea. E faapefea la le tulaga lena? E pei o mea faapena e i ai popolega.

O le isi mea mo le silafia e lau Afioga i le Fofoga Fetalai ma le Maota lenei, o lo o i ai se faafesili tele lava i le Ofisa leao le Auditor ona o lo o i ai se kamupani o lo o faigaluega i totolu o le Auditor o lo o pay i tupe a le Malo, a o tagata nei, o lo o fesiligia le kamupani lea, po o le a le auala ua ala ai ona mafua ona faafaigaluega i totolu o le Okika. Atonu la o le kamupani lea faapea e avanoa e mafai ona latou faia le Forensic. O auditors ia o lo o fesiligia e au lenei i le taimi lenei, ma ua tuuina atu le instruction i le tatou Loia Sili ina ia silasila totoa i ai pe talafeagai le faafaigaluega o lenei kamupnai i totolu o le Ofisa o le Okika. O i lea e fesiligia ai le independent o le Auditor. O le tali atu lea lau Afioga i le Fofoga Fetalai.

**FOFOGA FETALAI:** A lailoa lava lau Afioga i le Sui Palemia.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, leai ona o lea e saunoa le Afioga i le Sui Palemia...

**FOFOGA FETALAI:** E le o i ai se tulaga o se fefaafinauaiga o le mataupu lea.

**Tofa Hon Lauofo Fonotoe Nuafesili Pierre Lauofo:** E i ai a si mea lea, e laitiiti lava lea ona ou nofo loa lea i lalo ua uma.

O le saunoaga a le Ofisa o le Okika, e toa-10 ia... o le latou aufaigaluega na fai le latou training...

**FOFOGA FETALAI:** Ia te au foi ia lau Afioga i le Taitai o le Itu Agai, e le aumaia le tou talanoaga ma le Okika.

**Tofa Hon Lauofo Fonotoe Nuafesili Pierre Lauofo:** E leai o le faaaliga na aumai, leaga o lea e fesiligia le independent o le Ofisa. E le o faaaogaina la le kamupani lea i totonu...

**FOFOGA FETALAI:** Ou te fesoasoani atu i lau Afioga i le Taitai o le Itu Agai, ia...

**Tofa Hon Lauofo Fonotoe Nuafesili Pierre Lauofo:** A o latou na train i le course lea, ua uma, ua qualify. Faafetai. Ua uma.

**FOFOGA FETALAI:** E le afaina, ua uma ona malamalama ai le Sui Palemia ma le Kapaneta.

Ia, faaauau le saunoaga lau Afioga i le Sui Palemia. Aua e te toe tepa i tua i mea ia, ae faaauau lau saunoaga, faamaea lau saunoaga. O lea ua malamalama, o lea lava ua uma ona taatia a outou faiga faavae, o lena. Ae faaauau lau saunoaga.

**Afioga Hon TUALA TEVAGA IOSEFO PONIFASIO:** Faafetai. O lea sa avatu lau faamatalaga i le saunoaga foi e faapea ua oo i le \$1 piliona tatou paketi, aemaise foi o tupe fuafua ia na aumai, ua na o ni nai fuainumera, e pei e matemate, pei na o ni estimates i lona tau i le vaaiga lea faa-accountant. Ia, ae o lau matau, o le fua faatatau 2023/2024 a le Tamaitai Minisita, le Ofisa Sili o Pulega ma le Matagaluega o Tupe, ma o le tatou Malo foi lea, ua faailoa mai ai le maua o le latou faatuatuaga, po ua maua lo latou confidence i le tapenaina ma le faatulagaina o le tamaoaiga o le tatou atunu. Ua i ai le talitonuga e mafai lava e Samoa ona faaauau atinae aua le manuia lava o si o tatou atunu.

Lau Afioga i le Fofoga Fetalai, o ole talitonuga foi lena o lenei Matagaluega i ana fuafuaga alualu i luma. A mafai ona totogi uma lafoga a tagata totogi lafoga, tatou onosaia le faatinoina o tatou Tulafono ma tatou usitaia le tatou Matagaluega, atonu o i o le a faaitiitia ai lo tatou faalagolago tele i fesoasoani mai atunu i fafo. O le talosaga foi lena a lenei Minisita, e ao ona tatou talanoa i le lagolagoina o le tatou Tulafono, le lagolagoina o le tulaga o le uunaia o le totogi o lafoga, aemaise foi aitalafu. O le naunautaiga o lenei Matagaluega, e le o se Matagaluega ao aitalafu, leaga e alu le taimi, e alu resources, e oo lava ina aapa i Tulafono. E le o le tulaga lea o lo o naunau i ai le Matagaluega lenei, o le voluntary compliance. O le mea lea o lo o matou

vaavaai i ai, o le alu i luma. E le o ni tupe tele, o tupe o le tax, na o sina vaega o pasene e fua i au oloa o lo o faatauina, ia po o lou totogi foi o lo o e mauaina.

Ia, o le tala lea lau Afioga i le Fofoga Fetalai ma le ava tele. E momoli atu le faafetai i le tatou Maota i le lavapapale foi i se faamatalaga ua tuuina atu, ia faamagalo mai le leo pe a le tusa ai ma se faafogofaga a outou Afioga i se sasi foi o lenei sui usufono.

E momoli atu lau faafetai i le matou Matagaluega i le Ofisa Sili o Pulega aemaise foi le Pulega ma i latou uma o lo o galulue punouai, o lea ua tino mai lo outou tautiga i lenei tausaga, aemaise foi se faamalo i le Ofisa Sili o Pulega o le Matagaluega o Tupe ma lana Vaega ma le Minisita o Tupe, ona ua i ai lou talitonuga o lenei Paketi, o le tupe fua faatatau mo le alualu i luma o le manuia o Samoa.

O le tala lea, ia manuteleina le faasausauga a le tatou Maota i lenei afiafi, aemaise foi le faafogafoga mai a si o tatou atunuu. Soifua.

**FOFOGA FETALAI:** Ia, ua faamalo saunoa i lau Afioga i le Sui Palemia e tusa ai foi o nisi foi o mataupu sa lagalaga e le paia o le Maota, atonu o lea ua talifuaitau. Afai foi e le o atoatoa, tatou faamoemoe i le Atua e fesoasoani mai i lo outou faafogofaga foi i nisi foi o saunoaga ma... ae tatou faamoemoe pea i le Alii e fesoasoani mai. Ae faafetai mo lau saunoaga, aemaise foi o nisi o mataupu sa lagalaga e le Maota.

Ia, ua tatou oo mai i lau Afioga i le Tamaitai Palemia, o le tatou toe lauga o le po.

**Afioga Hon FIAME NAOMI MATAAFA:** Faafetai tele i lau Afioga i le Fofoga Fetalai. Faamalo lava i le faatautaiga o le tatou fonotaga o lo o faapea ona faagasolo, faamalo foi le usufono i le mamalu o le Maota, e ui ona ua tuleva foi le afiafi, ae faamalo le agaga onosai ma le tauatai, aua le faamoemoega o le tatou galuega o le faataatia lea o a tatou fuafuaga faataatitia ma le tamaoaiga ua faapea ona fuafuaina e faagasolo ai galuega o lenei tausaga o le a tatou pasia.

Lau Afioga i le Fofoga Fetalai, ia, o le Tala o le Tupe e le o se mea fou, ae o se galuega tupito lea a le Palemene i lea tausaga ma lea tausaga. E fofola atu fuafuaga a le Pule Faatonu, le matou saofaiga lenei, ona faapea lea ona iloilo e sui usufono o le Palemene. Ia o lea ua tatou taunu mai i le faagasologa o lenei lua vaiaso, o lo o tatou talanoaina le Tala o le Tupe i luga o le Lipoti mai a le Komiti o Tupe. Ma e tauala atu i le Nofoa, lau Afioga le faamalo i le Afioga i le Taitaifono ma sui usufono mamalu o le Komiti o Tupe e tusa ai foi ma le gapatia i le iloiloina ma le sailia o fuafuaga ua taatia atu i le Tala o le Tupe, aemaise le tauala atu i tatou Matagaluega ma Faalapotopotoga eseese.

Lau Afioga i le Fofoga Fatalai, ia e soosoo atu le galuega a le Kabeneta, o lo o feagai foi au ma Matagaluega e 5, o le Matagaluega o le Palemia ma le Kabeneta, Matagaluega o le Va i Fafo, o le Komisi e Pulea le Aufaigaluega a le Malo, Ofisa o le Loia Sili faapea le Ofisa o le Komesina o Sulufaiga.

Lau Afioga ou te iloa o le tele o mataupu sa feofoofoi ai le Maota i lenei lua vайaso, o lea foi ua tele ina talifuitau le Taitaifono o le Komiti, o lea foi ua faagasolo le talifuitau a Minisita o le Kabeneta. Ou te manatu o au foi matafaioi e matauina e pei o nai mataupu o le Va i Fafo, o mataupu o le Komisi e Pulea le Aufaigaluega a le Malo ma e faasino i tulaga o loia po o le Ofisa foi o le Loia Sili, o le PSC, ma fesiligia ai totogi o Faiaoga po o Pule Aoga, ma mulimuli ane, o le PSC ma le Matagaluega o le Soifua Maloloina e pei foi ona saunoa manino i ai le Afioga i le Minisita o le Soifua Maloloina.

Ae tau ia ina ou tali atu i nisi o tulaga e pei ona laga i le felafolafoaiga a le tatou Fono. O le Fonotele lea a Taitai o le Malo o le Taupulega, ou te manatu ua manino lava le faamatalaga a le Taitaifono o le Komiti o Tupe, ma le tupe lea ua faaagaaga e tapena ai mo lea tausaga, aua o lea ua fuafuaina le Fono lea e usuia i le masina o Oketopa i le tausaga fou. Ae tau ia ina ou faaopoopo atu lau Afioga i le Fofoga Fatalai ma le mamalu o le Palemene, pe tatou te manatua o le ofo a Samoa e talimalo i lea fonotaga, o se ofo sa faapea ona molimoli atu i le tatou faigamalo talu ai. Ae mafai la ona tatou faapea o se galuega faaaauau i le tulai mai foi o le faigamalo o lo o tauavea le tatou Malo i lenei vaitau, ae le o se fonotaga laitiiti le fonotaga lenei. Ma o se taimi muamua foi lea o le a talimalo ai se motu o le Pasefika. Sa talimalo Ausetalia i totonu o le tatou itulagi, o le tele foi o fonotaga a Taitai nei e tele lava i laumua o atunuu tetele, a o lea ua fuafua ma ua ioeina foi e fono a Taitai, o le a faapea ona tatou talimalo. Ia e le aumaua foi avanoa faapea e molimoli atu ai i lenei Faalapotopotoga o lo o i ai ona sui i vaega eseese o le kelope, e molimoli atu foi i ai a tatou mau tauave i le taumafai i le atinae, aemaise o le tatou galulue faatasi ma a tatou paaga. E le gata la i Malo o le Taupulega, ae faapea foi i Malo Aufaatasi e pei o ituaiga Faalapotopotoga tetele ia, e saofafai ai atunuu ma tatou faasoa, ia ma maua mai ai foi ma alamanuia mo i tatou.

Lau Afioga i le Fofoga Fatalai o le isi mataupu tau le Va i Fafo, sa fesiligia le polokalame foi lea e fesoasoani mai ai Malo o Europa i Malo o Aferika, le Karepeane ma le Pasefika po o le ACP. Ia o se polokalame masani lea e tauala mai ai foi nisi o faamanuiaga mo i tatou. Ma sa faaaauau mai i lalo o se maliega o le COTONOU Agreement, ma na faapea ona faaiuina ia Fepuari o le tausaga 2020/2020 i le faatulagaina lava ia o le tuu taimi o le polokalame lea a le EU. Ia, o lea ua tatou oo mai le 2023, ma o le auga o le fesili pe a maua atu, po ua i ai se to'a o le tauala mai o le fesoasoani lea mai Malo Europa. E ui ua muta le taimi faatulagaina o lea polokalame i le 2020/2020, a o lo o faaaauau mai pea le polokalame aemaise o tupe

faaagaaga. O lo o i ai lava le faamoemoe o le toe sainia o se isi maliega i le va o le ACP ma le EU, ma o tuutuuga sa sau ai, e sosoo le COTONOU ma le maliega e fai mai i inei i Samoa, e tau la o le Samoa Agreement, a ua to'a le sainiga, ona e ui ua maea foi feutanaiga, negotiations i le va o le ACP ma le EU i le faatinoga o lea maliega foi ua taua o le Samoa Agreement, ae o lo o to'a ona o le itu a Europa sa i ai se tulaga sa le auai le Malo lea o HUNGARY. Ia e silafia foi e lau Afioga ma le mamalu o le Palestene, o le faiga lava lea o faalapotopotoga faaitulagi, a tasi lava le sui e le malie i se maliega, ia ona to'a lea. Sa i ai la le to'a i le Malo lea o HUNGARY, ae na faaali mai o Aperila ua tatala ai le to'a lea ua faamalie HANGRY i ana lava mataupu e tusa ai ma le maliega lea ma le ACP. Ae peitai ane, ua faaalia foi e le atunu o Poland, e i ai foi latou mataupu ua to'a ai foi le sainiga o le maliega lea.

Ia, o ala o mea i itu e faafesagai, ae ou te manatu o le auga, pe o faapefea le fesoasoani o lea sa masani ona tatou maua. O le tali puupuu la lau Afioga i le Fofoga Fetralai, aemaise foi le laga mai e le sui usufono sa aumaia lenei mataupu, o lea o lo o faaauau pea le fesoasoani a le EU i lalo o le mea e tau o le Neighborhood Development Indicative Cooperation Instrument, ma e \$79.5 piliona o le tupe lea e faagaaga e malo o Europa e fai ai ana galuega tauatiae ma ana paaga i le kelope atoa. Mo Samoa lava ia, ua faaagaaga le \$13.4 miliona Euro mo tatou. Ma o tausaga o lea e faagaaga i ai le fesoasoani lea po o le tupe ua faatulaga e le EU, o le 2021 i le 2027. O tatou la ia, o le polokalame lea e maua mai ai le tatou \$13.4 miliona. Ma o le vaega faapitoa o lo o agai i ai le fesoasoani a Malo Europa, o le tatou Sector lea o le vai, ma ua leva lava ona faapena ona tupito lava le ave o le fesoasoani mai le Malo o Europa mo le tatou Water Sector. Mai le \$13.4 miliona lea, o lea ua faamaonia mai le \$9.1 miliona Euro mo tausaga e 4, tausaga la ia e faitau mai le 2021, ae faai i le 2027. O tausaga e 3 o le a totoe o le a toe iloilo i le mid term review o le piriota lea, po o le a le faaagaaga ma le fuafua a Europa i isi ana tupe o le a faapea ona faalu mo ana fesoasoani ia. O lona uiga la, e le o saisaitia le faagasologa mai pea o fesoasoani a Europa i luga o le sainiga o maliega ia, lea e sau ai maliega i le va o le EU ma le ACP. O lo o faagasolo mai pea, ae atonu a uma le poloka o lo o i ai ia Polani, atonu o le a latalata mai se taimi e saini ai le feagaiga fou, ma e faapea e fia saini mai i inei i Samoa, ma o lo o i ai foi tupe faaagaaga i lalo lava o le polokalame lea e fesoasoani mai ai i lena foi sauniga pe a taunu. Lau Afioga o le faamatalaga lena o le fesoasoani mai a le EU.

Ona ou oo mai ai lea i le Ofisa o le PSC. Ia, atonu ua tele foi tatou faamatalaga na fai i loia po o lava loia, po o le le lava foi o loia o lo o i totolu o le Ofisa o le Loia Sili. Ae atonu e taua lava, ma e faafetaia foi finagalo o sui usufono faaalia, ona e taua tele foi lea auaunaga, e le gata i tulaga faaletulafono, aemaise o isi foi auaunaga i totolu o le tatou Malo. Ae tau ina ou faailo atu e faapea; o lo o faamauina i le taimi lenei e 159 loia o lo o

resitalaina i le Sosaiete o Loia a Samoa. Ma e 79 o lo o galulue i Matagaluega ma Faalapotopotoga a le Malo, ae 22 le aofai o i latou o lo o galulue i totonu o le Ofisa o le Loia Sili. I le matau a le Komisi, o lo o gafatia le faitauaofai o loia o lo o galulue i totonu o le atunu, peitai e le o lava loia o lo o galulue i le Ofisa o le Loia Sili. I te' i ua umi se faamatalaga lau Afioga i le Fofoga Fetalai, o le gaoioiga ia, o lea e vaai le Komisi pe faapefesa ona fetuunai loia o lo o i totonu o le Malo e lagolago i le galuega a le Ofisa o le Loia Sili. E i ai foi fuafuaga a le Ofisa ia o le Loia Sili i tapenaga o avanoa e toe aotauina ai i latou o lo o i totonu o le Ofisa, ma e le mafai foi ona alofia, o lea foi ua tatala mai e le Komisi e toe silasila i ni avanoa sikolasipi mo a tatou loia. O sikolasipi e le o se fofo vave lena mo lenei taimi, aua o lea e fia maua vave ni a tatou loia. E lelei mo le fuafua agai i le lumanai. A o le mea moni lava ia, o le matuai tele lava o loia, a o le mataitu - aemaise o lea e faagasolo le toe iloiloina e le Komisi o le aufaigaluega i lea Matagaluega ma lea Matagaluega, ia e aofia ai foi ma le toe iloilo o tulaga o tofiga ma galuega faatatauina i totonu o le Malo e tauaveina e tatou loia.

O le isi foi laasaga sa mafai ona fai i le va o le Ofisa o le Loia Sili ma le Komisi e Pulea le Aufaigaluega a le Malo ma le tatou tino foi lea e faatatauina, fuafuina totogi o tagata faigaluega, o le faatulagaina lea o rankings o loia, foi lea i le tulaga o le tagata faatoa pasi mai lana aoga, o le tagata ua feoloolo ona tausaga galue, o le tagata ua fai nisi aoga faoopoopo, e faapena ona faatulaga ai le scale foi mo le tofiga lava o loia ia. Ma o se gaoioiga lea e tatau foi ona fai mo isi ituaiga o polofesa po o professions i totonu o le tatou atunu, e pei foi o inisinia lea e saunoa mai le Minisita o Galuega Tetele i le tele o ana inisinia o lo o i ai. Ae faapena. So o se galuega lava, so o se tomai, e faapena ona faatulaga ma fatufatu e fua foi i ai totogi o le Malo, aemaise o le faasoa mo galuega o lo o manaomia ai le tauaveina o se tiute po o se galuega.

Ia, ou te faamoemoe lau Afioga i le Fofoga Fetalai o le a lava lava se taumafaiga a le tatou Komisi o lo o Pulea le Aufaigaluega a le Malo i ni metotia e mafai ona tali atu ai i manaoga o auauanaga faa-loia i totonu o Matagaluega a le Malo, aemaise le tatou Ofisa o le Loia Sili.

Ona ou oo mai ai lea i se faafesili sa tuuina mai mo totogi o Pule Aoga ma Sui Pule Aoga. E sao lava le mau sa momoli mai e faapea e faatulagaina totogi e fua i luga o le faitauaofai o tamaiti aoga o se aoga. Ma o se faiga lea sa faatulaga mai i le 2018. O lena foi vaitau pei ona tatou manatua na amata ai loa ona faakonekarate le vasega lea o Faiaoga. Ae i le faagasologa lava o le review a le PSC lea o lo o faagasolo, e aoga foi le tuualalo ua tuuina mai i le tatou Maota, ae o se mea o lea ua toe silasila i ai le tatou Komisi e Pulea le Aufaigaluega a le Malo.

O le taimi nei, tusa e lima laasaga o totogi. A fua i le Pule, e amata mai le \$45,000 ae faai i le \$75,000. O le Sui Pule e amata mai le \$38,000 ae faai i le \$61,000. O lea la e pei e tau matau atu i le sailiiliga a le tatou Komisi, e

le gata i le aoaotetelega, a o lea foi e vaai atu ma e sao foi latou, e le tatau ona lima ni laasaga. O le tofi lava ia o le Pule po o le tofi o le Sui Pule. O lea la e pei e foliga mai e ono agai atu na o le lua lava ni laasaga o totogi e fua mo tofiga ia o tatou Pule Aoga ma Sui Pule Aoga, a o se tali atu lena i le laga mai o lea mataupu.

Lau Afioga i le Fofoga Fetalai, ona ou oo mai ai lea i le Matagaluega a le Soifua Maloloina ma le Komisi e Pulea le Aufaigaluega a le Malo. Ou te manatu e le tele tele naua sau faamatalaga o lea ua saunoa le Minisita o le Soifua Maloloina ma fofola foi laasaga o lo o faagaoioi ai le faatalanoaga i le va o lana Matagaluega ma le aufaigaluega aemaise o le faamalumaluga a le PSC.

Ae atonu o lea lava e maua mai, e pei o isi foi lea tulaga ua faatulai mai ai le faafaigata o lenei mataupu, o le suiga o le Pulega ina ua toe tuufaatasi le Matagaluega o le Soifua Maloloina i le 2019. Ae talu mai le 2019, o le mea moni, o le tulai atu o le tatou Komisi fou i le amataga o le tausaga nei, le Taitaifono ma Komesina e toalua na faaopoopo e atoa ai le toatolu o le Public Service Commission, ia o lea faatoa faamautu ai loa se gaoioiga e toe faatulaga lelei ai le tatou Matagaluega lea. Ona e pei e foliga mai talu mai le 2019, pei sa faasolosolo foi lea faaloulemaga le tatou mataupu. O lea pei sa faitau e isi o lea lava e i lalo o le auaunaga sa i ai i le Pulega sa i ai muamua mo auaunaga, ae o lo o i ai lava le vaega sa i lalo o le Matagaluega.

Lau Afioga i le Fofoga Fetalai ma le mamalu o le Palemene, e le fou le mea lea e tupu i manaoga o le aufaigaluega o le Soifua Maloloina. I le faasolo mai o faigamalo i Paeaiga talu ai, e tupu pea, e tupu pea, e tupu pea lava. E le o se mea foi e ao ona faateia ai le tofa i le Malo po o se faafogagaaga foi a le Palemene. o mea e tupu mai pea i le soifuaga o le galuega faale-Malo aemaise lava le Matagaluega lea.

Ou te matauina i Paeaiga foi ua mavae ma le faiga faavae a le Malo lea sa tatou sau ai, ma o lea lava ua taatia ai nisi o vaega tetele o le Malo, i le tuuksesese lea o itutino e faafoeina faiga faavae ma itutino e faatinoa auaunaga. A tatou toe faagasolo mai tuua i le amataga o lena faiga faavae, ia na i ai se vaaiga lautele o le tuuksesese o vaega nei, e faamatuu atu ai i le atunu le avanoa e galueaiina ai ia auaunaga. Pe totogi foi e le Malo, ae o lo o tuu atu i tua o le Malo. Ma o le isi taunuuga o lena faiga faavae, e faaitiitia mai ai le aufaigaluega a le Malo, faamamaavega i le tupe e alu i le totogiina o le aufaigaluega ae faamatuu atu auaunaga faatino e faatino i tua atu o le Malo, ma faatupu ai avanoa faigaluega mo le atunu lautele.

E pei o manatu aoaotetele na o le faiga faavae lea. Na amata ona faatino i le Sector lea o galuega tetele, lea lava e faapena, ona sosoo mai ai lea i le Sector o Fesootaiga, lea lava e tumau ai pea faapena. Ona sosoo ane ai lea ma le Matagaluega o Aoga, lea ua tuu atu i tua le Pulega o Aoga i le Komiti o Nuu ma Afioaga po o Faalapotopotoga a Matua ma Faiaoga i nisi o tatou

Kolisi. O le faatinoga lena o le faiga faavae e tuueseese itutino o faiga faavae po o le Malo foi lea ma le faatinoga o auauanaga o e i tua atu o le Malo.

Lau Afioga i le Fofoga Fatalai, i le Matagaluega o le Soifua Maloloina, lea na tupu le mea lena, tuu le Matagaluega e faia faiga faavae, ave le auauanaga i le National Health Services. Ona alu alu lea, ae toe faapea mai le Matagaluega lea, leai, e le lelei, toe aumai i lalo o le Pulega e tasi i le Matagaluega o le Soifua Maloloina. Ou te le fia talanoaina mafuaaga i le tatou Fono lenei, a o le uiga o lau faamatalaga, o faiga faavae, faiga faavae. Ma o so o se faiga faavae lau Afioga i le Fofoga Fatalai ma le mamalu o le Palemene, e le mafai ona lelei ona faatino se faiga faavae, pe a le galulue tagata e faataunu. Ae na amata mai lava le mataupu lea i totolu o le Sector lea, e felautoai lava, felautoai. Na mafai ona fai galuega tetele, na mafai ona fai fesootaiga. E oo foi i aoga, o le isi vaega tele o le atunu, lea lava na faataunu. Ae oo mai i le Sector lea o le Soifua Maloloina, e le i mafai ona tupu. E tausolomua i tagata i totolu o le Sector ona toe tape le faiga faavae lea. Ma e le mafai ona tupu pe tino, pe ola se faiga faavae, pe a le galulue i ai tagata e faatino. Na ou faalogo atu o saunoa mai le Minisita o le Soifua Maloloina e ese le felautoai o lea itutino o le Malo. E sao lelei. E misa mai lava latou, tausimai, fomai, faalala le pule a ai, o ai e maualuga, o ai e maualalo.

O le uiga o lau faamatalaga lau Afioga i le Fofoga Fatalai ma le mamalu o le Palemene, ua tupu le manatu, na fai ea le Matagaluega mo tagata faigaluega ia, pe na fai mo le auauanaga o le atunu? Aua o le mea lea o lo o aliali mai, i le faasolo maiga i Nofoaiga ua tea, e vevesi lava, e pisa, ona e a? Fai mai, o matou e tatau ona maua faamanuiaga ia, o matou e tatau ona a, o matou te tatau ona a. O le mea lava lena o lea e faafesili nei i lou mafaufau lau Afioga, aua i le faagasologa o feutanaiga ia o lo o faagasolo ma e uma taeao, e ese le tele o le gaoioi atu o le Komisi e Pulea le Aufaigaluega a le Malo e faamalieina manaoga o le aufaigaluega. O fea se mea ua oo i le va o le 40 i le 60% o le totogi, o lea ua faapea atu le PSC e mafai ona tatou talanoa i ai i a outou ovataimi, 40 to 60%. Ae a le tali? Leai. Ona tupu ai lea o le manatu, o latou ia o i totolu o le auauanaga lenei ua i ai i totolu o le auauanaga lea mo lo latou manuia, pe o i ai i totolu o le auauanaga lea mo le manuia o le atunu. A o le auauanaga lea, e ese le manaomia. O le a le mea lea e tupu? Gasegase le atunu. E oof oi i a tatou aoga, o lea ua 61 tausaga talu ona tatou tutoatasi, tele tupe tatou tea vatu i le soifua maloloina ma aoga, a o le a le mea lea e aliali mai? E tifa. E tifa i lalo, taunuuga ma faamoemoega, objectives, results, outcomes. Talofa e. Ia, po o le lautele foi o le auauanaga a le Malo. A faapea ua le tutusa le auauanaga a le Malo po ua le lelei le auauanaga a le Malo, ona tupu lea o le fesili lea ia tatou. E oo foi ia tatou o faipule, po o le a le tatou galuega lea e fai. O tatou o public servants, auauana mo tagata lautele. O le fesili, ua tatou auauana mo tagata lautele po ua tatou galulue e faamalieina o tatou manaoga muamua? O se vaaiga lautele

lena mo le Malo, ae patino i le mea lea e tupu pea, ma tupu pea i totonu o le vaega lea o le soifua maloloina.

Talofa e, talofa e i le atunu ma le vaai mai. O le mea lea ou te tatalo atu ai i le Maota lenei, o lea ua faatulaga le tatou Komisi e Pulea le Aufaigaluega a le Malo ina ia toe tatai mai le auaunaga i se tulaga e maualuga. Tuu i ai tagata o lo o i ai tomai e fuafuaina tagata faigaluega ma tomai e manaomia. Tau seesee ese le tatou vasega o polokiki. Taatia ia tatou faiga faavae. O lea la na ou talanoa atu lau Afioga i le Fofoga Fetalai, o le faiga faavae lea, tuueesese vaega e faia faiga faavae ma auaunaga.

O le a le faamoemoe na i ai na faiga faavae, tuu atu i tua i le atunu lautele auaunaga e gaosi ai pisinisi a tatou tagata. Faaititia le aufaigaluega a le Malo, aveese mai lena avega tau tupe i le toatele o le aufaigaluega a le Malo. A o le a le mea lea ua tupu lau Afioga? Le lelei le auaunaga ae fefete le aufaigaluega a le Malo. O le mea lena o lea e feagai ma le faigamalo lenei. O le mea la lea, e ese le taua o le tatou tilotilo totoa lava i le mea lea e tupu. E manaia tatou lauga ia e fai, ae a gasegase le atunu, le lelei le auaunaga, le lelei a tatou aoga, le lelei le tali atu o isi auaunaga a le Malo, o le a la le uiga o le tatou valaauna lea tatou te feofoofoi ai ina ia faafogafoga mai le atunu o tatou feofoofoi i lo tatou valaauna? A o le tatalo lena. A o faafogafoga mai fomai, le vasega o le soifua maloloina i le Fono lenei, alolofa ia, alolofa ia, e le o lava lena tamaoaiga e tau faasoatua? E le o lava? E le o tatou o se atunu mauoa, e le tele ni a tatou tupe o lo o tau faasoasoa le tatou tamaoaiga, ae a faatusatua foi i atunu o le Pasefika, e muamua Fiti pito atu i ai loa Samoa. O faamanuiaga mo a tatou aufaigaluega o le soifua maloloina. Aisea? Ona e taua mo tatou uma.

Ia, lau Afioga i le Fofoga Fetalai, ua ta le 12:00 ma ua ou manatu foi, ua tatau ona tatou malolo, ae faafetai tele i lo outou tauatai ma le onosaia o le umi o lenei 2 vайасо. Talosia ia e momoli atu lo outou soifua ma so tatou ola i le taeao fou ona faamaea ai lea o le tatou galuega.

Ma le faaaloalo lava lau Afioga.

**FOFOGA FETALAI:** Ua faamalo malele, faamalo saunoa i lau Afioga i le Palemia, o le Taitai foi o le Malo ma le Taitai foi o le Maota. Malo lava mo le saunoaga malamalama. Atonu foi ua faafogafoga ma le totoa le paia o le Maota, aemaise foi o le faafogafoga mai a le atunu, aemaise foi o nisi o itutino o Matagaluega a le tatou Malo. Ia e talitonu lava o lea ua oooo lava lau saunoaga i tulaga uma ma ua faailoa tulaga uma, aua lava le faatauaina o le auaunaga, aemaise foi o le tulaga o le tamaoaiga o le tatou atunu i lenei vaitaimi.

O le mea lea, malo le toa, malo foi le lototele i lou tulaga faa-Taitai, o lea lava ua manino mea uma, aemaise foi o faamoemoega mo le agai i luma o le tatou atunu. O le mea lea, ia malo faafetai mo le saunoaga. O lea ua faafogafoga le Maota ma le atunu i lau saunoaga. O le mea lea, malo faafetai.

Ia, talu ai o le tatou lafo a maea saunoa loa le saunoaga talifuaitau a le Afioga i le Palemia ona tatou toe tolopo lea mo le aso a taeao. O le mea lea ua faamalo le usufono i le paia o le tatou Palemene. Faamalo lava le onosai i lenei aso, ua tuneva lava le afiafi ma ua i ai foi le manatu ua faaaaogagase le tatou Maota, ua tatau ona fai se tatou malologa. Tatou talosia ia i le alofa o le Atua i le aso a taeao. A tatou tatala ia tuliloaina pea e le alofa o le Atua lo outou afifio atu.

Faafetai atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, malo lava. O outou lava e tua atu i ai le tofa a le tatou Maota, malo le onosai. Faafetai foi le tautua atunu.

Samoa ma lau tapuaiga, faamalo tatalo, faafetai mo le tapuaiga i lenei po, ua iu ma le manuia galuega a lau Palemene i lenei aso ona o lau tapuaiga.

Ia alofagia e le Atua faigamalologa a le tatou atunu i lenei afiafi. Ae tatou te le i tolopo, ou te talosaga atu i le Afioga i le sui usufono mo Faasaleleaga 2 e saunia se tatou tatalo.

***Na tolopo Taualumaga a le Fono Aoao Faitulafono i le itula e 12:10 i le vaveao seja aulia le Aso Faraile, 30 Iuni 2023 i le itula e 9:30 i le taeao.***